


Liahona

**Hingpit nga Kalipay ug
Pasalamat alang sa Nabanhaw
nga Manluluwas, p. 16**

**Lima ka mga Paagi sa Pagsunod
sa Propeta, p. 22**

**Mga panalangin sa Priesthood—
Anaa sa Tanan, pp. 46, 50, 53, 54, 60**





*“Mahimo ba sa
usa ka inahan sa
pagkalimot sa
iyang masuso
nga bata, nga
siya walay
kalooy diha sa
iyang anak nga
lalaki sa iyang
sabakan? Oo,
sila mahimo nga
makalimot,
apan Ako dili
makalimot
kaninyo.
“. . . Ako mikulit
kaninyo diha sa
mga palad sa
akong mga
kamot.”*

Isaias 49:15-16



MGA MENSAHE

- 4 Mensahe sa Unang Kapangulohan: Ang Lig-ong Pagkahimutang nga Angkla**
Ni Presidente Dieter F. Uchtdorf
- 7 Mensahe sa Visiting Teaching: Ang Balaan nga Misyon ni Jesukristo: Manluluwas ug Manunubos**

LABING IMPORTANTING MGA ARTIKULO

- 12 Kita ang mga Kamot sa Ginoo**
Ni Neil K. Newell
Ang mga Santos gikan sa Brazil, Ecuador, Pilipinas, ug Russia nagpakita kon unsay ipasabut sa pagpangalagad niadtong nanginahanglan.

NAA SA HAPIN

Atubangan: *Tanaman nga Lubnganan*, ni J. Kirk Richards, dili mahimong pakopyahan. Sulod sa atubangang hapin: Paghulagway sa litrato pinaagi ni John Luke.

- 16 Ang Linain nga mga Saksi Nagpamatuod sa Buhi nga Kristo**
Ang mga sakop sa Unang Kapangulohan ug sa Korum sa Napulog Duha ka mga Apostoles nagpamatuod sa Manluluwas.

- 22 Sunda ang Propeta**
Ni Elder William R. Walker
Kinahanglan nga atong makatunan kining lima ka leksyon gikan sa personal nga mga ehemplo ni Presidente Thomas S. Monson.

- 26 Mga Pioneer sa Matag Yuta: Ang Pilipinas: Espirituhanong Kalig-on diha sa mga Pulo sa Dagat**
Bisan pa sa natural nga mga katalagman ug ekonomikanhong mga kalisud sa Pilipinas, ang mga Santos nakasaksi sa talagsang paglambo didto.

- 32 Paggamit sa Plano sa Kaluwasan sa Pagtubag sa mga Pangutana**
Ni LaRene Porter Gaunt
Ang plano sa kaluwasan makatabang kanato sa pagtubag sa mahinungdanong mga pangutana sa kinabuhi.

MGA DEPARTAMENTO

- 8 Ang mga Propeta sa Daang Tugon: Moises**
- 10 Atong mga Panimalay, Atong mga Pamilya: Pito ka Adlaw sa Dili pa ang Pasko sa Pagkabanhaw [Easter]**
- 36 Mga Tingog sa mga Santos sa Ulahing mga Adlaw**
- 80 Hangtud Kita Magkita Pag-usab: Pagpangita og Paglaum sa Umaabut**
Ni Stan Pugsley



40

- 40 Kon ang Inyong Katuyoan Usa ngadto sa Akong Himaya**
Nila ni Katherine Nelson ug Heidi McConkie
Ang pagkamaligdong nga tawo nagkinahanglan og mas labaw pa kay sa sakto nga sininaan.
- 44 Mga Profile sa Young Adult: Pagkakabig ug Sakripisyo diha sa Finland**
Ni Melissa Zenteno

Tan-awa kon inyo bang makit-an ang Liahona nga gitago dinhi niini nga isyu. Timaan: Unsa ang iyang paborito nga mga butang?

54

- 46 Mga Lalaki ug mga Babaye diha sa Buhat sa Ginoo**
Ni Elder M. Russell Ballard
Ang mga lalaki ug babaye kinahanglang makasabut niining mga kamatuoran sa tahas sa mga babaye sa gingharian sa Dios.
- 50 Nangandam aron Moserbisyo, Nagserbisyo aron Maandam**
Ni David L. Beck
Ang inyong pagserbisyo sa Aaronic Priesthood mao ang sumbanan para sa tibuok nimong kinabuhi. Ania kon sa unsang paagiha.
- 53 Ang Gahum sa Pagpanalangin sa Tanang mga Tawo**
- 54 Pagdala sa mga Panalangin sa Priesthood sa Inyong Panimalay**
Ni Bonnie L. Oscarson
Bisan unsa pa ang inyong sekso o situwasyon sa pamilya, makasalig mo sa gahum sa priesthood sa pagpanalangin sa inyong pamilya.
- 56 Ang Pagsalig sa Katakus**
Ni Elder Jeffrey R. Holland
Kon gikinahanglan nga gamiton ninyo ang priesthood, mapasaligon ba mong mobuhati?
- 60 Ang Ganghaan ug ang Dalan**
- 62 Mga Pangutana ug mga Tubag**
Unsay akong buhaton kon sa eskwelahan tukion ang hilisgutan nga supak sa mga pagtulun-an sa ebanghelyo, sama sa aborsyon?
- 64 Husto o Sayop?**
Ni David A. Edwards
Tubaga kining eksamin ug mas magkat-on sa unsang paagi si Satanas mamakak kanato.



68

- 67 "Sayon ra Kaayo Kana, Lolo!"**
Ni Elder Enrique R. Falabella
Si Raquel wala maghunahuna nga igo na ang iyang pangidaron sa pagbasa sa Basahon ni Mormon.
- 68 Ang Saad ni Porter**
Ni Carole M. Stephens
Si Porter nagtuman sa iyang mga pakigsaad—ug wala gani siya masayud niini!
- 70 Pagdala sa Primary ngadto sa Panimalay: Ang Pamilya Mao ang Sentro sa Plano sa Langitnong Amahan**
Ni Jan Taylor
- 72 Maayo nga Ideya**
- 73 Pag-irog sa Bato**
Ni Elder Terence M. Vinson
Gusto sa Ginoo nga tabangan ta sa pagsulbad sa atong mga problema—bisan gani ang gagmayng mga problema.
- 74 Mga Higala sa tibuok Kalibutan: Ako si Dria gikan sa Pilipinas**
- 76 Para sa Gagmayng mga Bata**
- 81 Litrato sa Propeta:**
Howard W. Hunter



Internasyonal nga magasin sa Ang Simbahan ni Jesukristo sa mga Santos sa Ulahing mga Adlaw nga giimprinta sa Cebuano

Ang Unang Kapangulohan: Thomas S. Monson, Henry B. Eyring, Dieter F. Uchtdorf

Korum sa Napulog Duha ka mga Apostoles:

Boyd K. Packard, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Editor: Craig A. Cardon

Mga Adviser: Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

Tigdumalang Direktor: David T. Warner

Direktor sa Operasyon: Vincent A. Vaughn

Direktor sa mga Magasin sa Simbahan: Allan R. Loyborg

Business Manager: Garff Cannon

Tigdumalang Editor: R. Val Johnson

Luyo-Luyo sa Tigdumalang Editor: Ryan Carr

Team sa Pagsulat ug Pag-edit: Susan Barrett, Brittany Beattie, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Jones, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Tigdumalang Direktor sa Art: J. Scott Knudsen

Direktor sa Art: Tadd R. Peterson

Team sa Pagdesinyo: Jeanette Andrews, Fay P. Andrus,

C. Kimball Bott, Thomas Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Coordinator sa Intellectual Property:

Collette Nebeker Aune

Tigdumala sa Produksyon: Jane Ann Peters

Team sa Produksyon: Kevin C. Banks, Connie Bowthorpe

Bridge, Julie Burdett, Bryan W. Gygi, Denise Kirby, Ginny J.

Nilson, Gayle Tate Rafferty

Prepress: Jeff L. Martin

Direktor sa Pag-imprinta: Craig K. Sedgwick

Direktor sa Pagpang-apud-apod: Stephen R. Christiansen

Paghubad: Francisco M. dela Cruz

Ipadala ang subskripsyon, mga pangutana, ug mga taho ngadto sa *Dateline Philippines* sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gulá, gawas sa mga espesyal nga isyu.

Isumitang ang mga manuskrito ug mga pangutana

online sa liahona.lds.org; kon ipadala ngadto sa *Liahona*, Room 2420, 50 East North Temple Street, Salt Lake City, UT 84150-0024, USA; o i-e-mail sa: liahona@ldschurch.org

Ang *Liahona* (usa ka termino sa Basahon ni Mormon nga nagpasabot nga "kompas o direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, ug Vietnamese. (Ang kasagad magkalahi sa pinulongan.)

© 2014 sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gi-imprinta sa Tinipong Bansa sa Amerika.

Ang teksto ug biswal nga materyal diha sa *Liahona* mahimong kopyahan alang sa sulagma, dili pangkomersyo nga paggamit sa simbahan o panimalay. Ang biswal nga materyal dili mahimong kopyahan kon kini adunay mga pagdili diha sa linya sa kredito sa maong artwork. Ang mga pangutana kinahanglan ipadala ngadto sa Intellectual Property Office, 50 East North Temple Street, Salt Lake City, UT 84150, USA; e-mail: cor-intellectualproperty@ldschurch.org.

For Readers in the United States and Canada:

April 2014 Vol. 17 No. 4. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Post Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Mga Ideya sa Family Home Evening

Kini nga isyu naglangkob og mga artikulo ug mga kalihokan nga mahimong magamit sa family home evening. Ang mosunod mao ang duha ka mga ehemplo.



PAGHULAGWAY SA ULRATO PINAAGI NI DAVID STOKER

"Pito ka Adlaw sa Dili pa ang Pasko sa Pagkabanhaw [Easter]," pahina 10, ug **"Ang Linain nga mga Saksi Nagpamatuod sa Buhì nga Kristo,"** pahina 16: Mahimo ninyong gamiton ang mga materyal niining mga artikulo sa pagpahigayon sa kada adlaw nga debosyonal uban sa inyong pamilya sa semana sa wala pay Pasko sa Pagkabanhaw [Easter]. Sugod sa Dominggo sa wala pay Pasko sa Pagkabanhaw, basaha ang mga pagpamatuod sa Unang Kapangulohan sa pahina 17 ug sunda ang mga instruksyon sa "Pito ka Adlaw sa Dili pa ang Pasko sa Pagkabanhaw [Easter]." Sa matag adlaw nga mosunod, basaha ang mga pagpamatuod sa duha ka mga Apostoles ug gamita ang mga kasulatan, mga kanta, ug mga kalihokan sa "Pito ka Adlaw sa Dili pa ang Pasko sa Pagkabanhaw [Easter]" sa pagpakigbahin

sa mensahe uban sa inyong pamilya. Inigka Dominggo sa Pagkabanhaw, mahimo ninyong tan-awon ang Bible video "He Is Risen" nga makita sa lds.org/bible-videos (anaa sa daghang pinulongan).

"Sayon ra Kaayo Kana, Lolo!" pahina 67: Human og basa niining artikulo, mahimo usab ninyong kuhaon ang inyong stopwatch! Ikonsiderar ang pagbasa og usa ka pahina sa Basahon ni Mormon isip pamilya ug orasi kon unsa ka dugay mong nagbasa. Mogamit niana nga oras isip giya, ibana-bana ang gidugayon sa inyong pamilya sa pagbasa sa Basahon ni Mormon. Mahimo kamong maghimo og tumong sa pagbasa og dungan sa Basahon ni Mormon. Ang pagmugna og eskedyul, sama sa pagbasa sumala sa nasabutang oras kada adlaw, makatabang nga matuman ang inyong tumong.

SA INYONG PINULONGAN

Ang *Liahona* ug ubang mga materyal sa Simbahan anaa sa daghang mga pinulongan sa languages.lds.org.

MGA HILISGUTAN NIINI NGA ISYU

Mga numero sa pahina nagrepresentar sa unang pahina sa artikulo.

Babaye, mga, 46
Balaan nga Pagtahud, 76
Basahon ni Mormon, 67
Daang Tugon, 8
Ehemplo, 22
Hunter, Howard W., 81
Jesukristo, 4, 7, 10, 16, 76
Kasaysayan sa Simbahan, 26
Kinatibuk-ang komperensya, 4

Misyonaryo nga buhat, 26, 62
Monson, Thomas S., 22
Pagbangutan, 37, 39
Pag-ila, 64
Pagkakabig, 26, 44
Pagkaligdong, 40
Paglaum, 80
Pagpamatuod, 62
Pag-ula, 7, 10, 16, 32, 76
Pakigsaad, mga, 68
Pamilya, 46, 50, 54, 70

Pasko sa Pagkabanhaw [Easter], 10, 16
Pinulongan, 40
Plano sa kaluwasan, 32, 37, 39, 70
Priesthood, 46, 50, 53, 54, 56, 60
Propeta, mga, 8, 22
Serbisyo, 12, 36, 38, 50
Tagsa-tagsa nga Bili, 7, 12
Templo, mga, 26, 44
Welfare, 12, 36



**Ni Presidente
Dieter F. Uchtdorf**

Ikaduhang Magtatambag
sa Unang Kapangulohan

ANG LIG-ONG
PAGKAHIMUTANG NGA

Angkla

Dili pa lang dugay misakay ko sa dakong barko subay sa nindot kaayong baybayon sa Alaska, USA. Samtang ang kapitan nangandam nga i-angkurahi ang barko para sa tibuok gabii diha sa usa ka hilit nga luok nga dalisay, mabinantayon niyang gikalkulo ang dapit ug ang kahintang, sama kon kanus-a ang taub ug hunas, gilawmon sa tubig, ug distansya gikan sa delikadong mga parte sa luok. Sa dihang natagbaw na siya, iyang gihulog ang angkla aron ang barko magpabilin nga luwas ug lig-ong pagkaangkla, nakahatag og oportunidad sa mga pasahero nga mahingangha sa talagsaong kaanyag sa mga gilalang sa Dios.

Samtang nagtan-aw ko sa baybay, naamguhan nako nga ang barko halos dili mamatikdan nga napadpad sa hinay nga hangin ug sulog sa tubig. Bisan pa niana, ang barko lig-ong nagpabilin ug kanunayng anaa lang sa gitakda nga lugar sumala sa katas-on sa pisi ug kalig-on sa angkla.

Wala tipigi sa kapitan ang angkla diha sa barko, andam lamang nga ipaubos kon dunay nagsingabut nga unos. Wala, iyang giangkla ang barko isip panagang ug pagpu-gong sa barko nga dili moadto sa dili luwas nga mga dapit o hinay-hinay nga masangad samtang ang mga pasahero ug crew mibati nga luwas.

Samtang namalandong ko niining talan-awon, naghu-nahuna ko nga kon kini dili oportunidad para sa usa ka sambingay, wala ko mag-piloto sa eroplano.

Nganong Nagkinahanglan Kita og mga Angkla

Ang katuyoan sa angkla mao ang pagsiguro nga ang barko luwas sa gitinguha nga dapit o sa pagkontrolar sa barko atol sa dili maayo nga panahon. Hinoon, aron matuman kining mahinungdanong mga katuyoan, ang pagbaton og angkla dili paigo. Ang angkla kinahanglan nga lig-on, kasaligan, ug gamiton sa hustong panahon ug dapit.

Ang mga indibidwal ug pamilya nagkinahanglan usab og mga angkla.

Ang kalisdanan mahimong moabut isip dako nga unos nga mopadpad nato sa sayop nga direksyon ug mohulga nga maigo kita sa mga bato. Apan usahay kita maanaa usab sa kakuyaw kon ang tanan makita nga daw luwas—hinay ang hangin ug hapsay ang tubig. Sa pagkatinuod, mahi-mong kita anaa sa labing dakong kakuyaw kon kita napadpad ug hinay-hinayng naglihok nga hapit dili gyud kita makamatikod niini.

Ang Ebanghelyo Mao ang Atong Angkla

Ang mga angkla kinahanglang solido, lig-on ug ma-ayong pagkamentinar aron andam kon gikinahanglan. Dugang pa, kinahanglang nahigut kini sa pundasyon nga makasagubang sa pwersa nga angay buntugon.

Siyempre, ang ebanghelyo ni Jesukristo mao ang angkla. Kini giandam sa Tiglalang sa kalibutan alang sa balaang katuyoan ug gidesinyo nga makahatag og kasiguroan ug giya ngadto sa Iyang mga anak.

Unsa man diay ang ebanghelyo, gawas nga plano sa pagtubos sa Iyang mga anak ug pagdala nila balik sa Iyang presensya?

Nasayud nga natural lang nga ang kinaiyahan sa ta-nang butang mahisalaag, kinahanglan nga lig-on natong ipahimutang ang atong mga angkla diha sa pundasyon sa kamatuoran sa ebanghelyo. Kinahanglang dili kini ipaubos ngadto sa mga balas sa garbo o wala katugkad sa atong konbiksyon.

Karong bulana kita adunay oportunidad nga maka-dungog sa mga sulugoon sa Dios diha sa kinatibuk-ang komperensya sa Simbahan. Ang ilang mga pulong, inubanan sa mga kasulatan ug mga aghat sa Espiritu, makahatag og lig-on ug siguradong pundasyon sa mahangturong mga mithi ug mga baruganan diin atong mahigut ang atong



angkla aron kita magpabiling lig-on ug sigurado taliwala sa mga kalisud ug pagsulay sa kinabuhi.

Ang karaang propeta nga si Helaman mitudlo, “Diha sa lig-on nga sukaranan sa atong Manunubos kinsa mao si Kristo, ang Anak sa Dios, nga kamo kinahanglan gayud motukod sa inyong tukuran; nga sa panahon nga ang yawa mopadala sa iyang mapintas nga mga hangin, oo, ang iyang mga panâ diha sa alimpulos, oo, sa diha nga ang tanan niya nga ulan nga yelo ug ang iyang mapintas nga unos mohampak diha kaninyo, kini walay gahum ibabaw kaninyo sa pagbitad kaninyo ngadto sa bung-aw sa pagkauyamot ug walay katapusan nga pagkaalaot, tungod sa lig-on nga sukaranan diin kamo natukod nga mao ang tinuod nga tukuran, usa ka tukuran diin kon ang mga tawo magtukod dili sila mapukan.” (Helaman 5:12).

Ang Kamahinungdanon sa Lig-ong Pagkaangkla

Ang kinabuhi adunay paagi sa pagsulay sa atong mga angkla ug nagtintal kanato nga mapadpad. Bisan pa niana, kon ang atong mga angkla hustong napahimutang diha sa bato sa atong Manunubos, kini mokupot—bisan unsa kakusog sa hangin, sa kalawmon sa taub, o sa katas-on sa mga balud.

Siyempre, ang barko wala gidesinyo nga magbilin diha sa pantalan apan sa pagpasaka sa angkla ug molawig sa kadagatan sa kinabuhi. Apan kana sambingay na usab para sa laing higayon.

Sa pagkakaran, nahupay ko sa pagkasayud nga ang angkla sa ebanghelyo ug ang sukaranan sa atong Manunubos makahimo nato nga makanunayon ug lig-on.

Ang ingon nga angkla makapugong kanato gikan sa pagkapadpad ngadto sa kakuyaw ug kadaut. Kini maghatag kanato og nindot nga oportunidad nga makatagamtam sa dili matupngan nga katahum sa kanunayng nag-usab ug hamili nga talan-awon sa kinabuhi.

Ang kinabuhi matahum ug bililhon. Ang hangin, bagyo, ug kusog nga mga sulog mahimong makapadpad nato ngadto sa makita o di makita nga mga kakuyaw, apan ang mensahe sa ebanghelyo ug ang balaang gahum niini makapahimo nato nga magpabilin diha sa dalan balik ngadto sa luwas nga dungguanan sa atong Langitnong Amahan.

Busa kita, dili lang *maminaw* sa pakigpulong sa kinatibuk-ang kompetensiya sa Abril apan *mogamit* sa mga mensahe niini isip lig-ong angkla sa atong inadlaw-adlaw nga kinabuhi.

Unta ang Dios mopanalangin ug mogiya kanato niining mahinungdanon nga paningkamot! ■

PAGTUDLO NIINI NGA MENSAHE

Konsiderar sa paghisgot sa kaimportante sa mga angkla sumala sa kahimtang sa pamilya ni Lehi nga naglawig paingon sa yuta nga saad (tan-awa sa 1 Nephi 18). Tingali inyong ipasabut ang 1 Nephi 18:11–15, panahon dihang si Nephi gigapos, ang Liahona dili na molihok, ug ang barko gipadpad sa dagkong mga unos. Unsa ang mga sangputanan nga atong atubangon kon kita dili maayong pagkaangkla diha sa ebanghelyo? Mahimo usab ninyong ipasabut ang 1 Nephi 18:21–22 ug hisguti kon sa unsang paagi kita makakaplag og kaluwasan pinaagi sa pagdangop ngadto sa Manluluwas.

Ang Komperensya ug Ako

Ni Sarah Deeks



Sa una naghunahuna ko nga ang skinatibuk-ang komperensya dugay ug laay, apan sa paglabay sa panahon, naganahan ko og maayo ug naghinamhinam niini. Ang katapusan sa semana nga kinatibuk-ang komperensya mahimong espirituanong makapadadig, apan daling mawala kining mga pagbati kon ang normal nga kinabuhi magpadayon sa Lunes. Ang mosunod nga mga ideya nakatabang nako nga magpadayon sa pagpahimulos sa komperensya kutob sa mahimo.

Nangandam ko sa komperensya pinaagi sa pagsulat og mga pangutana, ug dayon magsulat ko samtang ang akong mga pangutana matubag. Pagkahuman, gusto nakong i-download ang mga pakigpulong sa komperensya ug musika gikan sa LDS.org ug ibutang kini sa usa ka MP3 player aron maminaw ko sa pakigpulong o himno samtang

buhaton nako ang akong inadlaw nga buluhaton. Ganahan sab kong magtuon sa mga isyu sa komperensya sa *Liahona*. Mag-highlight ug magsulat ko diha sa kilid sa akong personal nga kopya. Kon moabut na ang sunod nga komperensya, gamit na kaayo ang akong magasin. Usahay dungan nga tun-an sa akong pamilya ang mga mensahe atol sa family home evening.

Ang pagbaton sa espiritu nga atong gibati atol sa komperensya ug pagkat-on sa mga mensahe kinahanglan nga trabahuan, apan ang pagbuhat niini nahimong dakong panalangin alang kanako. Nakadawat ko og dakong kalig-on ug giya panahon sa panginahanglan pinaagi sa pagtuon sa mga mensahe gikan sa kinatibuk-ang komperensya, ug nasayud ko nga kining mga mensahe dinasig.

Ang tagsulat nagpuyo sa Toronto, Canada.

MGA BATA

Ipahimutang ang Inyong Angkla

Unsay makapahimo ninyo nga magpadayong naka-angkla sa ebanghelyo? Pag-drawing og linya gikan sa pisi diha sa kamot sa batang lalaki ngadto sa mga butang nga giingon ni Presidente Uchtdorf nga luwas nga mga dapit nga ipahimutang ang inyong angkla.



Tun-i sa mainampuong paagi kini nga materyal ug tinguhaa nga masayran kon unsa ang ipakigbahin. Sa unsang paagi ang pagsabut sa kinabuhi ug misyon sa Manluluwas makadugang sa inyong pagtuo diha Kaniya ug makapanalangin niadtong inyong giamuma pinaagi sa visiting teaching? Alang sa dugang nga impormasyon, adto sa reliefsociety.lds.org.

Ang Balaan nga Misyon ni Jesukristo: Manluluwas ug Manunubos

Kini kabahin sa sunod-sunod nga Mensahe sa Visiting Teaching nga naghulagway sa mga aspeto sa misyon sa Manluluwas.

Usa sa labing importanting mga titulo ni Jesukristo mao ang Manunubos,” miingon si Elder D. Todd Christofferson sa Korum sa Napulog Duha ka mga Apostoles. “Ang *pagtubos* nagpasabut sa pagbayad og obligasyon o utang. Ang *pagtubos* nagpasabut usab sa pagluwas o paghatag og kagawasan pinaagi sa pagbayad. . . . Ang kada usa niini nga mga kahulugan nagpakita og lain-laing bahin sa mahinungdanong Katubsanan nga nahimo ni Jesukristo pinaagi sa Iyang Pag-ula, nga naglakip, sa mga pulong sa diksyonaryo, “sa pagluwas gikan sa sala ug sa mga silot niini, nga dunay sakripisyo nga gihimo alang sa makasala.”¹

Si Linda K. Burton, kinatibuk-ang presidente sa Relief Society, miingon: Ang “Langitnong Amahan . . . gipadala ang Iyang Bugtong ug hingpit nga Anak sa pag-antus sa atong mga sala, sa atong mga kaguol, ug sa tanang ingon og dili makiangayon sa atong indibidwal nga mga kinabuhi.

“ . . . Usa ka babaye kinsa nakaagi og



mga pagsulay ug kasakit sulod sa mga katuigan misulti nga naghilak, ‘Akong naamguhan nga sama ako sa usa ka karaang 20 dolyares nga kwarta—kinumot, gisi-on, hugaw, giabusaran, ug du-not. Apan . . . gihapon ang akong bili 20 dolyares.’ Kini nga babaye nahibalo nga siya . . . may bili igo [sa Dios] sa pagpadala sa Iyang Anak sa pagtubos alang kaniya, mismo. Ang matag sister sa Simbahan kinahanglan nga masayud unsay nahibaloan niini nga babaye.”²

Gikan sa mga Kasulatan

2 Nephi 2:6; Helaman 5:11–12;

Moises 1:39

MUBO NGA MGA SULAT

1. D. Todd Christofferson, “Katubsanan,” *Ensign* o *Liahona*, Mayo 2013, 109.
2. Linda K. Burton, “Ang Hugot nga Pagtuo sa Pag-ula ni Jesukristo Nahisulat ba sa Atong mga Kasingkasing” *Ensign* o *Liahona*, Nob. 2012, 114.



Hugot nga Pagtuo, Pamilya, Kahupayan

Gikan sa Atong Kasaysayan

Ang Bag-ong Tugon naglakip sa mga asoy sa mga babaye kinsa migamit og hugot nga pagtuo kang Jesukristo, nakakat-on ug misunod sa Iyang mga pagtulunan, ug mipamatuod sa Iyang pangalagad, mga milagro, ug kaharianon.

Si Jesus miingon sa babaye didto sa atabay:

“Bisan kinsa nga magainom sa tubig nga akong igahatag kaniya dili na gayud pagauhawon; kay ang tubig nga akong igahatag kaniya mahimong diha sa sulod niya usa ka tubod sa tubig nga magatubo ngadto sa pagkakina-buhing dayon.

“Ang babaye miingon kaniya, Senior, hatagi ra ko nianang tubiga aron dili na ako uhawon. . . .

“Ako nasayud nga [ang Mesiyas] umaabut, nga ginatawag og Kristo: inig-abut na unya niya, siya mao ang magsaysay kanato sa tanang mga butang.

“Si Jesus miingon kaniya, Ako nga nakigsulti kanimo mao siya.”

Iyang “gibiyaan ang Iyang banga” ug mipamatuod Kaniya diha sa siyudad. (Tan-awa sa Juan 4:6–30.)

Unsa Ang Akong Mahimo?

1. Sa unsang paagi atong maipakita ang pasalamat ngadto sa Manluluwas ug Manunubos, si Jesukristo?
2. Sa unsang paagi kita makaambit sa mga panalangin sa mauaong sakripisyo sa Manluluwas sa atong kinabuhi?

MOISES

“Talagsaon kaayo si Moises nga gani si Kristo gihulagway isip usa ka Propeta nga sama niining karaan nga lider sa mga panon sa Israel.”¹ —Elder Bruce R. McConkie (1915–85) sa Korum sa Napulog Duha ka mga Apostoles

Natawo ko sa Ehipto sa panahon dihang ang akong mga katawhan, mga Israelite, mga ulipon. Nahadlok sa nagkadaghang mga ulipon nga Israelite, ang Paraon mimando nga ang tanang mga Israelite nga lalaki nga ihmugso pagapatyon. Aron maproteksyonan ko, gitago ko sa akong inahan sulod sa tulo ka bulan sa wala pa ko niya gipahimutang sa usa ka basket taliwala sa mga tigbaw [reed] sa Nile. Nadiskobrehan ko sa anak nga babaye sa Paraon ug gipadako ko niya isip iyang anak nga lalaki.²

Sa dihang midako ko, mibiya ko sa Ehipto ug mipuyo sa yuta sa Midian. Didto nahimuot si Jetro nako, isip magbalantay sa karnero ug priest, giminyoan ang iyang anak nga babaye nga si Zipporah. Gikan ni Jetro, nadawat nako ang Melchizedek Priesthood.³

Usa ka adlaw samtang nagbantay ko sa mga hayop ni Jetro, ang Ginoo mipakita kanako sa usa ka nagdilaab nga sampinit ug mitawag nako sa pagluwas sa mga anak sa Israel gikan sa pagkaulipon.⁴

Mibalik ko sa Ehipto ug misulti sa Paraon nga hatagan og kagawasan ang mga katawhan sa Ginoo, apan mas gipabug-at ang ilang mga palas-anon. Ang Ginoo mipadala og sunod-sunod nga hampak [plaque] ngadto sa mga Ehiptoanon, apan ang Paraon nagpatig-a sa iyang kasingkasing ug nagdumili gihapon nga hatagan og kagawasan ang mga Israelite. Ang katapusang hampak mao ang tiglaglag nga

anghel nga mipatay sa unang natawo nga anak nga lalaki sa matag pamilya sa Ehipto. Ang mga Israelite maproteksyunan gikan sa tiglaglag nga anghel pinaagi sa pagpahid og dugo sa walay lama nga karnero diha sa mga haligi sa ilang pultahan ug magpabiling anaa sa sulod. Pinaagi nako, ang Ginoo mipahigayon sa Piyesta sa Pagpalabay isip ordinansa aron makahinumdom ang mga Israelite niining milagro matag tuig.⁵

Ang katapusang hampak nakapahimo sa Paraon sa pagnunot ug paghatag og kagawasan sa mga Israelite. Apan sa wala madugay mitig-a ang kasingkasing sa

Paraon ug mipadala sa iyang kasundalohan aron sa pagkugod sa milaling mga Israelite. Ang Ginoo mipanalingin nako og gahum sa pagtungang sa Pulang Dagat, ug kami naglakaw sa uga nga yuta samtang ang dagat mitabon sa kasundalohan sa Paraon.⁶



MOSES IN THE BULRUSHES © PROVIDENCE COLLECTION; MOSES PARTING THE RED SEA, NI ROBERT T. BARRETT; MOSES AND THE TABLETS, NI JERRY HARSTON; MOSES CALLS AARON TO THE MINISTRY, NI HARRY ANDERSON; MOSES AND THE BRASS SERPENT, NI JUDITH A. MEHR

Ang Ginoo migiya namo diha sa kamingawan pinaagi sa panganod ma-adlaw ug gilis sa kalayo ma-gabii. Iyang kaming gisangkapan og tubig, mana, ug buntog.⁷

Gikatkat nako ang Bukid sa Sinai, diin naa ko didto sulod sa 40 ka adlaw ug nadawat ang Napulo ka Sugo gikan sa Ginoo. Sa dihang nanaug nako gikan sa bukid, ang mga Israelite mibiya sa Dios ug naghimo og bulawang baka aron simbahon. Dili na sila angayan pa sa pagdawat sa balaod sa Dios nga gihatag nako, mao nga akong gibuak ang mga papan [tablets] nga gisulatan niini. Mibalik ko sa bukid, diin ang Ginoo mihatag kanako sa mas ubos nga balaod nga

gitawag sunod sa akong ngalan—ang balaod ni Moises.⁸

Diha sa kamingawan ang Ginoo mipadayag nako sa mga desinyo sa pagtukod og tabernakulo, o mabalin-balhin nga templo. Among dalhon ang tabernakulo sa among pagbiyahe aron makasimba niini. Sa tabernakulo, ang mga tawo makadawat og mga ordinansa ug makig-istorya sa Ginoo “nawong sa nawong, ingon sa usa ka tawo nga nakigsulti sa iyang higala.”⁹ Gipakita usab sa Ginoo nako unsaon sa paghimo sa arka sa pakigsaad, usa ka balaan nga handumanan nga ibutang sa labing sagrado nga bahin sa tabernakulo, ang Holy of Holies.¹⁰

Sa dihang mipadala ang Ginoo sa “mga bitin nga mapintas” sa pagpanton sa mga Israelite, gisugo ko sa paghimo og usa ka bitin nga tumbaga ug ibutang kini sa usa ka tukon aron ang tanan nga napaakan sa bitin motan-aw niini ug mamaayo. Apan

tungod sa ilang garbo ug kayano sa buluhaton, daghan ang wala motan-aw ug namatay.¹¹

Ang Ginoo mihimo nga ang mga Israelite maglatagaw sa kamingawan sulod sa 40 ka tuig sa wala pa sila makasulod sa yuta sa saad.¹² Ako wala makasulod apan “gibayaw sa Espiritu” ngadto sa Ginoo.¹³ ■

MUBO NGA MGA SULAT

1. Bruce R. McConkie, *Mormon Doctrine*, 2nd ed. (1966), 515; tan-awa usab sa Deuteronomio 18:15–19.
2. Tan-awa sa Exodo 1; 2:1–10.
3. Tan-awa sa Exodo 2:11–22; Doktrina ug mga Pakigsaad 84:6.
4. Tan-awa sa Exodo 3; 4:1–17.
5. Tan-awa sa Exodo 5–12; Ezequiel 45:21.
6. Tan-awa sa Exodo 14.
7. Tan-awa sa Exodo 13:21–22; 15:22–27; 16; 17:1–7.
8. Tan-awa sa Exodo 24:18; 31:18; 32; 34.
9. Exodo 33:11.
10. Tan-awa sa Exodo 25–29; 40:21.
11. Tan-awa sa Numeros 21:6–9; 1 Nephi 17:41; Alma 33:19–20.
12. Tan-awa sa Numeros 14:33–34.
13. Alma 45:19.


MGA KAHON SA KAMATUORAN: MOISES

Mga Sinulat ni Moises: Agi og dugang sa basahon ni Moises diha sa Perlas nga Labing Bililhon, si Moises ang tagsulat sa unang lima ka basahon sa Biblia: Genesis, Exodo, Levitico, Numeros, ug Deuteronomio.

Mga tahas sa wala pa dinhi sa yuta: gipili sa pagdumala og usa ka dispensasyon (tan-awa sa Abraham 3: 22–23)

Mga tahas mortal nga kinabuhi: miluwas sa mga Israelite gikan sa Ehipto; midawat sa balaod didto sa Bukid sa Sinai (tan-awa sa Exodo 12; 20)

Mga tahas human sa kinabuhi dinhi sa kalibutan: mipakita didto sa Bukid sa Transfigurasyon, naghatag sa mga yawe sa priesthood ngadto kang Pedro, Santiago ug Juan (tan-awa sa Guide to the Scriptures, Transfiguration, scriptures.lds.org); mipakita didto sa Kirtland Temple sa Ohio, USA, niadtong Abril 3, 1836, mipahiuli sa mga yawe sa pagpundok sa Israel ngadto kang Joseph Smith (tan-awa sa D&P 110:11)



PITO KA ADLAW SA DILI PA ANG PASKO SA PAGKABANHAW [EASTER]

Kamo ug ang inyong pamilya makakat-on kon unsay gibuhath ni Jesus samtang nagpuyo siya sa yuta. Sugdi sa Dominggo sa wala pa ang Pasko sa Pagkabanhaw. Kada adlaw, basaha ang kasulatan, buhata ang kalihokan, o kantaha ang awit (o laing awit nianang hilisgutan). Dayon guntinga ug ipapilit sa walay sulod nga kahon ang litrato ni Jesus nga mohaum sa istorya sa kasulatan. Kon ang tanang kahon aduna nay litrato, Pasko na sa Pagkabanhaw! ■



ADLAW

1 Ang Langitnong Amahan mipadala sa Iyang Anak, si Jesukristo, nga matawo sa yuta.

- Lucas 2:4–7
- "He Sent His Son" (*Children's Songbook*, 34).

ADLAW

2 Si Jesus kaniadto usa usab ka bata. Kita mahisama Kaniya pinaagi sa pagbinuotan ug pagkamabination.

- Lucas 2:40, 52
- "Jesus Once Was a Little Child" (*Children's Songbook*, 55).

ADLAW

3 Si Jesus mituman sa tanang sugo sa Langitnong Amahan, lakip sa sugo nga magpabunyang.

- Mateo 3:13–17
- "When Jesus Christ Was Baptized" (*Children's Songbook*, 102).

ADLAW

4 Si Jesus mihimo og daghang mga milagro, sama sa pag-ayo sa mga tawo nga masakiton, pagtabang sa mga buta nga makakita pag-usab, ug paghunong sa unos.

- Marcos 4:36–39
- "Tell Me the Stories of Jesus" (*Children's Songbook*, 57).

3

2

1

4

ADLAW

5 Sa Katapusang Panihapon, si Jesus mihangyo sa Iyang mga disipulo sa pag-ambit sa sakrament isip paagi sa paghinumdom Kaniya. Kon kita moambit sa sakrament matag semana kita usab makahinumdom sa Manluluwas.

- Lucas 22:19–20
- Sultihi ang inyong mga ginikanan og usa ka butang nga inyong mahimo nga makatabang ninyo sa paghunahuna kabahin ni Jesus atol sa sakrament karong Dominggo.

ADLAW

6 Tungod ang Langitnong Amahan ug si Jesus nahigugma kanato, si Jesus mianhi sa yuta aron mag-antus sa atong mga sala, aron kita mapasaylo ug makabalik sa Langitnong Amahan.

- Lucas 22:41–44
- Unsa ang inyong buhaton karon aron ikapakita ni Jesus nga kamo mapasalamaton sa Iyang sakripisyo?

ADLAW

7 Human sa tulo ka adlaw nga anaa sa lubnganan, si Jesus nabanhaw. Tungod kay Siya nabanhaw, kita mabanhaw usab.

- Juan 20:15–17
- Lucas 24:36–40
- “Did Jesus Really Live Again?” (*Children’s Songbook*, 64).

Mapaminaw ninyo ang mga awit niining kalihokan sa [lds.org/music](https://www.lds.org/music).





KITA ANG MGA Kamot sa Ginoo

*Ang pagtabang sa mga kabus ug pagpangalagad niadtong nag-antus
mahinungdanon sa pagkahimong disipulo ni Jesukristo.*

Ni Neil K. Newell

Welfare Services

Sa sayo nga bahin sa Dakong Depresyon, unom ka presidente sa stake gikan sa Walog sa Salt Lake naghiusa sa pagsulbad sa nagkagrabe nga kalisud ug kagutom nga mihulga pag-ayo sa daghang mga miyembro sa Simbahan.¹ Bisan tuod ang krisis sa ekonomiya nakaapekto sa mga tawo bisan asa, ang Utah nagun-ob gyud pag-ayo.²

Nianang higayuna, ang mga lider sa Simbahan adunay gamay lang nga kapanguhaan aron itabang niadtong nanginahanglan. Siyempre, ilang magamit ang mga halad sa puasa, apan ang nagpadayon nga panginahanglan mas grabe pa kaysa ilang nasinati sukad. Ubos sa direksyon sa Presiding Bishopric, ang Deseret Employment Bureau natukod sa sayong mga 1900. Apan dili kompleto ang mga ekipo niini sa pag-atubang sa ingon ka dakong panginahanglan.

Kining unom ka mga lider sa priesthood nasayud nga kon tabangan ang mga tawo sa ilang stake, dili na sila maglangay-langay. Kinahanglan nilang molihok diha-diha dayon. Gisugdan nila pinaagi sa pagpatrabaho sa mga tawo. Giorganisar nila ang mga lalaki ug gidala sila ngadto sa umahan diin sila makaani. Isip bugti sa ilang paghago, ang mapasalamatong mag-uuma midonar og daghang pagkaon ngadto kanila. Ang sobra gidala ngadto sa balay tipiganan ug giapud-apud ngadto sa uban kinsa gigutom. Samtang nagkadaghan ang mga donasyon, gisugdan sa mga Santos ang pagsulod niini sa lata aron mapreserbar kini. Kini ang sinugdanan sa programa sa welfare sa modernong panahon.

Walo ka dekada ang milabay, ang mga lider sa Simbahan karon sa tibuok kalibutan moamuma sa ilang mga kongregasyon ug mobati sa samang determinasyon sa pagtabang niadtong nanginahanglan.

Niadtong Oktubre 2011 nga kinatibuk-ang komperensya, si Presidente Dieter F. Uchtdorf, Ikaduhang Magtatambag sa Unang Kapangulohan, miingon: “Makamatikod kita sa mga panginahanglan nga naglibut nato naglaum nga may usa ka tawo gikan sa layong dapit nga mokalit og pakita aron sa pagtubag niana nga mga panginahanglan. Tingali naghulat kita sa mga eksperto nga espesyalista sa pagsulbad og pihong mga problema. Kon kita maghimo niini, atong gihikawan ang atong silingan sa serbisyo nga mahimo natong mahatag, ug ato usab nga gihikawan ang atong kaugalingon sa oportunidad sa pagserbisyo. Bisan og dili sayop ang kalabut sa mga eksperto, atubangon na lang nato kini: dili gayud sila igo sa pagsulbad sa tanang mga problema. Hinoon, ang Ginoo mibutang sa Iyang priesthood ug sa mga organisasyon niini diha sa atong pultahan sa tanang kanasuran diin naestablisar ang Simbahan.”³

Kini nga panawagan sa lokal nga mga lider sa Simbahan ug sa mga miyembro sa paglihok sumala sa pagdasig sa Espiritu Santo nakapahimo sa daghang tawo sa tibuok kalibutan, sama sa giingon ni Presidente Uchtdorf, nga “hunahunaon og maayo [sa ilang kaugalingon].”⁴ Ilang gihulho ang buktunan sa ilang sinina ug mihukom nga “hinumduman diha sa tanan nga mga butang ang kabus

ug ang timawa, ang masakiton ug ang nag-antus” (D&P 52: 40).

Ecuador

Samtang giamuma ni Bishop Johnny Morante sa Guayaquil, Ecuador, ang mga miyembro sa iyang ward, nagmasulub-on ang iyang kasingkasing. Kadaghanan sa mga pamilya naglisud sa pagsangkap sa nag-unang mga kinahanglanon sa kinabuhi. Gusto niyang tabangan sila, busa iyang gikonsulta ang mga lider sa ward ug midangup sa Ginoo.

Tungod ang mga oportunidad sa pagtrabaho sa dapit nihit, iyang gisugdan uban sa usa ka grupo nga may 11 ka sister, nag-awhag kanila sa posibilidad sa ginagmayng negosyo. Nakamatikod kining mga sister sa panginahanglan sa dekalidad, barato nga mga suplay sa paglimpyo sa balay, ug naghunahuna kon sila makahimo ug makabaligya niini sa ilang komunidad. Apan unsaon nila paghimo niining mga suplay?

Niining panahona, si Bishop Morante nakaila sa usa ka sister sa iyang ward nga walay trabaho pero sa una nagtrabaho isip chemist sa pharmaceutical. Sa dihang gihangyo siya sa 11 ka sister nga motabang, nalipay siya sa pagtudlo kanila kon unsaon sa paghimo og luwas, dekalidad nga mga suplay.

Nagmugna sila og plano sa negosyo, gibahin-bahin ang mga dapit sa komunidad kon asa i-assigned ang kada sister, mipili og mga produkto nga ilang himoon, ug mide-sinyo sa mga pakete ug label.

Sulod sa pipila ka bulan, midaghan ang ilang customer ug aduna nay igong kinitaan sa pagpagaan sa ilang kalisud ug pagsangkap sa mga panginahanglan sa ilang mga pamilya.

Sa dihang ang mga manager sa usa ka lokal nga kompanya sa pharmaceutical nasayud kabahin niining negosyo, nakuryuso sila sa istorya sa walay trabaho nga chemist sa pharmaceutical. Sa katapusan gi-interbyu niya siya ug gidawat aron magdumala sa ilang pabrika.

Russia

Sa Rechnoy Ward sa Moscow, Russia, si Galina Goncharova, kinsa nagserbisyo isip ward historian, nadakin-as sa ice ug nabali ang iyang duha ka bukton. Gidala siya sa ospital, diin ang iyang mga bukton giputos. Dili siya maka-kaon o makasinina nga siya-siya lang. Dili niya masudlay ang iyang buhok o matubag ang telepono.

Sa dihang nasayran sa mga kauban sa ward ang nahitabo, mitabang sila diha-diha dayon. Ang mga naghupot sa priesthood mipanalagin kaniya ug nakig-alayon uban sa mga sister sa Relief Society sa pagmugna og eskedyul sa pagsusi sa kahimtang niining buotan nga sister ug pag-atiman sa iyang mga panginahanglan.

Si Vladimir Nechiporov, ang ward mission leader, miingon, “Nahinumduman namo ang usa ka pamulong nga gihatag sa kinatibuk-ang komperensya kabahin sa estatuwa



Human nadakin-as ug nabali ang mga bukton ni Galina Goncharova, ang mga sister sa Relief Society miserbisyo isip iyang mga kamot.

ni Kristo nga walay mga kamot.⁵ Ubos sa estatuwa adunay mibutang og plaque nga mabasa, ‘Kamo ang Akong mga Kamot.’ Sulod sa pipila ka semana kining buotan nga sister walay mahimo, ang mga miyembro sa Rechnoy Ward mibati og maayo niadto nga istorya. Kami sa literal nga paagi nahimong iyang mga kamot.”

Pilipinas

Sa dihang ang Bagyong Sendong [Washi] miigo sa Pilipinas niadtong 2011, mibaha og maayo ug kusog kaayo ang hangin. Mga 41,000 ka balay ang nadaut, ug mikalas og sobra sa 1,200 ka kinabuhi.

Sa wala pa ang baha, si Max Saavedra, presidente sa Cagayan de Oro Philippines Stake, nadasig sa pagmugna og stake emergency response team. Miorganisar siya og mga komite sa paghimo sa lain-laing mga

buluhaton—tanang gikan sa pagpangita ug pagluwas hangtud sa paghatag og first aid hangtud sa pagsangkap og pagkaon, tubig, ug sinina.

Sa dihang ang baha miubos na sa luwas nga lebel, ang mga lider sa Simbahan ug mga miyembro milihok. Ilang gisiguro nga luwas ang matag miyembro ug gibanabana ang kadaot. Usa ka miyembro misangkap og goma nga balsa aron pagdala sa natanggong nga mga miyembro ngadto sa luwas nga dapit. Giablihan ang mga meetinghouse aron mahimong kapasilungan niadtong nanginahanglan og pagkaon, sinina, mga habol, ug temporaryong dapit nga kapuy-an. Importante gyud kaayo ang limpyo nga tubig, busa gikontak ni Presidente Saavedra ang lokal nga negosyo nga nanag-iya og truck sa bombero, ug nagdala sila og limpyo nga tubig ngadto sa mga meetinghouse evacuation center. Ang mga miyembro nga adunay propesyonal nga kasinatian sa medikal miasikaso niadtong naangol.

Sa dihang ang tanang mga miyembro sa Simbahan nasubay na, si Presidente Saavedra ug ang iyang grupo mibisita sa ubang mga evacuation center sa siyudad ug mitanyag nga motabang. Gihatagan nila sila og pagkaon ug ubang mga suplay. Daghang mga miyembro, bisan tuod nawad-an sila og panimalay, walay hinakog nga miserbisyo sa uban diha-diha dayon human sa unos. Sa dihang ang ulan miundang ug nauga na ang yuta, ang mga boluntaryo sa Mormon Helping Hands gikan sa tulo ka stake miapud-apud sa mga suplay ug ingon mitabang sa pagpanglimpyo.

Brazil

Sulod sa siyudad sa Sete Lagoas, Brazil, adunay dangpanan sa mga babaye nga may kakulangan kansang kinabuhi naapektuhan tungod sa pag-abuso sa droga. Kada adlaw nanlimbasug sila nga mabuhi. Sila adunay gamay nga oven aron sa pagluto og 30 ka buok nga pan sa usa ka adlaw. Bisan tuod ang mga babaye nakadawat og tabang gikan sa usa ka lokal nga humanitarian association, kulang gihapon ang ilang pagkaon. Sa dihang ang mga lider sa Simbahan sa Sete Lagoas Brazil Stake nasayud sa mga panginahanglan niining mga babaye, gusto nilang motabang.

Sila nakigsabut sa mga babaye sa ilang mga panginahanglan. Ang mga babaye miingon nga kon sila makahimo og mas daghang pan, dili lang sila makakaon apan sila makabaligya usab og pipila ka pan ug makakwarta nga ilang gikinahanglan kaayo.

Ang mga lider sa Simbahan ug mga miyembro nakigtambayayong sa lokal nga mga pulis sa militar ug sa lokal nga

eskwelahan sa pagpalambo sa mga kahimtang niining mga babaye. Uban sa tabang sa humanitarian grant sa Simbahan ug sa mga boluntaryo gikan sa Simbahan ug sa komunidad, nakahimo sila og bag-ong panaderiya—diin ang mga babaye makahimo og 300 ka buok pan kada adlaw.

Gamit sa hinabang nga ilang nadawat, ang mga babaye sa panaderiya naka-hire sa ilang unang trabahante—usa sa mga babaye nga anaa sa dangpanan.

Ang Buhat sa Welfare

Sama niadtong dinasig nga mga lider sa Simbahan mga dekada na ang milabay kinsa nakakita sa dakong panginahanglan nga anaa kanila ug mitubag niini, ang mga lider sa Simbahan ug mga miyembro sa tibuok kalibutan naghimo usab niini sa ilang kaugalingong mga dapit ug pamaagi.

Sa dihang si Presidente Uchtdorf namulong ngadto sa Simbahan mahitungod sa pag-amuma sa uban, siya miingon: “Ang pamaagi sa Ginoo dili mao ang paglingkod lang sa daplin sa sapa ug maghulat sa pag-agos sa tubig nga mahuman una kita molabang. Magkuyog gayud kini, ihulho ang buktunan sa atong sinina, pagtrabaho, ug paghimo og taytayan o sakayan aron makalabang sa katubigan sa atong mga hagit.”⁶

Ang pagtabang sa mga kabus ug pagpangalagad niadtong nag-antus mahinungdanon nga bahin sa pagkahimong disipulo ni Jesukristo. Kini ang buhat nga gihimo mismo ni Jesukristo samtang Siya nangalagad sa mga tawo sa Iyang panahon. “Kini nga buhat sa pagsangkap diha sa pamaagi sa Ginoo dili lamang laing aytem diha sa listahan sa mga programa sa Simbahan,” gitapos ni Presidente Uchtdorf. “Dili kini mahimong ibaliwala o pasagdaan. Mahinungdanon kini sa atong doktrina; kini ang lintunganay sa atong relihiyon.”⁷ ■

MUBO NGA MGA SULAT

1. Upat niining mga presidente sa stake—Hugh B. Brown, Harold B. Lee, Henry D. Moyle, ug Marion G. Romney—sa wala madugay gitawag isip mga Apostoles, ug silang upat sa wala madugay nagserbisyo sa Unang Kapangulohan sa Simbahan. Si Harold B. Lee nahimong ika-11 nga Presidente sa Simbahan.
2. Niadtong 1930, ang Utah maoy ikaduha sa pinakataas nga walay trabaho sa Estados Unidos. Tan-awa sa Garth L. Mangum ug Bruce D. Blumell, *The Mormons' War on Poverty: A History of LDS Welfare 1830–1990* (1993), 95.
3. Dieter F. Uchtdorf, “Pagsangkap pinaagi sa Pamaagi sa Ginoo,” *Ensign* o *Liahona*, Nob. 2011, 54.
4. Dieter F. Uchtdorf, “Pagsangkap pinaagi sa Pamaagi sa Ginoo,” 55.
5. Tan-awa sa Dieter F. Uchtdorf, “Kamo ang Akong mga Kamot,” *Ensign* o *Liahona*, Mayo 2010, 68.
6. Dieter F. Uchtdorf, “Pagsangkap pinaagi sa Pamaagi sa Ginoo,” 54.
7. Dieter F. Uchtdorf, “Pagsangkap pinaagi sa Pamaagi sa Ginoo,” 55–56.



Ang mga sakop sa Unang Kapangulohan ug Korum sa Napulog Duha ka mga Apostoles mga modernong mga propeta, manalagna, ug tigpadayag kinsa mobarug isip “talagsaon nga mga saksi sa ngalan ni Kristo sa tibuok nga kalibutan” (D&P 107: 23). Sa ingon, sila adunay responsibilidad sa pagpamatuod sa kabalaan ni Jesukristo ug sa Iyang misyon isip Manluluwas ug Manunubos sa kalibutan.

Sa mosunod nga mga kinutlo, kining pinili ug sinugo nga mga tawo mipakigbahin sa ilang mga pagpamatuod sa Pag-ula sa Manluluwas, Pagkabanhaw, ug buhing kamatuoran.

Ang Linain nga mga Saksi Nagpamatuod sa Buhi nga Kristo



Si Jesus Mao ang Atong Manunubos

“Sa tibuok nakong kasingkasing ug tumang pagbati sa akong kalag,

mangusog ako sa akong tingog agig pagpamatuod isip usa ka linain nga saksi ug mamahayag nga ang Dios tinuod gayud nga buhi. Si Jesus Iyang Anak, ang Bugtong Anak sa Amahan sa unod. Siya ang atong Manunubos; Siya ang atong Tigpataliwala sa Amahan. Siya kadto ang namatay sa krus aron sa pagtubos sa atong mga kasal-anan. Nahimo Siya nga unang mga bunga sa Pagkabanhaw. Tungod kay Siya namatay, ang tanan gayud mabuhi pag-usab. ‘O, pagkanindot niining pulonga: ‘Ako nasayud nga ang akong Manunubos buhi!’” [“Ako Nasayud Nga Akong Manunubos Buhi” *Mga Himno ug mga Awit sa mga Bata*, nu. 38].”

Presidente Thomas S. Monson, “Ako Nasayud Nga Ang Akong Manunubos Buhi!” *Ensign o Liahona*, Mayo 2007, 25.



Ako Usa ka Saksi

“Saksi ako sa Pagkabanhaw sa Ginoo sama kasingurado nga didto ko sa gabii uban sa duha ka disipulo

sa balay sa Emaus. Nahibalo ko nga buhi Siya sama kasigurado kang Joseph Smith dihang nakita niya ang Amahan ug ang Anak sa kaha-yag sa nagsanag nga kabuntagon sa kakahoyan sa Palmyra. . . .

“ . . . Mopamatuod ako isip saksi sa nabanhaw nga Manluluwas ug atong Manunubos.”

Presidente Henry B. Eyring, Unang Magtatambag sa Unang Kapangulohan, “Umari Kanako,” *Ensign o Liahona*, Mayo 2013, 25.



Ang Pag-ula ug Kaluwasan

“Ang Dios nga Amahan mao ang tigpasiugda sa ebanghelyo; kini mahinungdanong

bahin sa plano sa Dios sa kaluwasan, o plano sa katubsanan. Kini gitawag nga ebanghelyo ni Jesukristo tungod kay ang Pag-ula ni Jesukristo ang mohimo sa katubsanan ug kaluwasan nga posible. Pinaagi sa Pag-ula ang tanang lalaki, mga babaye, ug mga bata walay kondisyon nga gitubos gikan sa pisikal nga kamatayon, ug ang tanan matubos gikan sa ilang kaugalingong mga sala uban sa kondisyon sa pagdawat ug pagsunod sa ebanghelyo ni Jesukristo. . . .

“Niini ako mohatag og saksi uban sa tibuok nakong kasingkasing ug hunahuna.”

Presidente Dieter F. Uchtdorf, Ikaduhang Magtatambag sa Unang Kapangulohan, “Wala Ba Kita’y Rason nga Maglipay?” *Ensign o Liahona*, Nob. 2007, 19, 21.



Si Jesus Mao ang Kristo

“Ako nasayud nga ang Dios mao ang atong Amahan. Iyang gipaila ang Iyang Anak, si Jesukristo, ngadto kang Joseph Smith. Ako mamahayag kaninyo nga ako nasayud nga si Jesus mao ang Kristo. Ako nasayud nga Siya buhi. Siya natawo sa tunga-tungang panahon. Siya nagtudlo sa Iyang ebanghelyo ug gisulayan. Siya nag-antus ug gilansang sa krus ug nabanhaw sa ikatulong adlaw. Siya, sama sa Iyang Amahan, adunay lawas nga unod ug bukog. Siya mihimo sa Iyang Pag-ula. Kaniya ako mosaksi. Kaniya ako usa ka saksi.”

Presidente Boyd K. Packer, Presidente sa Korum sa Napulog Duha ka mga Apostoles, “Ang Napulog Duha,” *Ensign* o *Liahona*, Mayo 2008, 87.



Panglukat sa Katawhan

“[Si Jesukristo] ang sentro sa mahangturong plano sa Amahan, ang Manluluwas nga gitagana isip lukat sa katawhan. Ang Dios mipadala sa Iyang Hinigugma nga Anak aron mobuntog sa Pagkapukan ni Adan ug Eva. Siya mianhi sa kalibutan isip atong Manluluwas ug Manunubos. Siya mibuntog sa babag sa pisikal nga kamatayon alang kanato pinaagi sa paghatag sa kaugalingon Niyang kinabuhi. Dihang namatay Siya sa krus, ang Iyang espiritu mibulag gikan sa Iyang lawas. Sa ikatulo nga adlaw ang Iyang espiritu ug ang Iyang lawas nagkahiusa sa mahangturong nga kahimtang, dili na magbulag pag-usab.”

Elder L. Tom Perry sa Korum sa Napulog Duha ka mga Apostoles, “Ang Plano sa Kaluwasan,” *Ensign* o *Liahona*, Nob. 2006, 71.



Ang Sentro nga Buhat sa Tibuok Tawhanong Kasaysayan

“Ang Pag-ula [sa Manluluwas] nahitabo sa Getsemani, diin Siya gisingot og daw apol (tan-awa sa Lucas 22:44), ug sa Golgota (o Kalbaryo), diin ang Iyang lawas gilansang ngadto sa krus ngadto sa ‘dapit sa kalabira,’ nga nagpasabut og kamatayon (Marcos 15:22; Mateo 27:33; tan-awa usab sa 3 Nephi 27:14). Kini nga walay kinutuban nga Pag-ula makapahimong gawason sa tawo gikan sa walay kinutuban nga kamatayon (tan-awa sa 2 Nephi 9:7). Ang Pag-ula sa Manluluwas naghimo sa pagkabanhaw nga usa ka reyalidad ug sa kinabuhing dayon nga posible alang sa tanan. Ang Iyang Pag-ula nahimong sentro nga buhat sa tibuok tawhanong kasaysayan.”

Elder Russell M. Nelson sa Korum sa Napulog Duha ka mga Apostoles, “Ang Kalinaw ug Hingpit nga Kalipay nga Mahibalo nga ang Manluluwas Buhi,” *Ensign*, Dis. 2011, 20; *Liahona*, Dis. 2011, 22.



Usa ka Sakripisyo alang sa Sala

“Nag-antus pag-ayo si Jesukristo aron isakripisyo ang Iyang Kaugalingon alang sa sala sa tanan. Kana nga sakripisyo nagtanyag og kaayo—ang putli nga Kordero—alang sa hilabihang kadautan—ang sala sa tibuok kalibutan. . . .

“Kanang sakripisyo—ang Pag-ula ni Jesukristo—anaa sa sentro sa plano sa kaluwasan. . . .

“Nasayud ko nga si Jesukristo mao ang Bugtong Anak sa Dios Amahan. Nasayud ko nga tungod sa Iyang maulaong sakripisyo, makaangkon kita og imortalidad ug oportunidad sa kinabuhing dayon. Siya ang atong Ginoo, Manluluwas, ug Manunubos.”

Elder Dallin H. Oaks sa Korum sa Napulog Duha ka mga Apostoles, “Sakripisyo,” *Ensign* o *Liahona*, Mayo 2012, 19, 22.



Ang Manluluwas Naggiya sa Iyang Simbahan Karon

“Ang Pag-ula ni Jesukristo maoy pinakaimportante nga bahin nga plano sa Langitnong Amahan para sa yutan-ong misyon sa Iyang Anak ug para sa atong kaluwasan. Mapasalamaton kaayo kita nga ang atong Langitnong Amahan wala mopataliwala apan hinoon mipugong sa Iyang pag-kaamahan nga kinaiya sa pagluwas sa Iyang Bugtong Anak. Tungod sa Iyang walay katapusang gugma alang kanimo ug kanako, Siya mitugot kang Jesus sa pagtiwas sa Iyang giordinahan na daan nga misyon nga mahimong atong Manunubos. . . .

“Si Jesukristo, ang Manluluwas ug Manunubos sa tanang katawhan, dili patay. Siya buhi—ang nabanhawng Anak sa Dios buhi—mao kana ang akong pagpamatuod, ug Siya naggiya sa mga kalihokan sa Iyang Simbahan karon.”

Elder M. Russell Ballard sa Korum sa Napulog Duha ka mga Apostoles, “Ang Pag-ula ug ang Bili sa Usa ka Kalag,” *Ensign o Liahona*, Mayo 2004, 85, 86.



Atong Paglaum, Atong Tigpataliwala, Atong Manunubos

“Ang atong kasiguroan anaa sa [atong Langitnong Amahan] ug sa Iyang Hinigugmang Anak, si Jesukristo. Ako nasayud nga ang Manluluwas nahigugma kaninyo. Siya motabang sa inyong mga paningkamot sa paglig-on sa inyong pagpamatuod aron kini mahimong hingpit nga gahum alang sa kaayohan sa inyong kinabuhi, usa ka gahum nga mosuporta kaninyo sa panahon sa panginahanglan ug modala kaninyo og kalinaw ug kasiguroan niining panahon sa walay kasiguradoan.

“Isip usa sa Iyang mga Apostoles nga gitugutan sa pagsaksi Kaniya, maligdong kong mopamatuod nga ako nasayud nga ang Manluluwas buhi, nga Siya usa ka nabanhaw, nahimaya nga personahe sa hingpit nga gugma. Siya ang atong paglaum, atong Tigpataliwala, atong Manunubos.”

Elder Richard G. Scott sa Korum sa Napulog Duha ka mga Apostoles, “The Power of a Strong Testimony,” *Ensign*, Nob. 2001, 89; *Liahona*, Ene. 2002, 103.



Pag-inom sa Mapait nga Kopa

“Didto sa Tanaman sa Getsemani, ang atong Manluluwas ug Manunubos wala molikay sa pag-inom sa mapait nga kopa sa Pag-ula [tan-awa sa D&P 19:16–19]. Ug diha sa krus nag-antus na usab Siya sa pagbuhat sa kabubut-on sa Iyang Amahan, hangtud sa katapusan Siya miingon, ‘Tapus na’ [Juan 19:30]. Milahutay Siya hangtud sa katapusan. Agig tubag sa pagkamasulundon sa Manluluwas sa pagbarug nga lig-on, ang atong Langitnong Amahan mipahayag, “Tan-awa ang Akong Hinigugmang Anak, kinsa Ako nahimuot kaayo, kang kinsa Ako mihimaya sa akong ngalan’ [3 Nephi 11:7].

“ . . . Atong himayaon ang ngalan sa Dios pinaagi sa lig-ong pagbarug uban sa atong Manluluwas, si Jesukristo. Ako mosaksi nga Siya buhi.”

Elder Robert D. Hales sa Korum sa Napulog Duha ka mga Apostoles, “Lig-ong Mobarug sa Balaan nga mga Dapit,” *Ensign o Liahona*, Mayo 2013, 51.



Bugtong Hingpit nga Anak sa Dios

“Nasayud ko nga ang Dios sa tanang higayon ug sa tanang pamaagi ug sa tanang kahimtang mao ang atong mahigugmaong Amahan sa Langit. Nasayud ko nga si Jesus mao ang Iyang bugtong hingpit nga anak, kansang kinabuhi mahigugmaong gihatag tungod sa kabubut-on sa Amahan ug sa Anak alang sa katubsanatan natong tanan kinsa dili hingpit. Nasayud ko nga mibangon Siya gikan sa kamatayon aron mabuhi pag-usab, ug kay Iya kining nahimo, mao usab kaninyo ug kanako.”

Elder Jeffrey R. Holland sa Korum sa Napulog Duha ka mga Apostoles, “Nagatuo Ako,” *Ensign o Liahona*, Mayo 2013, 95.



Nasayud Ko nga ang Manluluwas Buhi

“Akong ipahayag ang akong pagsaksi ug pasalamat sa walay kinutuban ug mahangturong sakripisyo sa Ginoo nga si Jesukristo. Nahibalo ko nga buhi ang Manluluwas. Akong nasinati ang Iyang matubsanon nga gahum ug ang Iyang maka-abag nga gahum, ug akong ipamatuod nga kining mga gahum tinuod ug maanaa alang sa matag usa kanato. Sa pagkatinuod, ‘sa kalig-on sa Ginoo’ makahimo kita ug makabuntog sa tanang butang samtang magpadayon kita sa atong panaw sa pagka-mortal.”

Elder David A. Bednar sa Korum sa Napulog Duha Ka mga Apostoles, “Ang Pag-ula ug ang Panaw sa Pagka-Mortal,” *Ensign*, Abr. 2012, 47; *Liahona*, Abr. 2012, 19.



Si Kristo Mituman sa Iyang Misyon

“Giangkon [sa Manluluwas] diha sa iyang Kaugalingon ang “palas-anon sa mga sala sa katawhan’ ug ang ‘mga kalisang nga mapahamtang . . . ni Satanas’ [James E. Talmage, *Jesus the Christ*, 613]. Niini nga proseso giantus Niya ang malimbungon nga mga paghusay ug ang makahahadlok, subo nga mga panghitabo nga misangput sa Iyang Pagkalanlang. Kini sa katapusan misangput sa madaugong Pagkabanhaw ni Kristo pagka Domingo sa Pasko sa Pagkabanhaw. Si Kristo mituman sa Iyang sagrado nga misyon isip Manluluwas ug Manunubos. Kita mabanhaw gikan sa kamatayon ug mahiusa ang atong mga espiritu uban sa atong mga lawas. . . .

“Ako mohatag sa apostolikanhon nakong pagpamatuod nga si Jesukristo buhi ug mao ang Manluluwas ug Manunubos sa kalibutan. Siya mihatag og agianan sa tinuod nga kalipay.”

Elder Quentin L. Cook sa Korum sa Napulog Duha ka mga Apostoles, “Kita Nagsunod ni Jesukristo,” *Ensign o Liahona*, Mayo 2010, 83–84, 86.



Ang Manluluwas Mitubos Kanato

“Ang pag-antus sa Manluluwas sa Getsemani ug ang Iyang paghingutas sa krus nagtubos nato gikan sa sala pinaagi sa pagtagbaw sa gipangayo sa kaangayan ngari kanato. Iyang kaloy-an ug pasayloon kadtong maghinulsol. Ang Pag-ula nagbayad usab sa utang nga nautang sa kaangayan nato pinaagi sa pag-ayo ug pagbayad nato sa bisan unsa nga pag-antus nga inosente natong giantus. ‘Kay tan-awa siya miantus sa mga kasakit sa tanan nga mga tawo, oo, ang mga kasakit sa tanan nga buhi nga binuhat, mga lalaki, mga babaye, ug mga bata, nga nahi-sakop sa banay ni Adan’ (2 Nephi 9:21; tan-awa usab sa Alma 7:11–12). . . .

“. . . Ang importante nga katubsanan anaa ni Jesukristo ug Kaniya lamang. Mapainubsanon ug mapasalamaton ako nga moila Kaniya isip Manunubos.”

Elder D. Todd Christofferson sa Korum sa Napulog Duha ka mga Apostoles, “Katubsanan,” *Ensign o Liahona*, Mayo 2013, 110, 112.



Ang Pagkabanhaw ug ang Kinabuhi

“Labaw sa tanan, kita mopahayag sa atong Manluluwas ug Manunubos, si Jesukristo. Ang tanan nga kita nahimo—ang tanan nga kita kanunay gayud—utang nato Kaniya. . . .

“Ang iyang mga pulong milanog sa tibuok siglo:

“Ako mao ang pagkabanhaw, ug ang kinabuhi: ang mosalig kanako, bisan siya mamatay, mabuhi siya:

“Ug ang tanan nga buhi ug nagasalig kanako dili na gayud mamatay’ (Juan 11:25–26).

“Mga kaigsoonan, Siya buhi. Siya nabanhaw. Siya naggiya sa Iyang balaan nga buhat dinhi sa yuta.”

Elder Neil L. Andersen sa Korum sa Napulog Duha Ka mga Apostoles, “Duol ngadto Kaniya,” *Ensign o Liahona*, Mayo 2009, 80.



PAGTUBAG SA MGA PANGUTANA

Unsa ang panagway sa tawo nga nabanhaw?

“Human sa atong kamatayon niining kinabu-hia, ang atong . . . lawas pagahimayaon, dili na masakit ug wala nay kasakit, ug himoong labing nindot. Wala nay mas nindot pa nga tan-awon kay sa usa ka nabanhaw nga lalaki o babaye. Wala na akoy mahunahunaan nga

labing talagsaon nga maangkon sa usa ka lalaki [o babaye] kay sa nabanhaw nga lawas. Walay Santos sa Ulahing mga Adlaw . . . apan sigurado nga naglaum nga mobangon sa buntag sa unang pagkabanhaw ug mahimaya diha sa presensya sa Dios.”

Presidente Lorenzo Snow (1814–1901), sa Conference Report, Okt. 1900, 4.



Ni Elder
William R. Walker
Sa Seventy



Sunda

ANG PROPETA

Pipila ka tuig ang milabay, sa hapit na ang kinatibukang komperensya, si Presidente Thomas S. Monson mitudlo og talagsaon nga leksyon. Nahitabo kini atol sa panagpundok sa mga General Authority kinsa mibiyahe sa Siyudad sa Salt Lake, Utah, daghan gikan pa sa laing mga dapit sa kalibutan kon asa sila nagserbisyo isip mga Area Presidency. Kami nagpundok aron matudloan sa Unang Kapangulohan ug sa Napulog Duha ka mga Apostoles.

Samtang nagkaduol ang miting, ang tanan ingon og anaa na gawas lang ni Presidente Monson. Pipila ka minuto sa hapit na magsugod ang miting, mihunong kami sa pakig-istorya sa usag usa ug milingkod uban sa balaang pagtahud sa pagpaminaw sa pasiuna nga musika, naghulat sa pag-abut sa propeta.

Kami mapailubong naghulat sa dihang alas-9:00 na sa buntag ug milapas na. Usa ka tawo migawas agi sa kilid nga pultahan—sa pagsuta kon aduna bay gikinahanglan nga tabang. Sa pagsulod og balik, siya miingon, “Si Presidente Monson moapil kaninyo sa dili madugay.”

Mga 15 minutos ang milabay, si Presidente Monson misulod sa kwarto. Agi og pagtahud, kami mibarug sa dihang misulod siya. Kami nalipay nga nakakita kaniya ug nahimuot nga maayo siya. Wala mahibaloi unsay hinungdan nganong nalangay siya.

Midiretso si Presidente Monson ngadto sa pulpito ug miingon, “Mga Kaigsoonan, pasayloa ko nga nalangay ko, gikinahanglan ko sa akong asawa karong buntaga.”

Nakadayeg ko og maayo ug napaubos, ug dili ko makapugong sa paghunahuna kabahin sa iyang mga pulong.

Kini importante kaayo nga miting. Ang tibuok senior nga pagpangulo sa Simbahan nagpundok, apan mipakita og ehemplo si Presidente Monson kanamong tanan. Nagkinahanglan ang iyang asawa niya, ug siya migahin og panahon sa pag-atiman kaniya. Talagsaon kini nga wali. Wala na

Samtang kita nagsunod ni Presidente Monson ug naningkamot nga mahisama kaniya, kita molampus gayud nga mahimong mas matinud-anong mga disipulo ni Ginoong Jesukristo.

koy laing nahinumduman nga gisulti nianang adlaw, apan akong nahinumduman kana nga wali: “Gikinahanglan ko sa akong asawa.”

Pagsunod sa Ehemplo sa Propeta

Mosugyot ko og lima ka paagi nga kita makasunod sa ehemplo ni Presidente Monson.

1. Kita mahimong positibo, ug mahimong malipayon.

Diha sa Perlas nga Labing Bililhon, si Propeta Joseph Smith mihulagway sa iyang “pagkagaan og buot” (Joseph Smith—Kasaysayan 1:28). Ang “pagkagaan og buot” naghulagway usab ni Presidente Monson.

Kausa si Presidente Monson miingon: “Kita . . . makapili sa pagbaton og positibo nga kinaiya. Dili nato makontrolar ang hangin, apan atong mapahiangay ang mga layag. Sa laing pagkasulti, kita makapili nga magmalipayon ug magmapositibo, bisan unsa pay mahitabo.”¹

Usa ka adlaw nagpaabut ko sa gawas sa boardroom sa Unang Kapangulohan. Gidapit ko didto sa pag-apil sa miting aron sa paghisgot sa mga butang kalabut sa templo. Hilom kong milingkod sa gawas sa kwarto, nag-inusara. Abi nako nga ang Unang Kapangulohan anaa na sa miting ug dapiton ko sa pag-apil kanila sa pipila ka minuto.



Sa matag pagpahinungod sa templo, si Presidente Monson nag-focus sa mga bata. Ganahan niyang apilon sila sa seremonya sa bato sa pamag-ang.

Samtang naglingkod ko, nakadungog ko og usa ka tawo nga naglakaw diha sa hawanan nga nanaghoy. Naghuna-huna ko, “Adunay usa ka tawo kinsa wala makasabut sa hustong pamatasan. Dili mo maglakaw-lakaw nga managhoy gawas sa opisina sa Presidente sa Simbahan.”

Pagkataud-taud ang nanaghoy naglakaw na sa may kanto—si Presidente Monson kadto. Siya malipayon, ug positibo. Siya mainitong miabi-abi kanako ug miingon, “Tingali sugdan nato ang miting sulod sa pipila ka minuto.”

Bisan sa dakong gibug-aton sa tibuok Simbahan diha sa iyang abaga, siya ehemplo sa kalipay ug kanunay siya nga adunay positibo nga kinaiya. Ingon niana gyud unta ta.

2. Kita magmabination ug mahigugmaon ngadto sa mga bata.

Si Jesus kanunay maghisgot sa mga bata. Ang Iyang propeta, si Presidente Monson, kanunay maghisgot usab sa mga bata. Akong nakita, ilabi na sa mga pagpahinungod sa templo, kon unsa niya kahigugma ang mga bata ug, pinaagi sa iyang ehemplo, nagtudlo kanato unsaon sa pagtratar kanila. Sa matag pagpahinungod sa templo nag-focus siya sa mga bata. Ganahan niyang apilon sila sa seremonya sa bato sa pamag-ang ug kanunay nagdapit og pipila kanila sa pagbutang og mortar diha sa bato sa pamag-ang aron sa pag-apil sa simbolo nga pagkahuman sa templo. Himoon niya kining makalingaw kanila. Himoon niya kining halan-dumon alang kanila. Kanunay siyang may dakong pahiyom alang kanila. Siya nag-awhag ug nagdayeg kanila. Nindot kaayo kini nga talan-awon.

Ang iyang madasigong pagtimbaya usahay maglakip sa pag-apir, pagpalihok-lihok sa iyang dunggan, ug pag-awhag sa pagserbisyo og misyon ug pagminyo diha sa templo.

Mga pipila ka tuig ang milabay si Presidente Monson na-eskedyul sa pagpahinungod sa Oquirrh Mountain Utah Temple sa iyang adlaw nga natawhan. Sa iyang pag-abut sa templo ug pagduol sa atubangang pultahan sa templo, nagpundok ang grupo sa mga kabatan-onan. Klaro kaayo nga nasayud sila nga adlawng natawhan kadto ni Presidente Monson tungod kay misugod sila sa pagkanta og “Happy Birthday” kaniya. Mihunong ug miatubang siya kanila nga may dakong pahiyom. Gani misugod siya sa pagwara-wara sa iyang mga bukton daw naggiya kanila sa pagkanta. Sa katapusan sa kanta gidugang nila ang mga pulong nga “Ug daghan pa.” Siya miingon ngari nako, “Kana ang akong paborito nga bahin.”

Ang mga bata ug kabatan-onan sa Simbahan nahigugma kaniya, ug sila wala magduha-duha nga siya nahigugma usab kanila!

3. Kita makasunod sa mga aghat sa Espiritu.

Nindot kaayong pagpadayag ni Presidente Monson ang iyang debosyon ngadto sa Ginoo ug sa iyang pasalig sa pagsunod sa mga aghat sa Espiritu niini nga mga pulong: “Ang pinakanindot nga kasinatian nga akong nasayran sa kinabuhi mao ang mobati sa aghat ug mosunod niini ug sa dili madugay masayran nga kini katumanan sa pag-ampo o panginahanglan sa usa ka tawo. Ug kanunay nakong ipaabut sa Ginoo nga kon aduna siyay ipabuhay, si Tom Monson andam nga mobuhay niana alang Kaniya.”²

Kana ang sumbanan nga angay sundon sa kada usa nato.

4. Kita makahimo sa paghigugma sa templo.

Si Presidente Monson mailhan sa kasaysayan isip usa sa talagsaong mga tigtukod sa templo sa kasaysayan sa Simbahan. Sukad nahimong Presidente sa Simbahan niadtong Pebrero 2008, iyang gipadayon ang dakong buluhaton sa pagtukod og mga templo. Sa unom ka tuig nga siya ang propeta, si Presidente Monson mipahibalo sa mga plano sa pagtukod og 33 ka bag-ong mga templo.

Si Presidente Monson miingon, “Unta ang matag usa kanato magpuyo og takus nga kinabuhi, uban sa limpyo nga mga kamot ug putli nga mga kasingkasing, aron ang templo mahimong motandog sa atong mga kinabuhi ug mga pamilya.”³

Siya usab mihatag niining talagsaon nga saad: “Samtang kita naghigugma sa templo, naghikap sa templo, ug nagtambong sa templo, ang atong kinabuhi mopakita sa atong pagtuo. Samtang kita mosulod niining balaan nga

mga balay sa Dios, samtang kita mohinumdom sa mga pakigsaad nga atong gihimo sa sulod, *makabuntog kita sa tanang pagsulay ug tintasyon.*”⁴

Sundon nato ang sumbanan nga gipakita sa propeta para kanato kabahin sa paghigugma sa templo.

5. Kita mahimong mabination, masinabtanon, ug mahigugmaon.

Si Presidente Monson talagsaon nga ehemplo sa paghigugma sa uban. Ang iyang tibuok pagpangalagad napuno sa pagbisita ngadto sa mga panimalay; pagpandong sa iyang mga kamot ngadto sa mga ulo ug paghatag og mga panalangin; paghimo og wala damhang mga tawag diha sa telepono aron sa paghupay ug pagdasig; pagpadala og sulat sa pagdasig, pagdayeg ug pasalamat; pagbisita sa mga ospital ug care center; ug paggahin og panahon sa pag-adto sa haya bisan sa busy kaayo nga iskedyul.

Sama sa buhaton sa Manluluwas, si Thomas Monson nagbuhat og kaayohan (tan-awa sa Mga Buhat 10:38) ug nagpanalangin ug naghigugma sa uban; kini ang nakapadasig sa iyang kinabuhi.

Usa ka talagsaong ehemplo sa kaayo ni Presidente Monson nahitabo niadtong 2012. Sa hapit na mahuman ang nindot kaayong Brigham City Utah Temple, nakigkita ko sa Unang Kapangulohan aron sa paghisgot sa mga plano sa pagpahunngod niini. Tungod kay ang Brigham City usa lang ka oras sa amihanan sa Siyudad sa Salt Lake, sayon lang unta ni Presidente Monson sa pagbiyahe didto aron sa pagpahunngod.

Hinoon, si Presidente Monson miingon, “Ang Brigham City mao ang lungsod nga natawhan ni Presidente Boyd K. Packer, kining talagsaon nga Apostol kinsa milingkod tupad nako sulod sa daghang katuigan diha sa Napulog Duha. Gusto nakong ihatag kaniya ang pasidungog ug panalangin sa pagpahunngod sa templo sa iyang lungsod nga natawhan. Mopalayo ko, ug i-assign nako si Presidente Packer sa pagpahunngod sa Brigham City Temple. Gusto nako nga iya na kining higayon.”

Usa kadto ka maanindot nga adlaw alang ni Presidente Packer ug Sister Packer, kinsa nagdako usab sa Brigham City. Natandog kaayo ko sa kamabination ug kamanggi-hatagon nga buhat ni Presidente Monson ngadto sa iyang kauban nga Apostol. Mamahimo kita nga sama niana. Kita makapakigbahin ug magmabination ug mas maghunahuna niadtong naglibut kanato.

Ang Sumbanan sa Propeta

Gitudloan kita ni Presidente Monson sa paagi sa pagpakabuhi sa atong kinabuhi pinaagi sa iyang talagsaon



Sama sa buhaton sa Manluluwas, si Presidente Monson nagbuhat og kaayohan ug nagpanalangin ug naghigugma sa uban; kini ang nakapadasig sa iyang kinabuhi.

ug makapadasig nga mga mensahe sa kinatibuk-ang komperensya. Gitudloan ta niya unsaon nga mahimong sumusunod ni Jesukristo pinaagi sa iyang talagsaon ug maanindot nga personal nga ehemplo. Sa pagkatinuod, ang Ginoo naghatag kanato og sumbanan sa tanan nga mga butang, ug usa sa mga sumbanan nga kinahanglan natong tinguhaon mao ang pagsunod sa atong minahal nga propeta.

Mopamatuod ko nga adunay Dios sa langit kinsa nakaila ug nahigugma kanato. Siya mihatag nato og propeta—aron sa paggiya kanato, sa pagtudlo kanato, ug sa pagdumala kanato niining ulahing mga adlaw. Nagtuo ko nga ang Ginoo nagdahum nga atong higugmaon ang propeta, paluyohan siya, ug mosunod sa iyang ehemplo.

Giisip nako nga dakong panalangin nga mabuhi sa panahon diin si Thomas S. Monson mao ang propeta sa Ginoo. Samtang kita mosunod kaniya ug maningkamot nga mahimong mas mahisama kaniya, molampus gyud kita nga mahimong mas matinud-anong mga disipulo ni Ginoong Jesukristo. ■

Gikan sa debosyonal sa Church Educational System nga gipamulong sa Brigham Young University–Idaho niadtong Mayo 5, 2013. Alang sa kompleto nga teksto sa Iningles, bisitaha ang lds.org/broadcasts.

MUBO NGA MGA SULAT

1. “Messages of Inspiration from President Monson,” *Church News*, Sept. 2, 2012, 2.
2. *On the Lord’s Errand* (DVD, 2008).
3. Thomas S. Monson, “Ang mga Panalangin sa Templo,” *Ensign* o *Liahona*, Okt. 2010, 19.
4. Thomas S. Monson, *Be Your Best Self* (1979), 56; emphasis gidugang.



Ang Pilipinas:

ESPIRITUHANONG
KALIG-ON DIHA
SA MGA PULO
SA DAGAT

*Sa mubong panahon
sa 53 ka tuig, ang
Simbahan nakasinati
og talagsaong kalig-on
ug paglambo sa Pilipi-
nas, nga nailhang
“Perlas sa Sidlakan.”*

Para kang Augusto A. Lim, ang mensahe nga gipresentar sa duha ka batan-ong misyonaryo gikan sa Estados Unidos maingon og mihaum sa mga baruganan nga iyang nasayran nga tinuod. Usa ka batan-ong abogado ug Kristiyano, gihatagan og gibug-aton ni Augusto nga ang mga doktrina sama sa padayon nga pagpadayag “mga butang nga bisan anaa ko sa high school ug sa kolehiyo, akong gituohan.”¹

Human sa pipila ka bulan, miuyon si Augusto sa pagtambong sa mga tulumanon sa Dominggo ug gidawat ang hagit sa pagbasa ug pag-ampo kabahin sa Basahon ni Mormon. “Gisugdan nako pagbasa og seryuso ang Basahon ni Mormon sa samang espiritu [nga atong batunan] nga gitambag kanato ni Moroni. Sa dihang gibuhit ni nako uban sa tinguha nga masayud kon kini tinuod—human sa pipila ka linya—nakabaton ko og pagpamatuod,” siya mihinumdom.²

Niadtong Oktubre 1964, si Augusto Lim nabunyagan ug nahimong usa ka pioneer sa Ang Simbahan ni Jesukristo sa mga Santos sa Ulahing mga Adlaw sa Pilipinas, uban sa iyang asawa ug pamilya nga nagpamiyembro sa wala madugay. Karon, human sa daghang dekada sa matinud-anong pagserbisyo sa Simbahan—nga naglakip sa tawag niadtong 1992 sa pagserbisyo isip General Authority, ang unang Pilipino nga nakaserbisyo nianang posisyon—si Brother Lim naghulagway sa hugot nga pagtuo ug dedikasyon sa gatusan ka liboang mga Santos sa Ulahing mga Adlaw nga nagpuyo sa “Perlas sa Sidlakan.”

Usa ka Tambok nga Yuta

Mga 550 ka tuig sa wala pa matawo si Jesukristo, ang Ginoo misaad ni propetang Nephi sa Basahon ni Mormon: “Ako nahinumdom niadto kinsa anaa diha sa mga pulo sa dagat,” ug “modala sa akong pulong ngadto sa mga katawhan, oo, bisan diha sa tanan nga mga nasud sa yuta” (2 Nephi 29:7). Alang sa daghang nakabasa niining pinili nga mga pulong, usa sa grupo sa “mga pulo sa dagat” nga mahunahunaan: mao ang Pilipinas.

Uban sa populasyon nga hapit na moabut og 100 ka milyon, ang Republika sa Pilipinas usa ka dako nga arkipelago nga adunay mga 7,100 ka mga isla nga nahimutang sa habagatang-silangang baybayon sa Asya. Kini matahum nga tropikal nga nasud nga gipamuy-an sa mahigalaon, madasigon, ug mapainubsanong katawhan. Apan ang nasud kalagmitan adunay linog, bagyo, pagbuto sa bulkan, tidal waves, ug uban pang natural nga mga kalamidad ug nag-antus sa daghang socioeconomic nga mga problema. Ang malukpanon nga kakabus mao ang usa sa nagbalik-balik nga hagit, ug ang mga Filipino nakalahutay sa daghang panahon sa kahuyang sa politika ug ekonomikanhong krisis.

Apan kadtong pamilyar sa mga pamaagi sa Ginoo, ang Pilipinas tambok nga yuta alang sa pagtanom sa mga liso sa ebanghelyo. Lakip sa Tagalog ug ubang lumad nga mga pinulongan, daghang Filipino ang makasulti og Iningles, nga usa usab ka nasyonal nga pinulongan. Tungod sa dugayng panahon nga pagdumala sa Katsila, sobra sa 90 porsyento sa populasyon mga Kristiyano; dakong bahin sa minoridad mga Muslim.



Nagtukod diha sa mga baruganan sa ebanghelyo, ang mga young adult sa Pilipinas nakakab-ot og kalampusan ug nahimong lig-on nga mga lider sa Simbahan sa Ginoo.

Ang unang pagsulay sa pagpaila sa Simbahan sa Pilipinas nahitabo niadtong 1898 atol sa Gubat sa Katsila ug Amerikano pinaagi nila ni Willard Call ug George Seaman, mga sundalo nga Santos sa Ulahing mga Adlaw gikan sa Utah kinsa gi-set apart isip mga misyonaryo sa wala pa sila molarga. Sa dihang aduna nay mga oportunidad, ilang gisangyaw ang ebanghelyo, apan walay nagpabunyag.

Panahon sa Ikaduhang Gubat sa Kalibutan, pipila ka mga Santos sa Ulahing mga Adlaw mibalhin sa mga isla kauban ang mga Allied forces. Niadtong 1944 ug 1945, ang mga grupo sa militar nagpahigayon og mga miting sa Simbahan sa daghang mga dapit, ug daghang mga militar ug mga kawani niini nga miyembro sa LDS nagpabilin sa Pilipinas sa dihang natapos ang gubat. Lakip kanila mao si Maxine Tate ug ang bag-ong kinabig nga si Jerome Horowitz. Silang duha mipaila-ila sa ebanghelyo ngadto kang Aniceta Fajardo. Samtang nagtabang sa pagtukod og balik sa balay ni Aniceta sa gibombahan nga dapit sa Manila, mipakigbahin si Brother Horowitz sa iyang bag-ong nakaplakan nga tinuohan kang Aniceta ug sa iyang anak nga babaye, si Ruth.

Nakabaton og pagpamatuod si Aniceta ug nagtinguha nga mabunyagan, apan ang Simbahan wala motugot og mga bunyag alang sa mga Filipino nianang higayona tungod kay walay permanente nga unit sa Simbahan sa mga isla. Si Elder Harold B. Lee (1899–1973) sa Korum sa Napulog Duha ka mga Apostoles nahibalo sa tinguha ni Aniceta, ug sa iyang kapasidad isip chairman sa General Servicemen's Committe, giaprubahan ni Elder Lee ang bunyag

ni Aniceta. Sa buntag sa Pasko sa Pagkabanhaw niadtong 1946, si Aniceta Fajardo gibunyagan ni serviceman Loren Ferre ug karon giila nga unang naila nga Filipino nga namiyembro sa Ang Simbahan ni Jesukristo sa mga Santos sa Ulahing mga Adlaw.

Ang Pagsugod sa Misyonaryo nga Buhat

Human sa gubat, mga grupo sa miyembro sa Simbahan giorganisar diha sa duha ka US military base—Clark Air Base ug Subic Bay Naval Base—samtang ang mga miyembro nga militar naghinam-hinam sa pag-establisar og pormal nga presensya sa Simbahan sa Pilipinas. Niadtong Agosto 21, 1955, si Presidente Joseph Fielding Smith (1876–1972) mipahinungod sa Pilipinas alang sa pagsangyaw sa ebanghelyo. Hinoon, ang legal nga mga restriksyon nakapalangay sa pag-abut sa mga misyonaryo hangtud 1961.

Niadtong 1960, si Elder Gordon B. Hinckley (1910–2008), niadtong higayuna usa ka Assistant ngadto sa Korum sa Napulog Duha ka mga Apostoles, mibisita sa Pilipinas sulod sa pipila ka adlaw: “Akong gipahayag ang akong pagtuo nga ang misyonaryo nga buhat mahimong . . . sama ka mabungahon sama sa nahitabo sa ubang mga dapit sa kalibutan.”³ Pagkasunod tuig, human sa daghang pagpangandam ug mga papeles nga giandam sa mga miyembro sama nila ni Maxine Tate Grimm ug Presidente Robert S. Taylor sa Southern Far East Mission ingon man usab sa mga higala nga dili miyembro sa Simbahan, si Elder Hinckley mibalik sa isla aron sa pagpahinungod pag-usab sa Pilipinas alang sa pagsugod sa misyonaryo nga buhat.

Niadtong Abril 28, 1961, sa hilit nga dapit sa Manila, nakighimamat si Elder Hinckley sa gamayng grupo sa mga miyembro nga sundalo, mga lumulupyong Amerikano, ug usa ka miyembro nga Filipino—si David Lagman—ug mihalad og espesyal nga pag-ampo “nga liboan ang modawat niining mensahe ug sa ingon mapanalanginan.”⁴ Kadtong mga pulonga, nga gipamulong sa matinud-anong sulugoon sa Ginoo, sa wala madugay nahimo nga propetikanhon.

Ang unang upat ka misyonaryo—sila si Raymond L. Goodson, Harry J. Murray, Kent C. Lowe ug Neste O. Ledesma—miabut sa Manila pipila ka semana ang milabay. “Ang mga Filipino andam kaayong midawat sa ebanghelyo,” misulat si Elder Lowe. “Kon ang pangulo sa pamilya magpamiyembro sa Simbahan, kasagaran gayud, ang tibuok pamilya magpamiyembro sa Simbahan.”⁵

Ang Simbahan Nag-uswag

Ang buhat nagpadayon hangtud ang Philippines Mission naorganisar niadtong 1967. Sa pagtapos nianang tuiga, adunay 3,193 ka mga miyembro sa mission, 631 kanila nakabig nianang tuiga. Pagka-1973 ang Simbahan sa Pilipinas mitubo ngadto sa hapit sa 13,000 ka mga miyembro. Niadtong Mayo 20, 1973, ang Manila Philippines Stake namugna, uban ni Augusto A. Lim isip presidente. Niadtong 1974 ang mission gitunga, nagmugna sa Philippines Manila Mission ug Philippines Cebu City Mission.

Niadtong Agosto 1975, si Presidente Spencer W. Kimball (1895–1985) mibisita sa Manila aron sa pagdumala sa unang komperensya sa area sa Pilipinas. Ang Agosto buwan sa ting-ulan, mas nakapalisud sa pagbiyahe niadtong



1898: Duha ka LDS nga sundalo nagsangyaw sa ebanghelyo sa Pilipinas atol sa Gubat sa Katsila ug Amerikano

1944–45: Mas daghang mga sundalo nga LDS nagsangyaw panahon sa Ikaduhang Gubat sa Kalibutan

Mga Panalangin sa Templo

Niadtong Disyembre 1980, gipadala ni Presidente Spencer W. Kimball ang direktor sa real estate department sa Simbahan ngadto sa Manila aron sa pagpangita og tukmang dapit alang sa templo. Human sa pagkonsiderar og pipila ka dapit, ang direktor misumiter og hangyo sa pagpalit og 3.5 acres (1.4 ha) sa Siyudad sa Quezon. Ang napiling dapit nagdung-aw sa Walog sa Marikina, ug ang lokasyon dali nga adtuon sa mga miyembro sa Simbahan. Ang hangyo giaprubahan, ug ang luna napalit niadtong Enero 1981. Ang pangalan sa dalan giilisan og Temple Drive sa hangyo sa Simbahan.

Sa seremonya sa groundbreaking niadtong Agosto 25, 1982, bisan pa sa hulga sa bagyo, mga 2,000 ka mga miyembro sa Simbahan nagpundok gikan sa lain-laing bahin



1955: Si Presidente Joseph Fielding Smith mipahinungod sa Pilipinas alang sa pag-sangyaw sa ebanghelyo

gikan sa gawas sa Manila. Usa ka bus nga puno sa mga Santos gikan sa Siyudad sa Laoag hapit dili na makaabut, apan giduot sa mga Santos ang ilang sakyanan gikan sa grabeng lapok ug mihangyo sa drayber nga dili mobalik. Laing grupo sa mga Santos maisugong gitabok ang unu-song kadagatan sulod sa tulo ka adlaw tungod kay ang pinakamahinungdanong butang, sama sa giingon sa usa ka sister, mao ang makakita ug makadungog sa buhi nga propeta sa Dios.

Mibisita pag-usab si Presidente Kimball sa Pilipinas niadtong 1980 aron sa pagdumala sa laing komperensya sa area, ug iyang nahimamat og kadiyot ang Presidente sa Pilipinas nga si Ferdinand Marcos. Kini nga miting ang nakapahimo sa Simbahan sa pag-abli sa missionary training center sa Pilipinas niadtong 1983 ug sa pagpahinungod sa Manila Philippines Temple pagkasunod tuig. Niadtong 1987 ang Philippines/Micronesia Area giestablisar nga ang puno-ang buhatan anaa sa Manila.

Mga pinili gikan sa Basahon ni Mormon gihubad sa Tagalog niadtong 1987. Ang paghubad sa Basahon ni Mormon anaa karon sa daghang pinulongan sa Pilipinas, lakip ang Cebuano.

sa mga isla sakay sa barko, tren, ug bus. Sa wala madugay gisugdan ang pagtukod sa templo, ug andam na kining ipahinungod sa Agosto 1984.

Dul-an sa 27,000 ka mga miyembro ug dili miyembro ang nag-tour sa templo sa wala pa kini gipahinungod. Miadto sila bisan pa sa duha ka bagyo—mga 48 lang ka oras ang gintang—nga migun-ob sa Pilipinas sa pipila ka adlaw sa wala pa ang pagpahinungod. Ang mga Santos nga gikan sa lagyong mga probinsya miabut nga gikapoy apan malipayon. Kadaghanan kanila napugos sa pag-agi sa nag-tuyok-tuyok nga rota sa Manila tungod kay ang mga dalan gibaha ug ang mga taytayan nadaot tungod sa pag-apaw sa mga suba.

Ang kanindot sa templo nakapadayeg sa mga bisita, lakip sa daghang inila nga mga Filipino. Ang tigsulat nga si Celso Carunungan mikomentaryo kabahin “sa pagbati sa kabalaan, nga kon mosulod mo mahimamat ninyo ang inyong Tiglalang.” Si Kolonel Bienvenido Castillo, labaw nga pari sa Philippine Constabulary, miingon nga ang templo mao ang “dapit diin kamo mamalandong sa langit-nong mga butang tungod kay kamo anaa niini nga palibut.” Duha ka madre mibati nga ang templo “mao gayud ang



balay sa Ginoo.” Si Eva Estrada-Kalaw, usa ka miyembro sa Philippine parliament, misulti sa mga tiggiya, “Nanghinaut ko nga motukod pa mo og daghang mga templo dinhi.”⁶

Si Presidente Hinckley, Ikaduhang Magtatambag sa Unang Kapangulohan niadtong higayona, nangulo sa mga serbisyo sa pagpahimutang sa bato sa pamag-ang niadtong Martes, Septyembre 25, 1984. Siyam ka mga sesyon sa pagpahinungod ang misunod, gipahigayon sa celestial room. Mga 6,500 ka mga Santos gikan sa 16 ka stake ug 22 ka district sa Pacific Area mitambong sa lain-laing mga sesyon.

Sa dihang nahuman ang katapusan nga sesyon sa pagpahinungod, Sila si Paulo V. Malit Jr.

negosyante kinsa miadto ug gipamaligya ang tanan aron lang makapalit og usa ka perlas nga labing bililhon (tan-awa sa Mateo 13:45–46), kining magtiayon mihukom sa pagbaligya sa ilang balay aron makabayad sa biyahe aron sila ug ang ilang mga anak mabugkos isip usa ka mahangturong pamilya. Human mabaligya ang ilang balay ug kadaghanan sa ilang kabtangan, nakahimo sila sa pagtigum sa eksaktong kantidad nga ikabayad sa plite sa barko padulong sa Manila alang sa ilang pamilya nga may siyam ka sakop. Nabalaka si Leonides kay wala na silay balay nga kabalikan. Apan gipaniguro ni Bernardo nga ang Ginoo mosangkap. Nabugkos sila isip pamilya alang sa karon ug hangtud

1961: Ang Pilipinas opisyal nga nabuksan para sa misyonaryo nga buhat; ang unang upat ka mga misyonaryo miabut

1967: Ang Philippines Mission naorganisar



1973: Ang Manila Philippines Stake namugna

1974: Ang Philippines Mission gibahin, nagmugna sa Philippines Manila ug Philippines Cebu City Mission

1975: Unang area conference, gipahigayon sa Manila

1983: Ang missionary training center gibablihan sa Manila



ug Edna A. Yasona mao ang unang paris nga gikasal sa Manila Philippines Temple, niadtong Septyembre 27, 1984. Ang unang presidente sa templo, nga si W. Garth Andrus, mipahigayon sa seremonya sa kaminyoon.

Daghan kaayong mga miyembro sa Simbahan ang naglina aron makadawat sa ilang mga endowment, nagsugod sa mga ordinance worker. Ang buhat diha sa templo nagpadayon sa tibuok gabii hangtud sa sunod nga adlaw.

Ang mga miyembro mibati og dugang tinguha sa pagsulod sa templo. Kadtong nagpuyo layo sa Manila kinahanglan nga mag-sakripisyo og maayo sa pagbiyahe og lagyong distansya sakay og barko o bus. Bisan pa man moadto sila ug magdala og mga istorya sa hugot nga pagtuo ug determinasyon.

Para kang Bernardo ug Leonides Obedoza sa General Santos, ang pag-adto sa templo nga layo ang Manila daw imposible. Apan sama sa

Usa ka miting sa Relief Society kabahin sa pagpa-ngandam sa emerhensiya naghatag og bililhon nga impormasyon alang sa mga sister kinsa nagpuyo sa usa ka nasud nga kanunayng nagsagubang sa natural nga mga kalamidad.



sa kahangturan sa templo niadtong 1985. Angay ra gyud sa matag sakripisyo nga ilang gihimo, kay sa templo ilang nakapalagan ang dili matandi nga kalipay—ilang bililhon nga perlas. Ug natinuod ang mga pulong ni Bernardo, ang Ginoo mi-sangkap. Sa ilang pagpauli gikan sa Manila, ang mabinationg mga kaila mihatag kanila og dapit nga kapuy-an. Ang ilang mga anak nakahuman sa ilang pag-eskwela, ug sa katapusan ang pamilya nakapalit og bag-ong balay sa laing dapit.

Niadtong Abril 18, 2006, ang Unang Kapangulohan mipahibalo sa pagtukod sa Cebu City Philippines Temple. Sa pagkadungog sa balita, daghang mga miyembro sa Simbahan mihilak sa kalipay. “Kami napanalangin tungod kay ang Ginoo mipili sa Cebu City nga mao ang dapit sa sunod nga templo,” miingon si Cesar Perez Jr., direktor sa Cebu City Institute of Religion.

PAGTUBO SA MGA MIYEMBRO SA SIMBAHAN SA PILIPINAS



Sumada sa Gidaghanon sa Miyembro sa Simbahan: 675,166*

Mga Ward ug mga Branch: 1,134

Mga Misyon: 17

Mga Templo: 2 (adunay usa pa nga gitukod)

Mga Sentro sa Family History: 167


* *Kutob sa Septyembre 2013*



1984: Ang Manila Philippines Temple gipahinungod



1987: Ang Philippines/Micronesia Area naestablisar, nga ang punoang buhatan anaa sa Manila



1987: Mga seksyon sa Basahon ni Mormon gihubad ngadto sa Tagalog



2010: Ang Cebu City Philippines Temple gipahinungod

Pipila ka bulan human sa pagpahinungod sa Cebu City Philippines Temple, ang mga Filipino nga mga Santos sa Ulahing mga Adlaw aduna na usab laing rason sa paglipay. Niadtong Oktubre 2, 2010, atol sa iyang pangbukas nga pakigpulong sa kinatibuk-ang komperensya, si Presidente Thomas S. Monson mipahibalo sa pagtukod sa Urdaneta Philippines Temple, sa Pangasinan.

Ang Labing Maayo Moabut Pa

Ang Simbahan ni Jesukristo sa mga Santos sa Ulahing mga Adlaw sa Pilipinas medyo bag-o bag-o pa kon itandi ngadto sa ubang mga nasud, apan ang padulngan niini sa isla nga nasud mahimayaon. Ang pagtubo sa Simbahan talagsaon kaayo, ug ang labing maayo moabut pa. Si Elder Michael John U. Teh sa Seventy, ang ikaduha nga Pilipino nga gitawag sa pagserbisyo isip General Authority, miingon, “Kita [Pilipino nga mga Santos sa Ulahing mga Adlaw] kinahanglang mangandam sa espirituhanong paagi kay sa kaniadto tungod kay ang buhat magpadayon motabang man kita o dili.”⁷

Sa pagkatinuod, samtang ang ika-21 nga siglo

nagpadayon, ang gipahiuli nga Simbahan magpadayon sa pagtubo sa gidaghanon ug impluwensya samtang nagkadaghan ang mga Filipino nga midawat sa mensahe niini ug nahimong panalangin niining pinili nga mga tawo sa mga pulo sa dagat. Para kang Elder Teh ug sa mga Filipino nga Santos, ang “daghan . . . mga saad sa Ginoo ngadto kanila kinsa anaa sa mga pulo sa dagat” (2 Nephi 10:21) sa karon natuman. ■

MUBO NGA MGA SULAT

1. Augusto A. Lim, sa R. Lanier Britsch, “Faithful, Good, Virtuous, True’: Pioneers in the Philippines,” *Ensign*, Ago. 1997, 60; *Liahona*, Feb. 1998, 44.
2. Augusto Lim, sa Gelene Tobias, “Augusto Lim: The Man of Many Firsts,” countrywebsites.lds.org/ph/index.php/datetime-philippines/jubilee-2011.
3. Tan-awa sa Sheri L. Dew, *Go Forward with Faith: The Biography of Gordon B. Hinckley* (1996), 213–15.
4. Gordon B. Hinckley, “Commencement of Missionary Work in the Philippines,” *Tambuli*, Abr. 1991, 18.
5. Interbyu ni Kent Clyde Lowe pinaagi ni James Neil Clark, Sept. 3, 2007.
6. Francis M. Orquiola, “Temple Dedication Rewards Faith of Filipino Saints,” *Ensign*, Nob. 1984, 107.
7. Michael John U. Teh, “Scriptures and Spiritual Preparation” [Area Presidency Messages, Mayo 2011]; lds.org/ph/index.php/literature.



PLANO SA KALUWASAN

Paggamit sa sa Pagtubag sa mga Pangutana

Ni LaRene Porter Gaunt

Mga Magasin sa Simbahan

KINABUHI SA WALA PA DINHI SA YUTA

Kita nagpuyo sa usa ka mahinamong panahon. Ang gipahiuli nga ebanghelyo ni Jesukristo pagawas na “gikan sa kangiub” (D&P 1:30). Isip resulta, mas daghang anak sa Langitnong Amahan kinsa dili sakop sa atong tinuohan ang nakadungog kabahin sa “mga Mormons.” Ang pipila nakadungog og mga butang nga mora og lahi ug makalibug. Ang uban nakadungog og mga butang nga gibati nila nga pamilyar ug makahupay. Ang mga indibidwal gikan sa bisan hain nga grupo mahimong modangup kanato sa pagpangita og mga tubag sa ilang mga pangutana. Daghang tubag ang makaplagan sa plano sa kaluwasan, nga nailhan usab nga “mahinungdanon nga laraw sa kalipay” (Alma 42:8).

PAGLALANG

ANG TABIL

Ang labing labing komon nga pangutana mao ang “Asa ko gikan?” “Nganong ania ko dinhi?” ug “Asa ko paingon human niini nga kinabuhi?” Kini nga mga pangutana matubag sa kama-tuoran nga makaplagan diha sa plano sa kaluwasan. Kini nga artikulo nagpakigbahin sa pipila sa mga tubag sa kasulatan ug sa atong propeta, si Presidente Thomas S. Monson, kabahin niining mga pangutanaha.

MORTALIDAD

*Hugot nga Pagtuo
diha kang Jesukristo*

Paghinulsol

Asa ko gikan?

Kita mahangturong mga binuhat. Kita nagpuyo uban sa Dios sa wala pa kining kinabuhia isip Iyang espiritung mga anak. “Si Apostol Pablo [mitudlo] nga ‘kaliwat man diay kita sa Dios’ [Mga Buhat 17:29],” miingon si Presidente Monson. “Tungod kay nasayud ta nga ang atong pisikal nga lawas kaliwat sa atong mortal nga ginikanan, atong pangitaon ang kahalugan sa pamahayag ni Pablo. Ang Ginoo mipahayag nga ‘ang espiritu ug ang lawas mao ang kalag sa tawo’ [D&P 88:15]. Sa ingon ang espiritu kaliwat sa Dios. Ang magsusulat sa Hebreohanon nagtawag Kaniya nga ‘ang Amahan sa mga espiritu’ [Mga Hebreohanon 12:9].”¹

Nganong ania ko dinhi?

Kabahin sa atong kinabuhi dinhi sa yuta, si Presidente Monson miingon: “Magpasalamat kita nga usa ka maalamon nga Tiglalang mibuhat sa kalibutan ug mihimo nato nga makalimot sa kanhi kinabuhi aron makasinati kita og panahon sa pagsulay, oportunidad sa pagmatuod sa atong kaugalingon, aron mokwalipay sa tanan nga giandam sa Dios nga atong dawaton.

“Tataw, usa sa katuyoan sa atong pagkatawo dinhi sa kalibutan mao ang pag-angkon og lawas sa unod ug bukog. Gihatagan usab kita og gasa sa kabubut-on. Sa liboan ka mga paagi duna tay pribelihiyo sa pagpili alang sa atong mga kaugalingon. Dinhi atong makat-unan gikan sa malisud nga kasinatian. Makaila kita tali sa maayo ug dautan. Makasulti kita sa kalainan tali sa pait ug tam-is. Nakadiskobre kita nga adunay sangputanan sa atong mga aksyon.”²

Asa ko paingon human niini nga kinabuhi?

Ang kamatayon moabut sa tanang mga miyembro sa tawhanong pamilya. Apan “kong ang tawo mamatay, mabuhi ba siya pag-usab?” (Job 14:14). “Kita nasayud nga ang kamatayon dili ang katapusan,” miingon si Presidente Monson. “Ang kamatuoran gitudlo na sa buhing mga propeta sa tibuok kapanahonan. Kini usab makita sa atong balaang kasulatan. Sa Basahon ni Mormon atong mabasa ang piho ug makapahupay nga mga pulong:

‘Karon, mahitungod sa kahimtang sa kalag tali sa kamatayon ug sa pagkabanhaw—Tan-awa, kini gipahibalo ngari kanako pinaagi sa usa ka anghel, nga ang espiritu sa tanan nga mga tawo, sa diha-diha nga sila

*Kon kita o ang
uban adunay
mga pangutana
mahitungod sa
ebanghelyo ni
Jesukristo, kahi-
balo ba ta asa
mangita sa mga
tubag?*

*Paglahu-
tay hang-
tud sa
katapusan*

Bunyag

Gasa sa Espiritu Santo

**ASA PA KO DUGANG
MAKAKAT-ON KABAHIIN SA
PLANO SA KALUWASAN?**

1. Ang plano sa kaluwasan klaro kaayong gitudlo diha sa Basahon ni Mormon, Doktrina ug mga Pakig-saad, ug sa Perlas nga Labing Bililhon.
2. Ang mga pulong sa buhing mga propeta mabasa sa conference.lds.org. Makasiksik mo sa mga pulong sama sa plano sa kaluwasan, plano sa kalipay, pag-ula, kahimayaan, kaangayan ug kalooy, paghinulsol, ug pagkabanhaw.
3. Tan-awa sa “Leksyon 2: Ang Plano sa Kaluwasan” sa kapitulo 3 sa *Isangyaw ang Akong Ebanghelyo: Usa ka Giya sa Misyonaryo nga Pagserbisyo*.

mobiya gikan niining mortal nga lawas, oo, nga ang mga espiritu sa tanan nga mga tawo, bisan sila maayo o dautan, dad-on sa panimalay ngadto niana nga Dios kinsa mihatag kanila sa kinabuhi.

‘Ug unya mahinabo, nga ang mga espiritu niadto kinsa mga matarung pagadawat ngadto sa kahimtang sa kalipay, diin gitawag og paraiso, usa ka kahimtang sa kapahulayan, usa ka kahimtang sa kalinaw, diin sila mopahulay gikan sa tanan nila nga mga kasamok ug tanan nga kabalaka, ug kasubo.’ [Alma 40:11–12].”³

Human kita mabanhaw, moadto kita sa celestial nga gingharian nga adunay himaya sama sa adlaw, ang terrestrial nga gingharian nga adunay himaya sama sa buwan o sa telestial nga gingharian nga adunay himaya sama sa mga bitoon, o sa kawanangan sa kangitngit (tan-awa sa D&P 76).

Aduna ba gayud Dios? Tinuod ba gyud si Satanas?

Ang Langitnong Amahan, si Jesukristo, ug si Satanas kabahin sa dakong Konseho sa Langit nga gipahigayon sa wala pa kita matawo. Isip kabahin sa plano sa kaluwasan, ang Langitnong Amahan mihangyo og usa ka binuhat nga moadto sa yuta ug mo-ula sa atong mga sala. Siya miingon: “Kang kinsa Ako mopadala? Ug ang usa [Jesukristo] mitubag sama sa Anak sa Tawo: Ania ako, ipadala ako. Ug ang lain [Satanas] mitubag ug miingon: Ania ako, ipadala ako. Ug ang Ginoo miingon: Ako mopadala sa una.

“Ug ang ikaduha [Satanas] nasuko, ug wala mopuyo sa kinabuhi nga wala pa dinhi sa yuta; ug, niana nga adlaw, daghan ang misunod kaniya” (Abraham 3: 27–28; tan-awa usab sa D&P 29: 36–37; Moises 4: 1–4).

Anaa ba kanato ang gahum sa pagbuntog sa mga tintasyon ni Satanas?

Ang ikatulong bahin sa mga espiritu kinsa mipili nga mosunod kang Satanas human sa Konseho sa Langit gisalikway uban kaniya. Sila ug si Satanas nagpabilin nga mga espiritu nga walay pisikal nga lawas. Si Propeta Joseph Smith mitudlo: “Ang tanang mga tawo kinsa adunay mga lawas adunay gahum niadtong wala.”⁴ Sa ingon si Satanas makatintal nato, apan kita adunay gahum sa pagbatok.

Nganong usahay ang Langitnong Amahan daw dili motubag sa akong mga pag-ampo?


“Ang pag-ampo mao ang lihok diin ang kabubut-on sa Amahan ug ang kabubut-on sa anak magkasabut sa usag usa. Ang katuyoan sa

*Kawanangan sa
Kangitngit*

KAMATAYON

KALIBUTAN SA ESPIRITU





PAGHUKOM

CELESTIAL

TERRESTRIAL

TELESTIAL

pag-ampo dili sa pag-usab sa kabubut-on sa Dios” (Bible Dictionary, “Prayer”). Ang pag-ampo usa ka himan nga makatabang kanato sa paghukom kon ang atong kabubut-on nahuyon sa kabubut-on sa Dios (tan-awa sa Abraham 3:25). Ang Langitnong Amahan kanunay motubag sa atong mga pag-ampo, apan kining mga tubag moabut sa porma nga oo, dili, o dili pa. Ang tayming importante.

Nganong aduna man koy mga hagit kon naningkamot ko nga magpuyo og maayong kinabuhi?

Ang mga hagit kabahin sa plano sa kaluwasan. Kini makapalig-on, makapalimpyo ug makapalunsay nato samtang kita mosalig ni Jesukristo ug sa Iyang ebanghelyo. Ang Langitnong Amahan nagsuporta kanato panahon sa atong mga hagit. Ang atong mga pagsulay “makahatag [kanato] og kasinatian, ug alang sa [atong] kaayohan” (D&P 122:7).

Unsaon nako pagkahibalo kon unsa ang husto ug sayop?

Ang tanang mga anak sa Dios natawo uban sa Kahayag ni Kristo, nga makatabang kanato nga “masayud sa maayo gikan sa dautan” (Moroni 7:16). Dugang pa, ang Espiritu Santo makasaksi kanato sa kamatuoran sa atong hunahuna ug kasingkasing uban sa mga pagbati sa kalinaw ug kainit (tan-awa sa D&P 8: 2–3).

Mapasaylo ba ko kon ako nakahimo og seryoso nga mga sala?

Ang Dios nasayud nga kitang tanan makasala samtang kita nagkat-on sa pagpili tali sa husto ug sayop.⁵ Ang tanang mga sala, bisan pa niana, adunay silot nga kauban niini. Ang kaangayan mosukna nga ang silot pagaantuson. Sa Iyang kalooy, ang Langitnong Amahan mitugot ni Jesukristo sa pagpahigayon sa Pag-ula ug sa pagtubag sa gisukna sa kaangayan alang kanatong tanan (tan-awa sa Alma 42). Sa laing pagkasulti, ang pag-antus ni Kristo sa Getsemani ug ang kamatayon sa Golgota mibayad sa bili sa atong mga sala kon atong pahimuslan ang Pag-ula ni Jesukristo pinaagi sa paghinulsol ug pagdawat sa mga ordinansa sa ebanghelyo. Ang atong mga sala mapasaylo (tan-awa sa D&P 1:31–32). ■

MUBO NGA MGA SULAT

1. Thomas S. Monson, “Ang Lumba sa Kinabuhi,” *Ensign* o *Liahona*, Mayo 2012, 91; tan-awa usab sa Abraham 3:22–26.
2. Thomas S. Monson, “Ang Lumba sa Kinabuhi,” 91–92; tan-awa usab sa Alma 34:32–34.
3. Thomas S. Monson, “Ang Lumba sa Kinabuhi,” 93; tan-awa usab sa Doktrina ug mga Pakigsaad 76:59–111.
4. *Mga Pagtulun-an sa mga Presidente sa Simbahan: Joseph Smith*, (2007), 253.
5. Ang gagmayng mga bata dili makasala “hangtud nga sila magsugod nga mahimo nga adunay tulubagon” (tan-awa sa D&P 29:46–47).

GIUNSA NILA PAGKAHIBALO?

Si Presidente Dieter F. Uchtdorf, Iskaduhang Magtatambag sa Unang Kapangulohan, mihatag og mensahe ngadto sa mga sister sa Relief Society atol sa 2011 nga kinatibuk-ang miting sa Relief Society nga nakatandog sa akong kasingkasing ug nakahatag kanako og kalinaw. Namulong siya mahitungod sa gagmayng mga bulak nga forget-me-not ug sa unsang paagi nga ang lima ka gihay sa bulak [petals] nagrepresentar sa lima ka butang nga kinahanglan natong hinumduman kanunay.¹

Human sa miting ang akong anak nga babaye si Alyssa misulti kanako sa istorya mahitungod sa iyang higala nga si Jessie, kinsa adunay gamay nga negosyo sa catering. Si Jessie gihangyo sa iyang mga lider sa Relief Society sa stake sa paghimo og dessert nga ipakaon human sa kinatibuk-ang miting sa Relief Society.

Ang mga cupcake andam na, apan nagpadala si Jessie og litrato niini sa usa ka paryente kinsa miingon nga dili kaayo kini nindot para sa miting sa Relief Society.

Si Jessie miingon ni Alyssa nga siya diha-diha dayon nasayud unsa ang andamon—250 ka cupcake. Si Alyssa miboluntaryo sa pagdala sa mga cupcake ngadto sa stake center.

Miabut ang adlaw sa miting, ug sa dihang si Alyssa miadto aron motabang, iyang nakita si Jessie nga hapit naghilak. Ang mga cupcake andam na, apan nagpadala si Jessie og litrato niini sa usa ka paryente kinsa miingon nga dili kaayo kini nindot para sa miting.

Si Jessie nagsugod sa pagduha-duha sa iyang kaugalingon. Naghunahuna siya nga ang mga lider sa Relief Society sa stake nagpaabut og usa ka butang nga mas nindot kay sa iyang yano nga mga cupcake. Nataranta na siya sa paghunahuna kon unsaon sa pagpanindot og maayo sa mga cupcake, apan wala nay panahon. Gidala niya ug ni Alyssa ang mga cupcake nga

wala usaba, nga mibati si Jessie nga napakyas niya ang mga sister—hangtud namulong si Presidente Uchtdorf.

Samtang siya namulong sa gagmayng forget-me-not nga bulak, usa ka litrato sa gamay nga asul nga bulak gipakita sa screen. Yano kaayo kini nga bulak apan nindot kaayo uban sa maanyag nga mga gihay niini. Ang mensahe ni Presidente Uchtdorf nakatandog sa kasingkasing sa tanan samtang mihangyo siya kanato nga dili kaayo malinga sa dagkong dili kasagarang pagpamukhad sa atong palibut nga kita makalimot sa lima ka yano apan importanting kamatuoran nga iyang gitudlo kanato.

Human sa panapos nga pag-ampo, ang mga sister misulod na sa cultural hall. Sa dihang si Alyssa ug si Jessie misulod, ilang nakita ang tanan nga naglibut sa lamesa sa dessert ug nangutana, “Giunsa nila pagkahibalo?”

Ang kada cupcake gibutangan og yano nga puti nga icing ug giadornohan og yano, matahum, nindot, lima ka gihay sa bulak nga forget-me-not. ■
Gale Ashcroft, Arizona, USA

MUBO NGA SULAT

1. Tan-awa sa Dieter F. Uchtdorf, “Ayaw Ko Paghikalimti,” *Ensign o Liahona*, Nob. 2011, 120.



ANG SAAD NAGHATAG KANAKO OG PAGLAUM

Sa wala madugay human ang akong bana ug ako naminyo, napanalanginan mi og usa ka anak nga lalaki. Sa dihang akong nakita ang iyang pahiyom ug mitan-aw sa iyang mga mata, mibati ko nga utangan sa Langitnong Amahan. Ang among anak ingon og hingpit para kanako. Ang akong bana ug ako nagpasalamat sa Ginoo matag adlaw alang niining bililhon nga gasa.

Niadtong Pebrero 19, 2009, nagimpaki ko aron sa pagpangandam sa akong pag-eskwela og balik para sa akong katapusang tuig sa klase. Ang akong bana ug ako wala masayud nga sa sunod nga adlaw ang among pinalangga nga anak mahilantan ug mobiya niining mortal nga kinabuhi.

Lisud kadto nga kasinatian para nako nga antuson. Ang mga miyembro sa among ward miadto sa among balay aron sa paghupay namo gamit ang mga kasulatan ug mga himno ug sa pag-ampo uban namo. Nagpasalamat ko sa ilang manggiloy-ong paha-subo, apan nagpadayon ang akong kasubo alang sa akong anak nga lalaki. Kon maghunahuna ko niya, ang akong mga mata mapuno sa luha.

Upat ka adlaw human sa iyang kamatayon, nadasig ko sa pagtuon sa *Mga Pagtulun-an sa mga Presidente sa Simbahan: Joseph Smith*. Samtang akong gikuptan ang basahon, nabukhad kini ngadto sa kapitulo nga giulohan og “Mga Pulong sa Paglaum ug Kahupayan sa Panahon sa Kamatayon.” Gisugdan nako sa pagbasa ug natandog kaayo sa grabeng kasubo nga nasinati nila ni Joseph ug Emma sa dihang nagsugod sila og pamilya. Sa dihang nabasa nako ang kinutlo gikan sa usa ka pakigpulong sa Propeta nga gihatag sa haya sa usa ka dos anyos nga batang babaye, nakapahupay gyud ni nako og maayo.

Gitawag nako akong bana. Kaming duha nagbasa: “Ako . . . nangutana

sa pangutana, ngano nga ang mga masuso, inosente nga mga bata, gipanguha gikan kanato. . . . Daghan ang gikuha sa Ginoo, bisan pa gani sa pagkamasuso, aron sila makaikyas . . . sa mga kagul-anan ug mga kadautan niining kalibutan karon; hilabihan ra kaayo sila ka putli, hilabihan ka matahum, aron mopuyo sa yuta; busa, kon hunahunaon sa husto, imbis magbangutan adunay kita’y katarungan sa pagmaya kay gilikay sila gikan sa dautan, ug ato ra sila nga maangkon pag-usab.”

Ang Propeta midugang: “Usa ka pangutana ang tingali ikapangutana— ‘Maangkon ba sa mga inahan ang ilang mga anak didto sa kahangturan?’ Oo! Oo! Mga inahan, maangkon ninyo ang inyong mga anak; kay makabaton sila og kinabuhing dayon, tungod kay nabayaran na ang ilang utang.”¹

Sukad among nabasa kadtong nindot nga mga pulong, ang among

mga pag-ampo sa pamilya nahimong puno sa pasalamat alang sa saad nga pinaagi sa Pag-ula ni Jesukristo makauban namo pag-usab ang among anak.

Karon kami adunay tulo ka talagsaong anak, mga igsoon sa among namatay nga anak. Amo silang gitudloan sa tinuod ug mahangtulong ebanghelyo, nga mogiya kanila balik sa ilang Langitnong Amahan ug sa ilang Manluluwas, si Jesukristo.

Nasayud ko nga ang mensahe ni Propeta Joseph Smith kabahin sa kinabuhi human sa kamatayon tinuod. Mapasalamaton ko hangtud sa hangtud alang sa paglaum, kalinaw, ug hingpit nga kalipay nga nadala niini sa among pamilya—sa duha ka bahin sa tabil. ■

Juliana Fayehun, Lagos, Nigeria

MUBO NGA SULAT

1. *Mga Pagtulun-an sa mga Presidente sa Simbahan: Joseph Smith* (2007), 209.

Samtang akong gikuptan ang basahon, nabukhad kini ngadto sa kapitulo nga giulohan og “Mga Pulong sa Paglaum ug Kahupayan sa Panahon sa Kamatayon.”



AKO ADUNAY DAGHANG IPAAMBIT

Kanunay nakong gihunahuna ang pagpangandam sa emerhensya nga kabahin sa pag-atiman sa akong pamilya ug sa akong kaugalingon. Apan nausab ang akong panglantaw kabahin sa pagpangandam sa usa ka Domingo sa buntag sa habagatang Florida niadtong 1992. Ang Bag-yong Andrew, usa sa labing kusog ug nakahimo og dako nga kadaut nga bagyo miigo sa Estados Unidos, migusbat sa matahum nga ting-init sa Miami, Florida.

Temporaryong nagpuyo ko nga nag-inusara sa usa ka apartment duol sa baybayon, nagtambong sa tulo ka bulan nga orientation para sa akong trabaho. Sa dihang miabut ang pasidaan kabahin sa bagyo ug akong nasayran nga kinahanglan ming mobakwit gikan sa among apartment inigka udto, usa ka kauban ang nag-pareserba og mga kwarto sa hotel sa usa ka dapit nga layo sa baybayon para sa among kaubanan sa trabaho ug nako. Akong gitabunan og plywood ang mga bintana ug gipahimutang ang akong personal nga mga butang.

Dihang nangutana ko kon makatabang ko, naguol ang babaye ug miingon nga wala siya masayud unsay buhaton ug asa paingon.

Isip pagpangandam sa usa ka semana nga pagbisita sa akong asawa ug mga anak, nakapalit ko og igong pagkaon ug tubig para sa akong pamilya nga unom ka sakop. Nahupay ko sa pagkasayud nga anaa koy luwas nga dapit nga kaadtoan ug adunay igong pagkaon nga madala nga molungtad og pipila ka semana.

Samtang nangandam ko aron mobiya inigka alas-10:30 sa buntag, maayo ang akong gibati—ang tanan hapsay. Miluhod ko aron mag-ampo, nagpasalamat sa Langitnong Amanhan sa akong mga panalangin ug nangayo sa Iyang panabang atol sa unos. Sa akong pagtapos sa akong pag-ampo, ang Espiritu midasig nako sa pag-ingon, “Kon adunay nagkinahanglan og tabang, tabangi ko sa pagpangita niya.”

Mga pipila ka minuto ang milabay, usa ka biyuda nga mga 80 anyos nanuktok sa akong pultahan. “Pasensya kaayo,” miingon siya. “Nasayop ko og kwarto. Nangita ko sa akong higala.”

Mora siya og nakulbaan. Dihang nangutana ko kon makatabang ko, naguol siya ug miingon nga wala

siya masayud unsay buhaton ug asa paingon. Gipangutana nako siya kon asa siya nagpuyo, ug nagkuyog mi padulong sa iyang apartment, mitimbang-timbang sa iyang sitwasyon, ug naghigot sa iyang mga opsyon.

Giingnan nako siya nga basin ang among kompaniya aduna pay luna sa usa sa among mga kwarto sa hotel, ug gidapit nako siya nga mouban sa among grupo. Nanghupaw siya sa kahupay. Dali mi nga nag-impaki ug gisiguro ang iyang apartment ug mga gamit, ug gisabut nako ang usa ka kauban nga modrayb sa iyang sakyanan padulong sa hotel.

Sa dihang andam nako nga mobiya, duha pa ka biyuda ang nangayo og tabang. Gitabangan nako nga makalma sila aron makahunahuna sila og tarung ug masayud asa mangita og kadangpan. Sa dihang akong gikuha ang bagahe sa usa sa akong kauban sa trabaho, laing tigulang nga biyuda nangayo og tabang. Gibutang namo ang iyang delikado nga mga butang sa luwas nga dapit ug gitabangan siya sa pagpangandam sa pagbiya.

Sa samang higayon, ang uban nakong mga kauban sa trabaho midapit og duha ka mga estudyante sa kolehiyo kinsa nagpuyo sa usa ka isla nga mokuyog sa among grupo sa hotel. Ang ilang pagkaon kay pipila lang ka snacks ug .95 L nga mineral nga tubig. Swerte lang, aduna koy igong ipaambit, dili lang para kanila apan para usab sa tanan.

Pagkadakong panalangin nga mandam ug magiyahan sa Ginoo. Kini nakapahimo nako nga makahatag og makakalma nga impluwensya atol sa panahon sa kabalaka ug sa paggahin hapit tanan sa akong panahon sa pagtabang sa uban nga dili mabalaka sa akong kaugalingon. Mas nakadayeg ko sa tambag sa mga lider sa priesthood kabahin sa pagpangandam. ■ Brent Fisher, California, USA



NAGHULAT SA PAGSUBANG SA ADLAW

Napuno ang kwarto sa kangitngit samtang naghigda ko nga nagmata pa, naminaw sa gininhawa sa akong bana, naningkamot sa pagtino kon natulog na ba siya. Duha pa lang ka adlaw ang milabay sa dihang namatay ang among 12 anyos nga anak nga babaye gumikan sa grabeng aksidente. Gipiyong na usab nako akong mata, apan dili gyud ko makatulog. Gimingaw kaayo ko sa akong anak. Ang tanang kahibalo sa plano sa kaluwasan dili makahupay sa akong kamingaw sa akong anak.

Sa nagkaduol na ang kaadlawon, mibati ko og kalit, grabing kamingaw. Sa dili madugay mosubang na ang adlaw, ug naghanderaw ko sa langit nga nalukop sa may pagka-pink nga kahayag. Ang among anak nga babaye ganahan og kolor nga pink. Ang pink nga sidlak sa adlaw mao gyud ang akong gikinahanglan aron mobati nga maduol kaniya pag-usab.

“Dali tan-awon nato ang pagsubang sa adlaw,” gihunghunyan nako ang akong katulgong bana.

Mibarug mi diha sa agianan sa sakyanan, nag-atubang sa silangan, ug nagpaabut . . . ug nagpaabut. Bisan tuod ang kalangitan mihayag na, ang kahayag sa adlaw wala makalusot sa ubos nga mga panganod.

Gisandig nako akong ulo sa abaga sa akong bana ug nanghupaw, naningkamot nga magpakaaron-ingnon nga maayo ra. Apan gusto pa ko og dugang. Nagkinahanglan ko og dugang. Sigurado itugot sa Langitnong Amahan kini nga tinguha human Iyang gikuha ang among buotang anak nga babaye balik Kaniya.

Sa dihang mosulod na unta sa balay ang akong bana, nagtan-aw sa among luyo ngadto sa kasadpan, siya miingon, “Tan-awa!”

Milingi ko. Sa among luyo ang mga panganod nga nakoloran sa nindot kaayo nga pagka-pink, gilibutan sa


bulawanong kahayag. Mihingos ko, ug mga luha milugmaw sa akong mga mata. Mas matahum pa kini kaysa akong gihunahuna. Gibati nako nga daw gikagos ko sa among anak. Nasa-yud ko nga ang Langitnong Amahan nasayud sa kasubo sa akong kasingkasing ug nagpadala og saad sa paglaum para sa umaabut—usa ka malumong pahinumdom para sa mahangturong mga pamilya ug sa tanang nindot nga mga panghitabo nga moabut pa.

Naghunahuna ko kanunay niadtong maanindot nga panghitabo ug sa bag-ong panglantaw nga nahatag niini ngari kanako. Si kinsa man ang motan-aw sa pagsubang sa adlaw diha sa kasadpan? Apan didto nahitabo ang akong milagro. Pila na kaha ka mga panalangin ug milagro ang wala nako mamatikdi kay kini nahitabo sa mga dapit nga wala damha? Kapila ko nag-focus sa unsay akong gihunahuna nga angayan nga naa ug wala mamatikdi ang tumang kanindot sa unsay anaa na?

Kami walay hunong nga nag-ampo sa usa ka milagro nga gihikaw, apan sa dihang mitan-aw ko uban sa akong bag-ong panglantaw, akong nakita ang milagro nga mas namaayo ang kinabuhi sa upat ka tawo tungod sa donasyon sa organ sa among anak, ang milagro sa gugma sa pamilya ug sa panaghiusa sa ward, ug ang milagro sa pagserbisyo. Mibati ko og tumang kasubo, apan mibati usab ko og dakong paglaum nga mipuno sa akong kalag uban sa matag may pagka-pink nga pagsubang sa adlaw, matag may pagka-pink nga pagsalop sa adlaw, ug matag pink nga bulak nga akong maagian sa dalan.

Karon samtang nagsubang ang adlaw, motan-aw ko sa silangan ug dayon sa kasadpan. Mopahiyom ko sa pagkaamgo nga adunay milagro kanunay ug mga panalangin nga makita—ug kanunay ang adlaw mohupay sa atong mga kasub-anan kon tugutan nato kini. ■

Ni Julia Wagner, Ohio, USA



Sa dihang mosulod na unta sa balay ang akong bana, nagtan-aw sa among luyo ngadto sa kasadpan, siya miingon, “Tan-awa!” Sa among luyo ang mga panganod nga nakoloran sa nindot kaayo nga pagka-pink.

Sa unsang paagi nga ang ligdong nga pagpakabuhi sumala sa pinulongan, pamtasan, ug panagway makatabang kanato nga makasabwag og kahayag ug makahimaya sa Dios?

Kon ang Inyong Katuyoan Usa ngadto sa **Akong Himaya**

Nila ni Katherine Nelson ug Heidi McConkie

Sa Konseho sa Langit sa kinabuhi sa wala pa dinhi sa yuta, sa dihang si Jesukristo miboluntaryo nga mahimo natong Manluluwas, Siya miingon ngadto sa Amahan, “Imong pagbuot mao ang matuman, ug ang himaya imo sa kahangturan” (Moises 4:2).

Kanunay ang Ginoo mao ang ehemplo sa paghimaya sa Amahan. Sa panahon sa Iyang mortal nga pangalagad, ang Manluluwas dili gayud magpatagad para sa Iyang Kaugalingon apan hinoon ipaduol ang Iyang mga sumusunod ngadto sa Amahan, nagtudlo, “Siya nga mosalig kanako, magasalig dili kanako kondili kaniya nga mao ang nagpadala kanako” (Juan 12:44). Sa kinaiya, panagway, pulong, ug buhat, ang Manluluwas mitudlo kanato mahitungod sa kaimportante sa kaligdong.

Sa ilang kamaunungon sa pagsunod sa Manluluwas, ang mga young adult nga gikutlo niini nga artikulo namalandong sa ilang sulod sa kaugalingon ug sa dayag nga pagpahayag

sa kaligdong ug nagpakigbahin kon sa unsang paagi nga ang ilang pasalig sa paghimaya sa Dios nakahulma sa ilang kinaiya ug naggiya sa ilang mga binuhatan.

Himayaa ang Dios ug Isabwag ang Kahayag

Kita mas makaila kon sa unsang paagi ang kaligdong naghimaya sa Dios kon kita makasabut unsa ang kahulugan sa kaligdong. Ang *Matinud-anon sa Tinuhoan* nagpasabut: “Ang kaligdong usa ka kinaiya sa pagkamapainubsanon ug pagkadesente sa sininaan, pamustura, pinulongan, ug pamtasan. Kon ikaw maligdong, dili ka magpatagad nga dili angay nganha sa imong kaugalingon. Hinoon, magtinguha ka sa “paghimaya sa Dios diha sa inyong lawas, ug diha sa inyong espiritu” (1 Mga Taga-Corinto 6:20).¹

Samtang kita nagkat-on sa pagpakita sa kaligdong sama sa gibuhat sa Manluluwas, atong mabati ang Espiritu sa atong kinabuhi, nagtuman sa saad nga “kon ang inyong katuyoan usa ngadto sa himaya sa [Dios],

ang inyong tibuok [lawas] mapuno sa kahayag” (D&P 88:67). Samtang magbasa mo kon sa unsang paagi ang ubang mga young adult nakasabut sa kaligdong, mahimo ninyong ikonsiderar kon unsaon sa pagpalambo sa inyong kaugalingong espirituhanong kahayag pinaagi sa paghimo og mga kausaban aron mapalambo ang inyong pasalig sa sulod sa kaugalingon ug sa dayag nga pagpahayag sa kaligdong.

Magmaligdong sa Pinulongan ug Pamtasan

“Ang imong mga pulong ug mga binuhatan makahimo og talagsaong impluwensya diha kanimo ug ngadto sa uban. Ipadayag ang imong kaugalingon pinaagi sa limpyo, positibo, makabayaw nga pinulongan ug sa mga binuhatan nga magdala og kalipay niadtong naglibut kanimo. Ang imong mga paningkamot nga mahimong ligdong sa pulong ug sa buhat magdala ngadto sa napalambo nga giya ug kahupayan gikan sa Espiritu Santo.”²

Si Dar’ja Sergeevna Shvydko sa



MG A YOUNG ADULT

Volograd, Russia, nagpasabut nga kita ligdong sa atong pagsulti kon atong itratar ang uban nga adunay pagtahud ug mogamit og “hinay nga tingog ug kalma nga pagpahayag sa atong mga hunahuna nga dili mogamit og bastos o dili angay nga mga pulong.” Ang ligdong nga pinulongan dili manlibak, manginsulto, magbiay-biay, ug magbugalbugal. Dili gayud ipakaubos ang uban o ipataas ang garbo; yano niining ipakita ang pagkamabination

“Ang kaligdong usa ka kinaiya sa pagkama-painubsanon ug pagkadesente sa sininaan, pamustura, pinulongan, ug pamtasan. Kon ikaw maligdong, dili ka magpatagad nga dili angay nganha sa imong kaugalingon.”

ug moila sa kabalaan sa tanang anak sa Langitnong Amahan.

Ang atong pinulongan mopakita usab og pagtahud sa Dios nga Kapangulohan: “Likayi ang mahugaw nga pinulongan ug ang kaswal, dili matinahuron nga paggamit sa pangalan sa Ginoo nga komon na kaayo sa kalibutan. . . . Ang dili matinahuron nga kinaiyahan sa maong pinulongan . . . mopugong sa [atong] abilidad nga makadawat sa hilum nga mga pag-aghat sa Espiritu Santo.”³

Sama nga ang dili ligdong nga sinultihan sama sa paglibak ug pagbiay-biay makadaut sa mga relasyon, ang ligdong nga sinultihan makapalambo og lawom nga pasalig ngadto sa Dios ug, sama sa gipasabut ni Kelly Prue

sa Utah, USA, “makadugang sa atong kapasidad sa pagtukod og positibong relasyon ngadto sa uban. Ang atong ligdong nga sinultihan makatabang kanato nga mapalambo ang pinakamaayo sa uban.”

Ang kaligdong sa pinulongan ug kaligdong sa pamtasan mag-uban. “Importante nga magmaligdong sa pinulongan ug pamtasan tungod kay nagpakita kini kon si kinsa kamo ug unsay inyong gihatagan og bili,” miingon si Mike Olsen sa Utah. Ang mga tawo makamatikod kon ang mga pulong ug linihukan wala magtakdo. Ang atong pinulongan nga nagdasig sa uban ug naghimaya sa Dios pagaubanan og tarung nga mga linihukan. Pinaagi sa mga buhat sa pagserbisyo ug pagkamabination, atong gipakita nga ang atong pasalig sa pagbayaw sa uban ug pagtahud sa Dios mas lalum pa kay sa atong mga pulong. Ang atong mga ehemplo sa pagkadisipulo sa pulong ug buhat makaimpluwensya alang sa kaayohan.

“Makadayeg gyud ko sa kaligdong sa kinaiya ug sinultihan,” miingon si Carrie Carlson sa Colorado, USA. “Adunay usa ka maayo nga butang sa tawo nga mapainubsanon ug dili mobuhat sa mga butang aron lang maka-kuha og atensyon. Kadtong ligdong nga mosulti mahimong gamhanang mga sulugoon sa Ginoo.”

Magmaligdong sa Sininaan ug Panagway

“Ang kaligdong [sa sininaan] makatabang nga mogawas ang atong pinakamaayo pinaagi sa pagtabang nato nga maka-focus sa espiritwal imbis sa kinaiyahan nga tawo,” miingon si Paul Cave sa Utah. Pinaagi sa ligdong nga sininaan, kita makaawhag sa uban nga makaila kinsa kita ug makadayeg nato sa atong personalidad ug karakter kay sa unsay atong hitsura.

Ang atong sininaan wala lang mopasabut kon unsaon kita pagtratar sa uban, apan kini makaapekto

usab kon unsaon nato paglantaw ug pagtratar ang atong kaugalingon. “Atong nasayran sa ebanghelyo nga ang atong lawas gasa gikan sa Dios,” miingon si Luis Da Cruz Junior sa Brazil. “Ang atong lawas makatabang kanato sa paglambo ug mahimong sama sa atong Amahan. Tungod niini nga rason importante nga ligdong nga magsinina. Pinaagi sa pagbuhat niini, atong gipakita sa Dios ug sa uban nga kita nagtahud niining gasa ug sa uban.”⁴

Si Carrie mipasabut, “Ang dili tarung nga sininaan nagtinguha sa pagpakita sa lawas isip usa ka pisikal nga butang nga bulag sa espiritu nga adunay personalidad ug kinaiya. Ang pagkaligdong, bisan tuod mas mahal usahay ug sigurdong mas dugay nga panahon, nakatabang nako sa pagkat-on nga ang akong lawas mao ang tabernakulo sa usa ka bililhong espiritu uban sa balaanong potensyal ug padulngan, anak ug giumumahan sa Langitnong mga Ginikanan. Kini angay nga mas ampingan ug tahuron kaysa mahatag sa kalibutan.”

Ang *Matinud-anon sa Tinuhoan* nagtudlo: “Agig dugang sa paglikay sa [dili ligdong nga sinina], kinahanglan ka nga molikay sa nanubrang pagsinina, panagway, ug uso sa buhok. Sa sininaan, panagway, ug mga pamtasan, kanunay nga magmahinlo ug magmalimpyo, maglikay gayud sa dili hapsay o dili angay nga kaswal nga sinina.”⁵ Sa paagi nga kita magsinina ug magpresentar sa atong kaugalingon, atong gipasabut ang atong pagtahud sa Dios, sa atong kaugalingon ug sa uban.

Pagpasalig nga Magmakanunayon

Samtang kita naningkamot sa pagsunod sa sumbanan sa ebanghelyo sa pagkaligdong, atong gipakita atong pasalig pinaagi sa pagkamakanunayon, magsunod sa mga sugo sa Ginoo sa tanang panahon dili lang kon komportable ta.

Ang tinuod nga pasalig kanunay nga nakagamot sa mga baruganan sa ebanghelyo. Si Anthony Roberts sa Utah mipasabut, “Ang kaligdong kabahin na kon si kinsa ka, usa ka tinguha nga sundon kada adlaw ang nasabtan sa ebanghelyo ug sa plano sa kaluwasan.” Samtang atong gisunod ang ebanghelyo sa tanang aspeto sa atong kinabuhi, ang atong pagkakabig mapalawom ug makadugang sa atong tinguha sa pagsunod sa mga baruganan sa ebanghelyo.



Sabta ang Inyong Diosnong Kinaiya

Ang makanunayon nga pagtuman sa kaligdong makatabang nato nga makasabut ug makadayeg sa atong katungod sa pagkatawo, ug ang kahibalo sa atong balaanong kinaiya makapadasig kanato nga mahimong mas ligdong. Si Raffaella Ferrini sa Florence, Italy, mipasabut, “Ang kaligdong nakapanalangin sa akong kinabuhi tungod kay kini nakatabang kanako nga mobati nga espesyal nga anak nga babaye sa akong Langitnong Amahan, ug kana nga kahibalo, sa ingon, nakapahimo nakong ligdong.”

Ang pagtugot sa kalibutan nga modeterminar kon kinsa kita makadaut sa pagsalig sa atong kaugalingon. Si Julianna Auna sa Utah naghulagway

sa iyang kasinatian: “Sa wala pa ko nakabaton og pagpamatuod sa baruganan sa kaligdong, dili ko malipayon ug dili luwas sa espirituhanon nga paagi. Ang pagtugot sa kalibutan nga modeterminar kon kinsa ko makapasubo ug makadaut sa espirituhanong paagi tungod kay ang pagkakalibutanon sa temporal, pisikal nga mga butang mapintas ug mapugsanon. Sa dihang mihukom ko nga dili na mamina ngadto sa kalibutan ug hinoon mohimo sa akong relasyon sa Dios nga modeterminar kon si kinsa ko, ang kinabuhi nahimong mas sayon, mas gawasnon, ug mas malipayon.” Kon kita nagtinguha sa pagtugot sa Langitnong Amahan imbis sa kalibutan, kita mas malipay sa kinabuhi ug mas madasig nga magmaligdong.

Pagpuyo og Ligdong nga Kinabuhi

“Ang kaligdong mapahayag sa tanan natong gibuhit: atong sinultihan, atong gawas nga panagway, atong pamatasan, ug gani sa mga dapit nga atong bisitahan,” miingon si Galina Viktorovna Savchuk sa Novosibirsk, Russia. Ang ligdong nga pagpakabuhi may dakong kalabutan sa atong pasalig sa ebanghelyo ug sa atong relasyon ngadto sa Dios.

Ang tinuod nga kaligdong naglangkob sa batasan ug kinaiya. Ang pagpaningkamot sa pagpalambo sa atong kinaiya o sa atong gihunahuna makatabang sa pagpalambo sa usa. Ang pagmaligdong sa atong kinaiya ug panagway nga dili magmugma og tibuok kinabuhi nga pasalig makapugong nato sa pagdawat sa hingpit nga mga panalangin sa pagpuyo nga maligdong. Ug ang pagtuo sa atong kaugalingon nga ligdong kita nga mga tawo apan wala nato kini mapakita sa atong binuhatan usa ka paglingla sa kaugalingon.⁶

Sumala sa kahulugan sa kaligdong, ang pagsulti nga ang atong katuyoan usa ngadto sa himaya sa Dios nagpasabut nga kita sa gawas ug mismo

sa sulod sa atong kaugalingon mipasalig nga magpakabuhi nga ligdong. Sama nga ang katuyoan kinahanglang nakadirekta ngadto sa Dios, ang atong gawas nga panagway ug mga lihok kinahanglang nahiuyon sa mga baruganan sa kaligdong. Apan ang pagdirekta lang sa katuyoan ngadto sa Dios wala makapa-usa niini sa Iyang himaya; kinahanglang i-focus kini ngadto Kaniya. Sa samang paagi, ang ligdong nga sininaan ug pamustura kinahanglang nga pagaubanan sa panglantaw sa mahangturong mga baruganan.

Samtang ang atong katuyoan idirekta ngadto sa Dios, mas sayon natong ma-focus atong panglantaw ngadto Kaniya. Sa samang paagi, kon atong i-focus atong panglantaw Kaniya, ang atong mga katuyoan natural lang magsunod sa Iyang direksyon.

Samtang kita naningkamot nga ligdong nga magpakabuhi, mas mabati nato ang impluwensya sa Espiritu sa atong kinabuhi. Si Elder Robert D. Hales sa Korum sa Napulog Duha ka mga Apostoles mitudlo: “Ang [kaligdong] mahinungdanon sa pagkatakus alang sa Espiritu. Ang [kaligdong] mao ang pagkamapainubsanon, ug ang pagkamapainubsanon nagdapit sa Espiritu nga atong makauban.”⁷ Uban sa Espiritu nga naggiya sa atong mga hunahuna ug mga lihok, ang atong katuyoan mahimong usa ngadto sa himaya sa Dios ug kita mapuno sa kahayag. ■

Si Katherine Nelson nagpuyo sa Utah, USA. Si Heidi McConkie nagpuyo sa Delaware, USA.

MUBO NGA MGA SULAT

1. *Matinud-anon sa Timuhoan: Usa ka Pakisayran sa Ebanghelyo* (2004), 67.
2. *Matinud-anon sa Timuhoan* 69.
3. *Matinud-anon sa Timuhoan* 69.
4. Tan-awa sa *Matinud-anon sa Timuhoan*, 68.
5. *Matinud-anon sa Timuhoan* 69.
6. Tan-awa sa Lynn G. Robbins, “Unsa nga Matang sa mga Lalaki ug mga Babaye Kamo Mahisama?” *Ensign* o *Liahona*, Mayo 2011, 103.
7. Robert D. Hales, “Tarung nga Sininaan: Balaang Pagtahud alang sa Ginoo,” *Ensign*, Ago. 2008, 34; *Liahona*, Ago. 2008, 18.

Finland

Pagkakabig ug Sakripisyo diha sa

Ni Melissa Zenteno

Pipila ka mga milya gikan sa baybayon sa Helsinki, Finland, mao ang usa ka kota diha sa dagat sa Suomenlinna, gitukod niadtong ika-18 nga siglo isip proteksyon batok sa mga kaaway. Milangkob sa unom ka mga isla, kining lig-on nga kota nagrepresentar sa lig-ong determinasyon sa mga tawo sa Finland.

Apan ang mga miyembro sa Finland mobisita og talagsaong building kon sila mobiyahe ngadto sa ilang kapital. Ang Helsinki Finland Temple mao ang pisikal nga simbolo sa ilang pagkakabig ug proteksyon nga ilang nadawat gumikan sa pagsunod sa ebanghelyo.

Para kang Niilo Kervinen, 24 anyos nga young adult gikan sa Rovaniemi, Finland, ang 10 ka oras nga biyahe sakay sa tren ngadto sa Helsinki gamay lang nga sakripisyo para sa panalangin sa pagserbisyo diha sa templo.

Sa wala pa gipahinungod ang Helsinki Finland Temple niadtong Oktubre 2006, Si Niilo ug ubang mga miyembro sa iyang ward kinahanglan nga mobiyahe ngadto sa Stockholm Sweden Temple o sa Copenhagen Denmark Temple. “Ang biyahe sa kasagaran molungtad og usa ka semana atol sa bakasyon sa ting-init,” siya mihinumdom. Ang pagbiyahe

sakay sa bus ug pagkatulog gamit sa mga tolda atol sa mga biyahe mao ang pipila sa iyang labing nindot nga mga panumduman.

Apan ang pagkaadunay templo sa iyang yutang natawhan usa ka talagsaon nga panalangin. “Sa dihang ilang gipahibalo ang templo sa Helsinki, nalipay kaayo ko,” miingon si Niilo. “Ang pag-ampo sa pagpahinungod kinasingkasing gihapon nakong mahinumduman matag sulod nako.”

Kini nga gugma para sa templo nakalahi ni Niilo sa iyang mga higala. “Ang mga tawo sa Finland kugihan ug aktibo apan mogahin lang og gamay nga oras sa espirituhanong mga butang sa ilang kinabuhi,” siya mipasabut. Bisan tuod si Niilo miingon nga kanunay siyang napanalanginan og buotang mga higala, samtang siya nagdako, ang kalainan kon sa unsang paagi nagpakabuhi ang iyang mga higala ug sa unsang paagi siya gitudloan sa pagpakabuhi nahimong mas klaro. Kini ang kalainan nga nakapahimo ni Niilo sa pagtinguha sa iyang kaugalingong pagpamatuod sa dihang 17 anyos na siya. “Kinahanglan ko nga modesisyon sa akong barugan ug unsa ko nga mamahimo,” siya miingon. “Uban sa mga panalangin sa Ginoo ug sa paggiya sa pamilya ug buotang mga higala, mas

Unsa kaha ang matinud-anong young adult sa Finland? Usa ka batan-ong lalaki mipakigbahin sa iyang kultura ug iyang hugot nga pagtuo.

nalig-on ang akong pagpamatuod sa Simbahan.”

Kabahin sa pagkakabig, si Elder David A. Bednar sa Korum sa Napulog Duha ka mga Apostoles miingon, “Ako mosaad nga sa atong pagkaysayud sa kamatuoran ug makabig ngadto sa Ginoo, magpabilin kitang lig-on ug makanunayon ug dili mobiya.”¹ Bisan tuod nga ang pagbiyahe ngadto sa Helsinki nagkinahanglan og panahon ug kwarta, si Niilo masaligon nga mahimong disipulo ni Kristo. Ug para kang Niilo, dili gyud kini sakripisyo. ■

MUBO NGA SULAT

1. David A. Bednar, “Nakabig ngadto sa Ginoo,” *Ensign* o *Liahona*, Nob. 2012, 109.

DUGANG PA KABAHIN NI NILO

Unsay sagad kaunon sa mga tawo sa Finland?

Pipila sa akong paborito nga pagkaon naglakip sa sabaw sa salmon ug karne sa reindeer uban sa minasa nga patatas. Mokaon usab mi og daghang pan nga rye.

Unsay inyong buhaton para sa kalingawan?

Ganahan ko mag-snowboard, motan-aw sa salida sa sine, o malingaw nga maglakaw-lakaw sa gawas. Nagmisyon ko sa Japan, busa nagtuon ko og Japanese kon makalugar ko.

Unsa ang pagpakig-date sa Finland?

Dili kaayo uso sa among kultura ang pagpakig-date. Kasagaran ang mga tawo modapit og date kon sila aduna nay dakong tinguha alang kanila. Dinhi, ang pagpakig-date dili paagi aron maila-ila ang usa ka tawo. Adunay daghang matitud-anong mga young adult dinhi, bisan kon dili kaayo daghang mga miyembro. Usahay ang mga miyembro nga young adult mobiyahe og lagyo aron makig-date sa tawo nga ilang nahimamat sa usa ka young single adult dance.

ANG SIMBAHAN SA FINLAND

4,715 ka mga Santos sa Ulahing mga Adlaw
 15 ka ward
 15 ka branch
 2 ka stake
 1 ka misyon
 1 ka templo, gipahinugod niadtong Oktubre 22, 2006

SA GIDAGHANON

5,250,000 ka mga tawo (kutob Enero 2012)
 187,888 ka lawa
 179,584 ka mga isla
 2.2 ka milyon ka saunas

MGA KAMATUORAN

Ulohan: Helsinki
 Pinulongan: Finnish (Suomi)



ANG MGA LALAKI UG MGA BABAYE DIHA SA **BUHAT** SA **GINOO**

*Sa plano sa atong Langitnong Amahan nga naghatag og gahum sa priesthood,
ang kalalakin-an ug kababayan-an dunay lainlain apan
parehas nga bilihong tahas.*



**Ni Elder
M. Russell Ballard**

Sa Korum sa
Napulog Duha ka
mga Apostoles

Mituo ako nga dunay mga kamatuoran nga kinahanglang masabtan sa mga babaye ug mga lalaki bahin sa mahinungdanong tahas sa mga babaye sa paglig-on ug pagtukod sa gingharian sa Dios dinhi sa kalibutan. Sa daghan kaayong paagi ang mga babaye mao ang focus sa Simbahan. Mao nga uban sa tabang sa Ginoo, gusto kong mopasidungog sa matinud-anong mga babaye ug sa batan-ong mga babaye sa Simbahan. Kaninyo minahal nga mga sister, bisan asa man kamo sa kalibutan nagpuyo, palihug hibalo ang dakong pagbati ug pagsalig sa Unang Kapangulohan ug sa Napulog Duha ka mga Apostoles diha kaninyo.

Akong sugdan pinaagi sa pagpahinumdom bahin sa atong gibuhad dinhi sa kalibutan.

Pinalangga kita nga espiritung mga anak sa atong Langitnong Amahan. Nagpuyo kita uban Niya didto sa premortal nga dapit. Aron matuman ang misyon sa “pagpahinabo sa pagka-imortal ug kinabuhing dayon sa tawo” (Moises 1:39), ang Langitnong Amahan mihimo og plano aron matabangan ang Iyang mga anak nga makab-ot ang ilang pinaka-potensyal. Ang plano sa atong Amahan magpahinabo sa pagkapukan sa tawo ug mabulag gikan Kaniya sulod sa usa ka panahon pinaagi sa pagkatawo dinhi sa mortalidad, makabaton og lawas, ug maanaa sa usa ka panahon sa pagsulay. Iyang giplano nga

dunay ipadala nga usa ka Manluluwas aron motubos sa katawhan gikan sa Pagkapukan. Ang Pag-ula sa atong Ginoo nga si Jesukristo naghatag og paagi pinaagi sa mga ordinansa sa ebanghelyo ug sa sagradong mga pakig-saad aron makabalik sa presensya sa Dios. Tungod kay magpuyo man kita sa mortal nga palibut nga puno sa peligro ug mga kahamol, ang Langitnong Amahan ug Iyang Anak nahibalo nga atong kinahanglanon ang gahum nga mas labaw kay sa atong kaugalingon. Nahibalo Sila nga atong kinahanglanon ang Ilang gahum. Ang ebanghelyo ug doktrina ni Kristo mohatag og gahum sa tanan niadtong kinsa modawat niini aron makab-ot ang kinabuhing dayon ug gahum aron makakaplag og kalipay niini nga panaw.

Dunay mga nagpangutana kon unsa ang tahas sa mga babaye sa plano sa Dios ug sa Simbahan. Kadaghan ko giinterbyu sa nasayonal ug internasyonal nga media sa pagsulti ninyo nga kadaghanan sa mga journalist nga akong nakaatubang dunay kaugalingong mga hunahuna bahin niini nga hilisgutan. Sulod sa mga katuigan daghang nangutana nga nag-ingon nga ang mga babaye sa Simbahan mga second-class citizen. Kini nga hunahuna layo ra sa tinuod.

Mosugyot ko og lima ka importanting punto aron inyong mahinuktukan kining importante nga hilisgutan.

1. Ang Dios Adunay Plano sa Pagtabang Kanato nga Makab-ot ang Kinabuhing Dayon

Ang atong Langitnong Amahan milalang sa mga babaye ug lalaki, kinsa Iyang espiritu nga mga anak. Nagpasabut kini nga ang pagkalalaki ug pagkababaye mahangturon. Siya dunay plano nga gihimo aron matabangan ang tanang mopili sa pagsunod Kaniya ug sa Iyang Anak, si Jesukristo, nga makaabut sa ilang destinasyon isip manununod sa kinabuhing dayon.

Kon ang umaabut natong kahimayaan mao ang Ilang importanting tumong ug tuyo ug kon Sila nahibalo sa tanan ug perpekto, sigon sa atong nahibaloan, nan mas naka-hibalo Sila unsaon sa pag-andam, pagtudlo, ug paggiya kanato aron mas dako ang atong purohan nga mahimong takus sa kahimayaan.

Hapit tanan dunay pamilya o mga higala nga naapektuhan sa magkalahing problema sa komunidad. Ang paglantugi bahin sa mga problema sa kinatibuk-an dili makasulbad, gani, makamugna pa kini og panagbingkil. Dunay mga pangutana kon unsay baruganan sa Simbahan bahin sa sensitibong mga isyu nga lisud tubagon alang sa katagbawan sa tawo. Hinoon, kon atong pangitaon ang Ginoo pinaagi sa

pag-ampo kon unsaon nga mobati kita ug unsay buhaton alang niini nga sitwasyon, ang pagdasig moabut: “Mituo ba kamo kang Jesukristo ug kamo ba misunod Kaniya ug sa Amahan?” Mituo ako nga hapit tanan sa Simbahan sa usa ka higayon o sa laing higayon makapangutana kon sila maka-himo ba sa tanan nga ipabuhat kanila. Apan kon kita mituo gayud sa Ginoo, ang kasiguroan moabut: “Mituo ko kang Jesukristo, ug andam ko nga mobuhat bisan unsay Iyang ipabuhat nako.” Mao nga maningkamot kita. Pagkagamhanan sa mga pulong nga “Mituo ko kang Jesukristo”!

Ang atong mga pagpamatuod ug ang kalinaw sa atong hunahuna ug ang atong kaayohan magsugod sa kaandam nga motuo nga ang atong Amahan sa Langit mas nahibalo gayud.

2. Ang Simbahan Gidumala pinaagi sa mga Yawe sa Priesthood

Ang Simbahan ni Jesukristo sa mga Santos sa Ulahing mga Adlaw Simbahan sa Ginoo, ug ang Iyang Simbahan gidumala pinaagi sa awtoridad sa priesthood ug sa mga yawe sa priesthood. “Ang mga yawe sa priesthood mao ang katungod sa Dios nga gihatag ngadto sa mga lider sa priesthood



sa pagtudlo, pagkontrolar, ug pagdumala kon unsaon sa paggamit ang Iyang priesthood dinhi sa kalibutan.”¹

Kadtong adunay mga yawe sa priesthood—bisan siya usa ka deacon kinsa dunay mga yawe alang sa iyang korum o usa ka bishop kinsa dunay mga yawe alang sa iyang ward o ang Presidente sa Simbahan kinsa nagguni sa tanang yawe sa priesthood—sa tinuoray naghimong posible nga ang tanan kinsa matinud-anong naghago ubos sa ilang direksyon makagamit sa awtoridad sa priesthood ug makagamit sa gahum sa priesthood.

Ang tanang lalaki ug babaye nag-alagad ubos sa direksyon niadtong dunay mga yawe. Mao kini ang pamaagi sa Ginoo sa pagdumala sa Iyang Simbahan.

Duna koy sublion sa akong gisulti sa Abril 2013 nga kinatibuk-ang komperensya: “Sa plano sa atong Langitnong Amahan nga naghatag og gahum sa priesthood, ang kalalakin-an dunay responsibilidad sa pagpangalagad sa priesthood apan dili sila ang priesthood. Ang kalalakin-an ug kababayan-an dunay lainlain apan parehas nga bililhong tahas. Ingon nga ang babaye dili magsabak kon wala ang lalaki, ang lalaki dili hingpit nga makagamit sa gahum sa priesthood sa pagtukod og mahangturong pamilya kon wala ang babaye. . . . Sa mahangturong panglantaw, ang gahum sa pagpasanay ug ang gahum sa priesthood pagambitan sa bana ug asawa.”²

Ngano nga mga lalaki man ang i-orden sa mga office sa priesthood ug dili mga babaye? Si Presidente Gordon B. Hinckley (1910–2008) mipasabut nga ang Ginoo, dili ang tawo, “ang miplano nga ang mga lalaki sa Iyang Simbahan ang makahupot sa priesthood” ug ang Ginoo usab ang mihatag sa mga babaye og “katakus aron makompleto kining talagsaon ug kahibulungang organisasyon, nga mao ang Simbahan ug gingharian sa Dios.”³ Sa lintunganay, ang Ginoo wala mopadayag kon ngano nga Iyang giorganisar ang Iyang Simbahan sumala sa Iyang pag-organisar niini.

Dili nato kalimtan nga gibana-bana nga katunga sa tanang pagtulun-an dinhi sa Simbahan gilihok sa mga sister. Kadaghanan sa mga pagpangulo gilihok sa atong mga sister. Daghan sa mga oportunidad sa pagserbisyo ug mga kalihokan giplano ug gidumala sa mga babaye. Ang tambag ug uban pang partisipasyon sa mga babaye diha sa ward ug stake council ug diha sa mga general council sa punoang buhatan sa Simbahan naghatag sa gikinahanglang panglantaw, kaalam, ug kabalanse.

Gikinahanglan nga ang mga lalaki kinsa nagtahud sa mga babaye ug sa anaa nilang lahi nga espirituhanong mga gasa ug ang mga babaye kinsa nagtahud sa mga yawe sa priesthood nga gihuptan sa mga lalaki ang mangayo sa

tibuok nga panalangin sa langit sa bisan unsang buluhaton sa Simbahan.

3. Ang mga Lalaki ug mga Babaye Parehas nga Importante

Ang mga lalaki ug mga babaye parehas sa mga mata sa Dios ug sa mga mata sa Simbahan, apan ang pagkaparehas wala magpasabut nga managsama ra sila. Ang mga responsibilidad ug balaang gasa sa mga lalaki ug mga babaye managlahi sa ilang matang apan dili sa importansya o sa impluwensya niini. Ang doktrina sa atong Simbahan nagbutang sa mga babaye nga parehas ra apan lahi gihapon sa mga lalaki. Wala isipa sa Dios nga ang lalaki mas importante kay sa babaye o ang babaye mas importante kay sa lalaki. Mipahayag si Presidente Hinckley ngadto sa mga babaye nga ang “Mahangturong natong Amahan . . . wala mag-isip nga mas ubos kamo kay sa talagsaong katahum sa Iyang mga nilalang.”⁴

Ang mga lalaki ug mga babaye managlahi og gasa, managlahi og kalig-on, ug managlahi og panglantaw ug mga hilig. Usa kana sa importanting mga hinungdan nganong nagkinahanglan kita sa usag usa. Nagkinahanglan og usa ka lalaki ug usa ka babaye aron makahimo og pamilya, ug nagkinahanglan ug mga lalaki ug mga babaye aron mahimo ang buhat sa Ginoo. Ang bana ug asawa sa matarung nga paagi magtambayayong sa kalampanan sa usag usa. Atong bantayan nga dili kita makabalda sa mga plano ug katuyoan sa atong Langitnong Amahan sa atong kinabuhi.

4. Ang Tanan Mapanalanginan pinaagi sa Gahum sa Priesthood

Kon ang mga lalaki ug mga babaye mangadto sa templo, mahatagan sila sa pareho nga gahum, nga mao ang gahum sa priesthood. Samtang ang awtoridad sa priesthood gidumala pinaagi sa mga yawe sa priesthood, ug ang mga yawe sa priesthood huptan lamang sa takus nga mga lalaki, ang paggamit sa gahum ug mga panalangin sa priesthood anaa alang sa tanang anak sa Dios.

Ang atong Amahan sa Langit manggihatagon sa Iyang gahum. Ang tanang lalaki ug babaye makagamit niini nga gahum alang sa tabang diha sa kaugalingon nilang kinabuhi. Ang tanan nga mihimo og sagradong mga pakigsaad sa Ginoo ug kadtong mitahud sa mga pakigsaad mahimong makadawat og personal nga pagpadayag, nga mapanalanginan pinaagi sa pagpangalagad sa mga anghel, nga makigsulti sa Dios, nga makadawat sa kahingpitan sa ebanghelyo, ug, sa katapusan, mahimong mga manununod kauban ni Jesukristo sa tanan nga anaa sa atong Amahan.



5. Kinahanglan Kitang Mahibalo ug Mopamatuod sa Doktrina

Gikinahanglan nato nga ang mga babaye sa Simbahan mahibalo sa doktrina ni Kristo ug mopamatuod sa Pagpahiuli sa tanang paagi kutob sa inyong mahimo. Wala pa sukad sa kasaysayan sa yuta ang ingon niini ka labawng komplikado nga panahon. Si Satanas ug ang iyang mga kaubanan nagtrabaho aron mahingpit ang ilang punduhanan sa mga hinagiban alang sa milenyo, ug batid na sila sa pagpangdaot sa pagtuo ug pagsalig ngadto sa Dios ug sa Ginoo nga si Jesukristo sa tawhanong pamilya.

Kitang tanan—mga lalaki, mga babaye, mga young adult, mga batan-on, ug mga batang lalaki ug babaye—anaa kanato ang Ginoo ug ang Iyang Simbahan aron panalipdan, protektahan, ug ipakatap sa tibuok kalibutan. Nagkinahanglan pa kita og dugang nga lahi, impluwensyal nga mga tingog ug pagtuo sa mga babaye. Gikinahanglan namo nga kamo makakat-on sa doktrina ug makasabut sa unsay atong gituohan aron kamo makahatag sa inyong mga pagpamatuod bahin sa kamatuoran sa tanang butang—bisan kon kana nga pagpamatuod ihatag man diha sa usa ka campfire sa Young Women camp, sa miting sa pagpamatuod, sa blog, o sa Facebook. Kamo lang ang makapakita sa kalibutan kon unsa diay ang kinaiya ug gituohan niining mga kababayan-an sa Dios nga nagahimo og mga pakigsaad.

Mga sister, ang inyong luna sa pag-impluwensya usa ka lahi nga luna—luna nga dili masundog sa mga lalaki. Walay makahimo sa pagpanalipod sa atong Manluluwas

sa mas labaw nga pag-aghat o gahum kay kaninyo, anak nga mga babaye sa Dios,—kamo nga adunay kalig-on sa kahiladman ug pagsalig. Ang impluwensya sa tingog sa usa ka nakabig nga babaye dili masukod, ug ang Simbahan mas nagkinahanglan sa inyong mga tingog karon kay sa kaniadto.

Akong ibilin kaninyo ang akong pagsaksi ug pagpamatuod nga ania kita sa panahon diin kinahanglan kitang maghiusa sa pagbarug. Maghiusa kita—mga lalaki ug mga babaye, mga kabatan-onan, mga batang lalaki ug babaye. Kinahanglang atong barugan ang plano sa atong Langitnong Amahan. Kinahanglan nga Siya atong panalipdan. Siya ginasalikway na. Dili mahimong mag-urong lang kita isip mga miyembro sa Simbahan ni Jesukristo sa mga Santos sa Ulahing mga Adlaw ug tugutan nga mahitabo kini nga wala ang atong kaisug sa pagpadungog sa atong mga tingog.

Hinaut nga ang Dios mopanalangin kaninyo og kaisug sa pagtuon ug mahibalo sa yanong mga kamatuoran sa ebanghelyo ug dayon mopakigbahin niini sa matag kahigayunan nga inyong makuha. ■

Gikan sa pakigpulong sa usa ka debosyon sa Brigham Young University nga gihatag niadtong Agosto 20, 2013. Alang sa kompleto nga teksto sa Iningles, bisitaha ang speeches.byu.edu.

MUBO NGA MGA SULAT

1. *Handbook 2: Administering the Church* (2010), 2.1.1.
2. M. Russell Ballard, “Kini ang Akong Buhat ug Himaya,” *Liahona*, Mayo 2013, 19.
3. Gordon B. Hinckley, “Women of the Church,” *Ensign*, Nob. 1996, 70.
4. Gordon B. Hinckley, “Stand Strong against the Wiles of the World,” *Ensign*, Nob. 1995, 98.

NANGANDAM ARON MOSERBISYO, NAGSERBISYO ARON MAANDAM

*Gihatag sa Dios kaninyo ang Aaronic Priesthood kay
Siya dunay ipabuhat kaninyo—karon ug sa umaabut.*



David L. Beck
Kinatibuk-ang Presidente
sa Young Men

Si Jonathan akong higala kinsa nagpasakop sa Simbahan upat ka tuig nang milabay. Siya lang ang miyembro sa Simbahan sa iyang pamilya. Human siya makadawat sa Aaronic Priesthood, nagsugod siya sa pagserbisyo ngadto sa uban nga usa ka pagserbisyo nga wala pa niya mabuhat sukad. Nahibalo si Jonathan nga sa pagserbisyo, daghan siya og angay nga kat-unan. Gusto sab siyang mahimo nga takus ug mas kasaligan, mao nga nagtuon siya sa ebanghelyo, nagampo, ug mitambong sa iyang mga miting sa Dominggo ug sa seminary. Naningkamot gayud siya sa pagsunod sa mga sugo ug sa mga sumbanan sa Simbahan. Makugihon niyang gituman ang iyang mga katungdanan sa priesthood, lakip ang pagkahimong talagsaon nga home teacher. Ang iyang libro nga *Katungdanan ngadto sa Dios* nakatabang kaniya nga makasabut sa mga katungdanan ug sa pagkat-on kon unsaon sa pagtuman niini.

Ang matinud-anong priesthood nga panerbisyo ni Jonathan naghatag niya og espirituhanong kalig-on. Nakatabang kini nga siya mapanalipdan sa dautang mga impluwensya. Maayo kaayo ang iyang paglambo samtang nagserbisyo siya ug nag-andam alang sa iyang umaabut. Sa miaging tuig, takus siya nga midawat sa Melchizedek Priesthood ug sa endowment sa templo. Karon nagmisyon na siya sa Brazil.

Ang Aaronic Priesthood sa kasagaran gitawag og “priesthood alang sa pagpangandam.” Gihatag sa Dios kaninyo ang Aaronic Priesthood kay Siya dunay ipabuhat kaninyo—karon ug sa umaabut. Ang inyong

matinud-anong pagserbisyo sa Aaronic Priesthood nag-andam kaninyo alang sa mas dako pang mga oportunidad sa pagserbisyo sa umaabut nga mga katuigan. Sama ni Jonathan, kamo nangandam sa “pagdawit sa Melchizedek Priesthood, sa pagdawit sa mga panalangin sa templo, pag-alagad og full-time nga misyon, nga mamahimong mahigugmaong bana ug amahan, ug sa pagpadayon sa tibuok kinabuhi nga pagserbisyo sa Ginoo” (*Matinud-anon sa Tinuohan: Usa ka Pakisayran sa Ebanghelyo* [2004], 4).

Tingali dili mo makahibalo sa tanang detalye sa talagsaong mga oportunidad nga giandam sa Langitnong Amahan kaninyo, apan sigurado ko nga maandam kamo sa paghimamat kanila kon inyong hinumduman ang pagbuhat sa mosunod isip usa ka naghupot sa Aaronic Priesthood.

Sundon si Jesukristo

Isip usa ka naghupot sa priesthood, kamo representante ni Jesukristo. Nagpasabut kana nga gihangyo kamo sa pagsunod Kaniya ug sa pagbuhat sa gusto Niya nga ipabuhat. Unsa man kaha ang Iyang buhaton? Sa matag sitwasyon, Iyang gigahin ang Iyang kinabuhi sa pagserbisyo ug pagpanalangin sa uban. Mao usab ang inyong buhaton. Igahin ang inyong kaugalingon sa pagserbisyo sa uban—ug dayon magpatubo ug magpalambo aron duna kamoy dugang pa nga ikahatag! Hinumdumi sa unsang paagi nagtubo si Jesus sa Iyang kabatan-on: Siya “mitubo sa kaalam ug sa gidak-on, ug sa kahimuot kaniya sa Dios ug sa tawo” (Lucas 2:52).



ISIP NAGHUPOT SA AARONIC PRIESTHOOD:

UNSAON MAN NAKO NGA MAANDAM SA:

Sunda si Jesukristo pinaagi sa

- inadlaw nga pag-ampo ug pagtuon sa ebanghelyo
- pagkamasulundon
- pagtinguha sa kabubut-on sa Dios

Mangalagad sa mga ordinansa sa priesthood, sama sa

- pagpanalangin sa sakrament
- pagbunyag sa uban

Mangalagad kanunay pinaagi sa


- paglig-on sa pamilya ug mga sakop sa korum
- pag-rescue sa dili kaayo aktibo nga mga miyembro
- pagserbisyo sa mga nanginahanglan

Pagdawat sa Melchizedek Priesthood

Pagdawat sa mga panalangin sa templo

Pagserbisyo og misyon

Pagkahimong usa ka bana ug amahan



Nagsunod kamo kang Kristo kon inyong gitinguha ang kabubut-on sa Dios sa tibuok adlaw nga mogiya sa inyong panerbisyo ug lihukon ang espirituhanong mga pag-aghat nga inyong nadawat.

Ang usa ka bahin sa pagsunod sa Manluluwas mao ang pagkahimong maalamon ug himsog sa pisikal sa inyong kabatan-on. Nagkinahanglan nga maningkamot gayud kamo ug padayon kutob sa inyong mahimo (tan-awa sa D&P 4:2). Kahimut-an kamo sa Dios samtang magpaduol kamo Kaniya pinaagi sa inadlawng pag-ampo, pagtuon sa ebanghelyo, kamasulundon, ug pagserbisyo. Kahimut-an kamo sa uban kon magmabination kamo ug maun-ugon sa inyong pamilya ug sa sama kang Kristo nga pagpakighigala sa tanan.

Hinumdumi nga si Jesus kanunay mituman sa kabubut-on sa Amahan. Nagsunod kamo kang Kristo kon inyong gitinguha ang kabubut-on sa Dios sa tibuok adlaw nga mogiya sa inyong panerbisyo ug lihukon ang espirituhanong mga pag-aghat nga inyong nadawat.

Pagpangalagad sa mga Ordinansa sa Priesthood

Ang mga ordinansa sa priesthood gikinahanglan alang sa tanang anak sa Dios ug mopanalangin sa Iyang mga anak sa patas nga paagi. Sugod sa inyong pagka-deacon, mitabang kamo sa pagpangalagad sa ordinansa sa priesthood pinaagi sa pag-apud-apod sa sakrament. Padayon kamong mangalagad sa mga ordinansa diha sa Aaronic Priesthood samtang mangandam kamo ug makapanalangin sa sakrament, mobunyag, ug moapil sa pag-orden sa ubang naghupot sa Aaronic Priesthood.

Aron makaapil sa sagradong mga ordinansa, kinahanglang limpyo kamo. Ang inyong moral nga kalimpyo makadugang sa talagsaong espirituhanong gahum sa mga ordinansa nga inyong gipangalagaran. Paningkamuti nga takus kamo sa tanang paagi sa naghupot sa sagradong mga butang sa sakrament sa Ginoo (tan-awa sa D&P 38:42). Kon buhaton ninyo kini, makabarug kamo sa inyong ward o branch isip tinuod nga representante ni Jesukristo. Mapanalanginan sila tungod sa inyong determinasyon sa pagtuman sa mga pakigsaad diin kamo mitabang kanila sa pagbag-o.

Pangalagad sa Kanunay

Isip naghupot sa Aaronic Priesthood, mangalagad kamo. Sa tanang panahon, tinguhaa ang mga oportunidad nga makapangalagad sa inyong pamilya, higala, sakop sa korum, ug sa uban. Ang tanan nga inyong gibuhath diha sa priesthood nakatabang nga kamo makapangalagad sa uban sa pisikal ug sa espiritwal. Sama pananglit, kon motabang kamo sa bishop o branch president pinaagi sa pagserbisyo sa pamilya nga inyong gi-home teach, nagkat-on kamo unsaon sa pag-ila ug pag-atiman ang panginahanglan sa uban. Mangalagad sab kamo sa uban samtang motabang kamo sa paglig-on sa mga sakop sa inyong korum ug pag-rescue sa dili kaayo mga aktibo, mokolekta sa mga halad sa puasa aron ikatabang sa mga kabus ug timawa, motrabaho alang sa mga masakiton ug sa may mga kakulangan, motudlo ug mopamatuod bahin ni Kristo ug sa Iyang ebanghelyo, ug mopagaan sa mga palas-anon sa mga nawad-an og kadasig.

Nangalagad kamo samtang nagtudlo kamo sa mga leksyon sa inyong mga miting sa korum ug sa inyong mga family home evening. Nangalagad kamo samtang nagdapit kamo sa tanan sa pagduol kang Kristo (tan-awa sa D&P 50:29)—diha sa panimalay, sa inyong korum, sa eskwelahan, uban sa full-time nga mga misyonaryo, ug bisan asa man kamo.

Ang Inyong Kaugmaon

Hisguti uban sa inyong mga ginikanan o mga adviser kon unsa ang inyong mga gikinahanglan alang sa umaabut nga mga buluhaton isip naghupot sa Melchizedek Priesthood, misyonaryo, bana, ug amahan. Isulat diha sa luna nga sulatanan ang pipila sa talagsaong mga responsibilidad ug unsaon nga maandam kamo niini karon samtang magserbisyo kamo sa Aaronic Priesthood. Tingali lisud kini sa pagkakaran, apan hinumdumi nga ang pinakamaayong paagi sa pag-andam mao lamang ang pagbuhat sa ipabuhath karon kaninyo sa Langitnong Amahan. Hinaut nga makaplagaan ninyo ang kalipay samtang magserbisyo kamo karon ug mag-andam alang sa mahimayaon ninyong kaugmaon. ■

ANG GAHUM SA PAGPANALANGIN SA TANANG MGA TAWO


Ang mga lider sa Simbahan nagtudlo nato nga ang mga ordinansa ug mga pakigsaad sa priesthood anaa para sa tanang mga anak sa Dios—mga lalaki ug mga babaye.



“Ang priesthood mao ang gahum ug awtoridad sa Dios nga gihatag alang sa kaluwasan ug panalangin sa tanan—kalalakin-an, kababayan-an, ug kabataan. . . .

“Adunay espesyal nga mga panalangin gikan sa Dios sa tanang takus nga mga tawo kinsa gibunyagan, midawat sa Espiritu Santo, ug miambit kanunay sa sakrament. Ang templo nagdala og dugang kahayag ug kalig-on, uban ang saad sa kinabuhing dayon [tan-awa sa D&P 138:37, 51].”

Elder Neil L. Andersen sa Korum sa Napulog Duha ka mga Apostoles, “Gahum sa Priesthood,” *Ensign* o *Liahona*, Nob. 2013, 92.



“Kini nga mga ordinansa ug mga pakigsaad sa priesthood naghatag og agianan ngadto sa kahingpitan sa mga panalangin nga gisaad kanato sa Dios, nga nahimong

posible pinaagi sa Pag-ula sa Manluluwas. Kini nagsangkap sa anak nga mga lalaki ug mga babaye sa Dios uban sa gahum, gahum sa Dios, ug naghatag nato og oportunidad sa pagdawat og kinabuhing dayon—sa pagbalik ngadto sa presensya sa Dios ug pagpuyo uban Kaniya diha sa Iyang mahangturingon pamilya.”

Carole M. Stephens, unang magtatambag sa kinatibuk-ang kapangulohan sa Relief Society, “Nahibalo ba Kita Unsay Anaa Kanato?” *Ensign* o *Liahona*, Nob. 2013, 12.



“Mahinungdanon kaayo nga kita makasabut nga ang Langitnong Amahan naghatag og paagi sa tanan Niyang mga anak nga makaangkon sa mga panalangin ug ma-

lig-on sa gahum sa priesthood. Importante sa plano sa Dios para sa Iyang espiritong mga anak mao ang Iyang kaugalingong pamahayag: “Mao kini ang akong buhat ug ang akong himaya—ang pagpahinabo sa pagka-imortal ug sa kinabuhi nga dayon sa tawo’ (Moises 1:39).”

Elder M. Russell Ballard sa Korum sa Napulog Duha ka mga Apostoles, “Kini ang Akong Buhat ug Himaya,” *Ensign* o *Liahona*, Mayo 2013, 19.



PAGHULAGWAY PINAAGI NI GAIL ARMSTRONG

PAGDALA SA MGA PANALANGIN SA PRIESTHOOD SA INYONG PANIMALAY



Ni Bonnie L. Oscarson
Kinatibuk-ang Presidente
sa Young Women

Samtang inyong tumanon ang inyong mga pakigsaad, inyong magamit ang gahum sa priesthood sa inyong panimalay ug pamilya.

Sa unsang paagi nga kamo isip usa ka batan-ong lalaki o batan-ong babaye, bisan unsa pa ang kahimtang sa inyong pamilya, makagamit sa gahum sa pakigsaad sa priesthood nga inyong gihimo sa bunyag sa paglig-on sa inyong mga panimalay ug pamilya? Ang pagsabot sa tahas ug kaimportante sa atong mga pamilya sa plano sa Ginoo makapadasig nato sa pagtahud sa mga saad nga atong gihimo pinaagi sa pagsiguro nga ang atong labing maayo ug madasigong pagserbisyo gihimo diha sa atong kaugalingong mga panimalay. Atong tan-awon ang pipila ka mga paagi nga kita makagamit sa gahum sa atong mga pakigsaad sa paglig-on ug pagserbisyo niadtong kinsa atong labing gimahal.

Unsaon Ninyo sa Pagtubag?

Lunes na sa gabii, ug kamo dunay daghan kaayong homework. Nakadungog mo sa inyong amahan nga nanawag sa pamilya nga magpundok na alang sa family home evening. Unsa ang inyong buhaton?

Kapilian A: Kamo motubag, “Ah, Pa, wala koy panahon para niana karong gabhiona! Kinahanglan kong magtuon!”

Kapilian B: Motabang dayon ka sa pagpundok sa imong mga igsoon ug malipayong moapil sa mga pag-ampo, musika, ug mensahe.

Kon Adunay Pangulo sa Priesthood diha sa Panimalay

Ang pagsuporta sa inyong mga ginikanan pinaagi sa pag-apil sa family home evening, pag-ampo sa pamilya, ug pagtuon sa kasulatan mao ang pipila ka mga paagi sa paglig-on sa pangulo sa priesthood diha sa inyong panimalay. Adunay daghang mga paagi, sama sa:

- Pag-ampo alang sa inyong mga ginikanan. (Sigurado gyud sila nga mag-ampo alang ninyo kada adlaw.)
- Pagsuporta sa inyong mga ginikanan sa ilang mga calling sa Simbahan ug pagtabang sa mga buluhaton sa balay, ilabi na kon sila nagkapuliki sa espesyal nga mga buluhaton.
- Pagtabang sa inyong mga ginikanan sa pag-abi-abi sa mga home teacher kon sila moabut, ug dayon maminaw sa ilang mensahe.

- Kon dunay templo sa inyong dapit, pagtanyag nga mobantay sa mga manghud aron ang inyong mga ginikanan makaadto sa templo ug makaapil sa mga ordinansa sa priesthood.

Hinumdumi nga dili lang ang mga ginikanan ang responsable sa pag-imbatar ug pagmentinar sa Espiritu sa inyong panimalay. Daghan kaayo ang inyong mahimo sa pagdapit sa Espiritu pinaagi sa inyong mga aksyon ug kinaiya. Gibuhat ba ninyo ang inyong bahin sa pagdapit sa impluwensya sa Espiritu sa inyong panimalay?

Kon Walay Pangulo sa Priesthood diha sa Panimalay

Ang mga pamilya dili pareha o wala maglihok sa samang paagi. Tingali kamo anaa sa pamilya nga single-parent ra o walay naghupot sa priesthood sa inyong panimalay. Aduna pay daghang mga paagi sa pagdapit sa gahum sa priesthood sa paglig-on kaninyo ug sa inyong pamilya. Mao kini ang mga butang nga kinahanglan natong buhaton tanan, bisan unsa pa ang atong mga kahimtang:

- Paghimo og personal nga pag-ampo, pagtuon sa kasulatan, ug pagpuasa. Kini nga mga paningkamot makatabang ninyo nga malig-on sa espirituhanong paagi ug modapit sa Espiritu nganha sa inyong kinabuhi ug ngadto sa mga dapit nga kamo adunay impluwensya.
- Paggahin og panahon sa pagpalambo sa inyong calling o buluhaton sa Simbahan ug mangandam alang sa mga leksyon sa Dominggo. Ang pagbuhat niini makatabang ninyo sa pagbaton og pagsalig sa inyong kaugalingon ug mopakita og suporta alang sa mga programa sa priesthood.
- Pagpakita og pagtahud alang sa tanang mga miyembro sa inyong pamilya ug pagsuporta sa ilang maanindot nga

mga kalihokan. Kini nga mga pagpili makatabang sa paglig-on sa tibuok pamilya.

- Pagpakigbahin ngadto sa inyong pamilya ang mga butang nga inyong nakat-unan ug gibuhat diha sa inyong mga klase sa Simbahan ug sa mga korum. Usa kini ka paagi sa pagtudlo sa mga pagtulun-an sa ebanghelyo nganha sa panimalay.
- Pangita og mga paagi sa pagserbisyo niadtong naglibut kaninyo pinaagi sa yanong mga buhat sa pagkamabination.
- Pagtabang sa mga buluhaton sa balay o pagtabang og igsoon.
- Pagpakita og Kristohanong gugma sa inyong pamilya—kini adunay dakong epekto sa pagtukod og lig-on nga mga relasyon sa pamilya kay sa bisan unsang lain ninyong buhaton.

Pagtuman sa Inyong mga Pakigsaad

Pinaagi sa pagserbisyo, paghigugma, ug paglig-on sa atong mga pamilya, kita nagmatinud-anon sa mga pakigsaad nga atong gihimo atol sa bunyag sa pagbarug isip saksi ni Jesukristo, pag-sunod sa Iyang mga sugo, ug paglig-on niadtong naglibut nato. Kita makagamit sa kalig-on sa mga pakigsaad sa priesthood aron mahimong usa ka panalangin ug tabang sa atong mga panimalay ug pamilya: *Priesthood, pagserbisyo, ug panimalay* mao ang mga pulong nga kinahanglang makonektar sa atong mga hunahuna sa kahangturan. Ang mga miyembro sa atong kaugalingong mga pamilya kinahanglang mao ang unang prayoridad samtang kita mangita og mga paagi sa pag-apil sa buhat sa kaluwasan. Kon kita naglig-on sa atong mga pamilya, gilig-on usab nato ang Simbahan, ang atong mga komunidad, ug ang kalibutan. ■



“Ang pamilya mahinungdanon ngadto sa plano sa Tiglalang alang sa walay katapusan nga destinasyon sa Iyang mga anak.”

“Ang Pamilya: Usa ka Pamahayag ngadto sa Kalibutan,” *Ensign* o *Liahona*, Nob. 2010, 129.



“Ang labing importante nga trabaho sa Ginoo nga ato gayud nga buhaton anaa sa sulod sa mga bongbong sa atong kaugalingong mga panimalay.”

Mga Pagtulun-an sa mga Presidente sa Simbahan:
Harold B. Lee (2000), 183.



ANG PAGSALIG SA KATAKUS

*Gusto kong mamulong og klaro kon
unsaon sa pagbaton og usa ka espesyal
kaayo nga matang sa pagsalig.*



**Ni Elder
Jeffrey R. Holland**
Sa Korum sa
Napulog Duha ka
mga Apostoles

Ang akong mensahe kaninyo mao ang mahitungod sa paglaum ug pagdasig karon ug sa tibuok ninyong kinabuhi. Adunay daghan nga mga kasamok sa kalibutan, apan sa kanunay adunay mga kasamok sa tanang panahon. Ayaw og kahasol niini, ug ayaw kasagmuyo niini. Ang umaabut nga katuigan puno sa maanindot nga mga oportunidad ug talagsaong mga panalangin. Kita padayon nga adunay mga paglambo sa siyensya ug teknolohiya, medisina ug komunikasyon—kining tanan may kalabutan sa pagpalambo sa atong kinabuhi. Nagpuyo kamo sa labing mahimayaon nga panahon sa kalibutan, uban sa daghan pang mga panalangin nga moabut ngadto sa daghan pang mga tawo sa tibuok kalibutan kay sa bisan unsang panahon sa kasaysayan. Hinumdumi—ang inyong lola wala mangandoy og usa ka digital tablet dihang siya sama pa ninyo og edad, ug ang inyong lolo walay ideya kon unsaon pag-text. Busa, pagmalipayon ug pagmahimsog ug pagmalaumon.

Ako mohisgut og tipik niini tungod kay ang usa ka artikulo nga akong gibasa bagohay lang miingon nga ang labing komon nga sakit sa mga kabatan-onan karon dili diabetes o sakit sa kasingkasing o kanser. (Kadtong mga matang sa mga problema sagad gireserba alang sa akong mga kaedad, dili sa inyoha.) Ang sakit nga sagad giantus sa mga

tin-edyer ug sa nag-edad og mga 20 anyos, sigon sa report, mao ang pagduha-duha, kahadlok mahitungod sa umaabut, ubos nga pagsalig sa kaugalingon, ug kakulang sa pagsalig sa ilang kaugalingon ug sa kalibutan nga naglibut kanila.

Bisan og magulang kaayo ko kay kaninyo, nasabtan gyud nako kana nga mga matang sa mga kabalaka tungod kay sa batan-on pa ko nakasinati usab ko og mga sitwasyon diin ako wala kaayoy pagsalig sa kaugalingon. Nakahinumdom ko nga naningkamot aron modako ang grado, nangandoy nga makaangkon og scholarship, ug natingala kon nganong ang uban mas hanas niana nga kategoriya kay kanako. Nakahinumdom ko sa mga katuigan sa mga athletic sport nga akong gisulayan sa pagdula uban sa pagsalig nga gikinahanglan alang sa kalampusan sa mga sport sa high school ug sa kolehiyo, gusto kaayo kong modaug sa big game o maangkon ang gitinguha nga championship. Labi pa nakong nahinumduman ang kakulang sa pagsalig bahin sa mga babaye, nga kasagaran maoy tighatag og kabalaka sa mga lalaki. Ako mapasalamatan nga si Sister Holland namasin kanako. Oo, akong mahinumduman ang tanan nga mga butang nga inyong nahinumduman—dili sigurado mahitungod kon unsay akong dagway o madawat ba ko o unsay akong kaugmaon.



Ang akong katuyoan dili ang paghisgut sa tanan nianang problemaha nga giatubang sa usa ka batan-on nga makahatag og pagduha-duha ug kakulang sa pagsalig, apan gusto kong mamulong og klaro kon unsaon sa pagbaton og usa ka espesyal kaayo nga matang sa pagsalig—usa ka pagsalig, nga kon maangkon sa saktong paagi, makahimo og kahibulongan sa matag aspeto sa atong kinabuhi, ilabi na sa pagsalig sa atong kaugalingon ug unsaon nato paglantaw ang umaabut. Sa paghimo niini nga punto, kinahanglan kong moasoy og istorya.

Ang Mithi sa Personal nga Katakus

Daghang tuig na ang milabay, sa wala pa ko matawag isip General Authority, miapil ko isip usa ka mamumulong sa komperensya sa young adult. Ang komperensya gitapos uban sa usa ka miting sa pagpamatuod diin ang gwapo, batan-ong returned missionary mibarug aron magpamatuod. Buotan siya tan-awon, limpyo, ug masaligon—ingon gayud sa panagway sa usa ka returned missionary.

Sa iyang pagsugod og sulti, ang mga luha milugmaw sa iyang mga mata. Siya miingon nga siya mapasalamaton nga mobarug taliwala sa maayo kaayo nga grupo sa batan-ong mga Santos sa Ulahing mga Adlaw ug bation ang kanindot sa kinabuhi nga iyang gipaningkamutang subayon. Apan kana nga pagbati nahimo lamang posible, siya miingon, tungod sa iyang kasinatian pipila ka tuig na ang milabay, usa ka kasinatian nga nakaumol sa iyang kinabuhi sa kahangturan.

Dayon misulti siya bahin sa iyang pagpauli sa balay gikan sa usa ka date human siya na-orden nga elder sa edad nga 18. Usa ka butang ang nahitabo niini nga date nga dili niya ikapasigarbo. Siya wala modetalye, ni mohimo niini diha sa publiko. Hangtud karon wala ko masayud sa panghitabo, apan ingon kini kaimportante ngadto kaniya nga naapektuhan ang iyang espiritu ug pagsalig sa iyang kaugalingon.

Samtang naglingkod siya sa iyang sakyanan sa makadiyot sa driveway sa iyang kaugalingong panimalay, naghunahuna sa mga butang ug mibati og tinud-anay nga kasubo sa nahitabo, ang iyang mama nga dili miyembro sa simbahan nagdagan gikan sa balay diretso sa iyang sakyanan. Diha-diha miingon ang iyang mama nga ang manghod niya nga lalaki bag-o lang nahulog sa panimalay, napantok ang ulo ug nagkirig-kirig. Ang amahan nga dili miyembro sa simbahan diha-diha dayon mitawag og ambulansya, apan dugay-dugay pa kining moabut.

“Dali ug buhata ang imong mahimo,” siya mituaw. “Wala ba moy himoon sa inyong Simbahan sa panahon nga sama niini? Ikaw aduna sa ilang priesthood. Dali ug buhata ang imong mahimo.”

Ang iyang inahan wala kaayo masayud bahin sa Simbahan nianang higayuna, apan siya dunay nasayran bahin sa mga panalangin sa priesthood. Apan, niining gabhiona dihang ang usa ka tawo nga iyang gihigugma og maayo nagkinahanglan sa iyang hugot nga pagtuo ug sa iyang kalig-on, kining batan-ong lalaki walay mahimo. Tungod sa pagbati nga iyang gipanlimbasugan ug sa dili maayong

Samtang naglingkod siya sa iyang sakyanan sa makadiyot sa driveway sa iyang kaugalingong panimalay, naghunahuna sa mga butang ug mibati og tinud-anay nga kasubo sa nahitabo, ang iyang mama nga dili miyembro sa simbahan nagdagan gikan sa balay diretso sa iyang sakyanan.





butang nga bag-o lang niyang gihimo—bisan unsa man kadto—dili siya makaduol sa atubangan sa Ginoo ug pangayoon ang panalangin nga gikinahanglan.

Migawas siyag dali sa sakyanan ug midagan paingon sa panimalay sa usa ka takus nga mas edaran nga lalaki sa ward nga nakighigala niya sukad sa iyang pagkakabig mga duha o tulo ka tuig na ang milabay. Mipasabut siya, ug ang duha mibalik sa balay sa wala pa miabut ang mga paramedic. Ang malipayong katapusan niini nga istorya sama sa gisulti diha sa miting sa pagpamatuod mao nga kining mas edaran nga lalaki mihatag diha-diha dayon og usa ka malumo, gamhanan nga panalangin sa priesthood, nga nakapakalma ug nakapapahulay sa samaran nga bata dihang ang medikal nga tabang miabut. Ang dinaliang pagbiyahe ngadto sa ospital ug pag-eksamin og maayo mipadayag nga walay permanenting kaudat ang nahimo. Ang maku-yaw nga panahon alang niini nga pamilya milabay ra.

Dayon ang returned missionary nga akong gihisgutan miingon niini: “Walay bisan usa kinsa wala makasinati sa akong nasinati nianang gabhiona ang masayud sa kaulaw ug sa kasubo nga akong gibati tungod sa pagbati nga dili takus nga mogamit sa priesthood nga akong gihuptan. Mas labaw kini ka sakit nga hinumduman alang kanako tungod kay ang akong manghud nga lalaki ang nanginahanglan kanako ug ang akong minahal nga dili miyembro nga mga ginikanan nga nalisang ug naglaum kaayo nako. Apan samtang ako nagbarug sa inyong atubangan karon, mosaad ko ninyo niini,” siya miingon. “Ako dili hingpit, apan sukad niadtong gabhiona ako wala na gayud makahimo og bisan unsa nga makapugong kanako sa pagduol sa atubangan sa Ginoo uban sa pagsalig ug mangayo sa Iyang tabang kon manginahanglan niini. Ang personal nga katakus mao

“Sukad niadtong gabhiona ako wala na gayud makahimo og bisan unsa nga makapugong kanako sa pagduol sa atubangan sa Ginoo uban sa pagsalig ug mangayo sa Iyang tabang kon manginahanglan niini,” siya miingon.

ang gipakig-awayan niini nga kalibutan diin kita nagpuyo,” siya miangkong, “apan mao kini ang panag-away nga akong daugon. Gibati nako ang tudlo sa panghimaraut nga mituli-sok kanako makausa sa akong kinabuhi, ug dili na gyud ko gusto nga bation kini pag-usab kon ako adunay mahimo kalabut niini. Ug, siyempre,” siya mitapos, “makahimo ko sa *tanang* kalabut niini.”

Iyang gitapos ang iyang pagpamatuod ug milingkod. Makahulagway pa gihapon ko niya. Maaninaw pa gihapon nako ang maong sitwasyon. Ug mahinumduman pa gihapon nako ang makapasubo, makapatandog nga kahilum human sa iyang mga pakigpulong samtang ang matag usa mas namalandong sa iyang kalag, mas lig-ong misaad nga mosunod sa gamhanan nga mga pulong nga gihatag sa Ginoo:

“Himoa ang hiyas nga modayan-dayan sa inyong mga hunahuna nga walay paghunong; *unya ang imong pagsalig mosamot pagkalig-on diha sa atubangan sa Dios*; ug ang doktrina sa pagkapari motuhop diha sa imong kalag ingon sa mga yamog nga gikan sa langit.

“Ang Espiritu Santo mahimo nga imong kauban, ug ang inyong pagmando usa ka dili mausabon nga pagmando sa pagkamatarung ug kamatuoran” (D&P 121:45–46; *empasis gidugang*).

Pagtagamtam sa Espiritu sa Dios

Akong minahal nga batan-ong mga higala, batuni ang usa ka talagsaon nga kinabuhi. Hunahunaa ang labing maayo ug laumi ang pinakamaayo ug batuni ang hugot nga pagtuo sa umaabut. Kamo adunay nindot nga kinabuhi nga nagpaabut. Ang inyong Langitnong Amahan nahigugma kaninyo. Kon adunay sayop nga nabuhat, mahinulsulan ug mapasaylo kini sama sa nahitabo niining batan-ong lalaki. Kamo aduna sa tanan nga angayng pakabuhian ug plano-han ug tuohan. Ang pagsunod sa inyong konsensya kon kamo mag-inusara sa inyong mga panumduman motugot kaninyo nga mobati sa Espiritu sa Dios sa usa ka personal kaayo nga paagi. Gusto ko nga matagamtam ninyo kana nga Espiritu, mobati niana nga pagsalig diha sa atubangan sa Ginoo kanunay. Unta ang mahiyason nga mga hunahuna makapalunsay sa atong binuhatan karon ug ugma ug hangtud sa kahangturan. ■

Gikan sa usa ka fireside alang sa kabatan-onan nga gihatag niadtong Disyembre 31, 2006.

ANG GANGHAAN ug ANG DALAN

Ang mga ordinansa ug mga pakigsaad sa priesthood mipahimutang nato sa dalan sa kinabuhing dayon ug mopanalangin nato sa kalig-on nga atong gikinahanglan karon.


Kitang tanan nagtinguha og kinabuhing dayon, diin nagpasabut nga maluwas ug mahimaya sa kinatas-an sa celestial nga gingharian, diin kita makapuyo sa presensya sa Langit-nong Amahan isip mga pamilya.

Ang mga ordinansa ug mga pakigsaad sa priesthood nagtugot nato sa pagsulod sa dalan padulong sa kinabuhing dayon. Dili igsapayan kon kanus-a kamo misubay niini nga dalan o diin na kamo dapit niini—bisan natawo man kamo sa Simbahan o nakabig, aktibo man kamo sa tibuok kinabuhi o bag-o lang mibalik sa pagkaaktibo sa kalihokan sa Simbahan—kamo mouswag subay niini samtang kamo mag-focus sa inyong mga pakigsaad ug unsay inyong mahimo sa pagdawat ug pagsunod niini.

Dugang sa hugot nga pagtuo diha kang Jesukristo ug paghinulsol, ang mga ordinansa ug mga pakigsaad sa priesthood makapahimo nato sa pagsubay sa dalan paingon sa kinabuhing dayon. Naghatag usab kini nato sa kalig-on, kahupayan, ug suporta nga atong gikinahanglan karon sa pagsubay sa dalan ug paglahutay hangtud sa katapusan diha sa pagkamatung. ■

ANG DALAN
PADULONG SA
KINABUHING DAYON
(PAGLAHUTAY HANGTUD
SA KATAPUSAN)

Tan-awa sa 2 Nephi 31



BUNYAG



“Ang awtoridad sa priesthood diha sa Simbahan ang nagpahigayon sa sagrado nga mga ordinansa ug mga pakigsaad nga nagbugkos sa mga pamilya ug naghatag nato og kahigayunan nga

makabalik ngadto sa Dios nga Amahan ug ni Jesukristo sa celestial nga gingharian. Kini nga mga ordinansa makahatag og kalinaw tungod kay kini nga pakigsaad uban sa Ginoo.”

Elder Quentin L. Cook sa Korum sa Napulog Duha ka mga Apostoles, “Personal nga Kalinaw: Ang Ganti sa Pagkamatarung,” *Ensign* o *Liahona*, Mayo 2013, 34.




Sakrament—
sinemana nga pagbag-o
sa pakigsaad sa bunyag

GASA SA ESPIRITU SANTO

IMPORANTE NGA MGA ORDINANSA UG MGA PAKIGSAAD
PAGBAG-O UG PAGLIG-ON SA MGA ORDINANSA

Patriyarkal nga panalagin—
espesyal nga giya sa indibid-
wal ug ang gisaad nga mga
panalagin



PAGTUGYAN UG ORDINASYON SA
PRIESTHOOD (ALANG SA BATAN-ONG
MGA LALAKI)



ENDOWMENT DIDTO SA TEMPLO

Panalagin alang
sa mga masakiton—
pagtabang ug pag-ayo

Ang mga panalagin sa
amahan ug ubang mga panalagin
sa kahupayan ug tambag—
kalinaw ug giya nga gikinahanglan



SEALING DIDTO SA TEMPLO



MGA TABANG DIHA SA DALAN

Mga Kasulatan—giya ug panudlo
nadawat isip kabahin sa pakigsaad
tali sa Dios ug sa Iyang mga katawhan
(tan-awa sa D&P 84:57)

Pag-ampo—“[Ang Manluluwas]
mitanyag nato sa pakigsaad nga ‘ka-
nunay mohinumdom Kaniya’ ug ang
pasidaan sa ‘pag-ampo kanunay’ aron
atong mabutang ang atong pagsalig
diha Kaniya, ang bugtong nato nga
kaluwasan” (Presidente Henry B.
Eyring, Unang Magtatambag sa Unang
Kapangulohan, “Always,” *Ensign*, Okt.
1999, 9).

Pagserbisyo—pagtuman sa atong
mga pakigsaad pinaagi sa pagserbisyo
sa Dios ug sa Iyang mga anak, lakip sa
mga calling, buhat sa templo ug family
history, pagpakigbahin sa ebang-
helyo, full-time nga misyonaryo nga
pagserbisyo.

Paghinulsol—paghinumdom sa
atong mga pakigsaad ug pagpaduol
sa Manluluwas kon kita nahisalaag,
usahay lakip ang tabang gikan sa
mga lider sa priesthood



“Ang pagpabilin diha
sa dalan sa ebanghelyo
sa mga pakigsaad,
mga sugo, ug mga ordi-
nansa **manalipod**
ug **moandam** nato
sa paghimo sa buhat
sa Dios dinhi sa kalibutan.”

Elder Robert D. Hales sa Korum sa Napulog
Duha ka mga Apostoles, “Lig-ong Mobarug
sa Balaan nga mga Dapit,” *Ensign o Liahona*,
Mayo 2013, 49.



“Samtang kamo takus
nga moapil sa mga
ordinansa sa priesthood,
ang Ginoo mohatag
kaninyo og mas dako
nga **kalig-on, kali-
naw ug mahangtu-
kong panan-aw.**”

Elder Neil L. Andersen sa Korum sa Napulog
Duha ka mga Apostoles, “Gahum sa Priesthood,”
Ensign o Liahona, Nob. 2013, 95.

**KINABUHING DAYON
(CELESTIAL NGA GINGHARIAN UBAN
SA PAMILYA)**

“Unsay akong buhaton kon sa eskwelahan tukion ang hilisgutan nga supak sa mga pagtulun-an sa ebanghelyo, sama sa aborsyon?”

Adunay daghang mga paagi sa pagtubag—o dili—depende sa sitwasyon. Una, hunahunaa kon unsa kaha ang mahitabo kon ikaw ba mosulti o dili mosulti og usa ka butang. Kon ang imong kahilom makapahunahuna sa uban nga kamo uyon sa usa ka butang nga imong nahibaloan nga sayop, mahimo kang mangita og yanong paagi sa pagsulti sa imong wala pag-uyon. Kon ikaw naghunahuna nga ang imong mga komentaryo maoy hinungdan sa panagbingkil, nan makapangita ka og laing okasyon nga makakomentaryo. Hinoon, kon ang imong klase matinahuron sa usag usa ug ang magtutudlo naghanyo og partisipasyon, mahimo kang mag-ampo alang sa inspirasyon ug dayon ipasabut ang imong mga gituohan.

Makapangandam kang daan kon makahibalo ka nga ang imong klase maghisgot og piho nga hilisgutan. Agig dugang sa mga kasulatan ug mga pakigpulong sa komperensya kabahin sa hilisgutan, tan-awa sa *Matimud-anon sa Timuhoan, Mga Baruganan sa Ebanghelyo*, o *Alang sa Kalig-on sa Kabatan-onan*. Mahimo usab kang magpraktis sa pagpasabut sa mga hilisgutan diha sa family home evening. Kon andam ka na, pakigsulti sa imong magtutudlo o sa imong mga kaklase.

Ang paagi sa imong pagtubag sama kaimportante sa *unsay* imong isulti. Pagmatinahuron ug paningkamot nga dili mogamit sa mga terminolohiya sa Simbahan. Ang imong mga kaklase dili makasabut kon ikaw moingon, “Usa ka tigtagbag sa Young Women sa akong ward mitudlo nako nga . . .”

Unsa ang labing importante mao nga ikaw makahibalo unsa ang gitudlo sa Simbahan ug unsa ang gisulti sa Espiritu Santo nimo aron ikaw dili malingla sa mga sayop nga imong madungog o mabasa sa klase.

Hinumdumi Kinsa ang Imong Girepresentaran

Kon nag-atubang niini nga mga sitwasyon, hinumdumi nga mahimong lahi ang gibati sa uban sa mao nga hilisgutan kay kanimo. Ayaw pag-inarogante o mapugsanon, apan ayaw kahadlok sa pagpanalipod sa imong mga gituohan. Hinumdumi nga ikaw nagrepresentar ni Kristo.

Madeline K., edad 16, Wyoming, USA



Pagmabination

Akong gibati nga ako kinahanglan nga mopakigbahin sa akong panglantaw sa matinahuron nga paagi ug usab mosulti nganong mituo ko niini. Wala ko magtuo nga kinahanglang motuo sila sa akong gituohan, apan ako nagtuo nga sila kinahanglang masayud unsay akong baruganan sa piho nga mga hilisgutan ug makasabut sa akong panglantaw.

Sabrina S., edad 16, Oregon, USA



Pagmatinahuron

Importante nga kita paminawon, apan importante usab kaayo nga magmatinahuron sa pagtuo sa uban. Ayaw pakiglalis. Ang panaglalis makamugna og mga kaaway ug kalibug. Kon ang usa ka ideya gihisgutan nga supak sa atong relihiyon, pagpabilin nga kalma, mag-focus ug magmatinahuron, ug dili malimot sa pagpaminaw sa Espiritu. Adunay mga butang nga dili nato masabtan nga nasabtan sa Dios. Kita kinahanglang maminaw ug magkat-on gikan sa Iyang Espiritu.

Hannah M., edad 18, Utah, USA

Pagpakigbahin kon Unsa ang Gitudlo sa Simbahan

Maningkamot ko sa pagtubag sa ingon nga mga pangutana kutob sa akong mga mahimo tungod kay ang akong mga higala ug mga magtutudlo wala masayud, gawas kon ako mosulti kanila, sa baruganan sa Simbahan sa ingon nga mga hilisgutan. Pinaagi sa pagbuhat niini, sila makahibalo sa ilang pakisayran sa umaabut, ug kamo makabenepisyo sa espirituhanong paagi. Hinumdumi: “Pasigaa ninyo ang inyong kahayag sa atubangan sa mga tawo aron makita nila ang inyong mga maayong buhat ug dayegon nila ang inyong Amahan nga anaa sa langit” (Mateo 5:16).

Joshua M., edad 16, Manchester, England



Tabangi ang Uban nga Maghunahuna kon Unsa Ang Matarung

Ipakigbahin ang imong mga pagbati sa matinutorong paagi. Daghang mga hilisgutan sa eskwelahan, sama sa aborsyon, ang gidibatehan pag-ayo, busa ayaw kaulaw sa pagtingog. Maayo kini nga kahigayunan sa pagpakigbahin sa ebanghelyo ug sa mga sumbanan nga atong gituohan. Kon ikaw makigbahin sa imong mga gituohan, makatabang ikaw sa mga tawo nga maghunahuna kon unsa ang matarung.

Madison R., edad 14, North Carolina

Korhii ang Sayop nga Doktrina

Kita sakop sa Simbahan nga missionary-minded diin kitang tanan gitawag sa pagsangyaw; busa, dili kita motugot nga ang sayop nga doktrina mokaylap. Sa ingon nga mga sitwasyon, kinahanglan kita nga mamulong sa pagkorihir sa bisan unsang sayop nga doktrina ug pagtabang sa mga tawo nga makasabut sa panglantaw

sa gipahiuli nga ebanghelyo kalabut sa hilisgutan.

David M., edad 16, Kasai-Occidental Province, Democratic Republic of Congo



Sayri ang Baruganan sa Simbahan

Diha ko sa kurso diin ang kontrobersyal nga mga hilisgutan kanunayng gituki. Ang unang butang nga buhaton mao ang pagtahud sa pagtuo sa uban, sama sa imong gipaabut gikan sa imong isig ka kauban sa klase. Kon ang hilisgutan direkta nga sumpaki sa simbahan, sa gawasnong paagi ipahayag ang imong opinyon. Dili kinahanglang hisgutan nimo ang Simbahan sa imong tubag. Hinoon, siguroha nga nakahibalo ka sa baruganan sa Simbahan niining mga butanga.

Joseph Z., edad 18, Maryland, USA

Paglikay sa Panagbingkil

Akong ipasabut ang akong opinyon, manalipod sa akong mga baruganan ug mga doktrina sa Simbahan, magtahud sa mga ideya sa uban. Dili ko makiglalalis, nga mopapahawa sa Espiritu, nga makaimpluwensya sa uban sa positibong paagi.

Daiana V., edad 15, Buenos Aires, Argentina



PAGBARUG NGA LIG-ON

“Ang atoa mao ang pagpasabut sa atong posisyon pinaagi sa rason, hinigala nga pagdani, ug tukma nga mga kamatuoran. Ang atoa mao ang lig-on nga pagbarug ug dili matarug sa moral nga mga isyu niining higayona ug sa mahangtulong mga baruganan sa ebanghelyo, apan dili makigbikil ni bisan kinsang tawo o organisasyon. Ang panagbingkil makahimo og mga problema ug mga babag. Ang gugma moabli sa mga pultahan.”

Elder Marvin J. Ashton (1915–94) sa Korum sa Napulog Duha ka mga Apostoles, “No Time for Contention,” Ensign, Mayo 1978, 8.

UMAABUT NGA PANGUTANA

“Unsaon nako nga mahimong komportable nga makig-istorya sa akong bishop mahitungod sa mga isyu o mga problema?”

Ipadala ang inyong tubag ug, kon ganahan, klaro kaayo nga litrato inig Mayo 15, 2014, ngadto sa liahona@ldschurch.org o pinaagi sa koreyo (tan-awa ang address sa pahina 3).

Ang mga tubag tingali i-edit alang sa gitas-on o sa pagklaro.

Ang mosunod nga impormasyon ug pagtugot kinahanglan gayud nga ilakip sa inyong tubag: (1) kompleto nga pangalan, (2) petsa sa pagkatawo, (3) ward o branch, (4) stake o district, (5) ang inyong sulat sa pagtugot, ug, kon kamo ubos sa 18 anyos, ang sinulat nga pagtugot sa inyong ginikanan (ang e-mail dawaton) sa pagmantala sa inyong tubag ug litrato.

**MGA LEKSYON
SA DOMINGGO**

Ang Hilisgutan Niining Bulana:
**Ang Apostasiya ug
ang Pagpahiuli**

HUSTO O SAYOP?

Usahay ang pag-ila sa kamatuoran gikan sa sayop lisud, apan ang atong Langitnong Amahan mihatag nato og gamhanang mga gasa nga makatabang nato sa pag-ila tali sa kamatuoran sa Dios ug pamakak ni Satanas.

Ni David A. Edwards
Mga Magasin sa Simbahan

Kon kamo nakakuha og test sa husto o sayop nga mga pangutana, nasayud kamo nga usahay lisud ang pag-ila sa sayop. Sa samang paagi, sa dakong mga pangutana sa hugot nga pagtuo, tinuohan, ug matag adlaw nga pagpuyo, samtang importante kaayo nga makaila sa kalainan tali sa unsay tinuod ug unsay dili, dili kini kanunay sayon.

Hinoon, kita dili angay nga mahadlok sama sa dili andam nga mokuha og test. Ang atong Langitnong Amahan nagpanalangin nato og daghang mga gasa sa pagtabang nato sa pag-ila sa Iyang mga kamatuoran ug sa mga bakak sa kaaway.

Lain-laing mga Matang sa Bakak

Una, sa paghulagway sa usa ka punto, aniyay mubo nga husto o sayop nga eksamin alang ninyo:



1

Ang buwan berde.

HUSTO SAYOP

Si Neil Armstrong, ang astronaut sa Apollo 12 kinsa mao ang unang tawo nga nakalakaw sa buwan, miingon nga ang panghitabo usa ka “dako nga kauswagan sa tawo.”

HUSTO SAYOP

2



3

Ang programa sa National Aeronautics and Space Administration (NASA) dili makaadto sa Mars niadtong 1969, mao nga sila kinahanglang moadto sa buwan.

HUSTO SAYOP



4

Ang solar nga hangin, radiation, cosmic rays, ug ubang mga babag nakapaimposible sa pagtunob sa tawo sa buwan, pun-an sa mga litrato nga mora og giusab ug ang asoy sa mga saksi wala magkauyon sa pipila ka detalye, mao nga hinimo-himo ra sa gobyerno sa US ang maong panghitabo.

HUSTO SAYOP

Modernong mga Bakak

Kon kabahin sa mga butang nga makaimpluwensya sa inyong mga hunahuna, pagtuo, pagpili, ug kinaiya—sa mga butang nga dunay mahang-turong mga sangputanan—maayo gyud nga magbantay sa lain-laing mga matang sa bakak, tungod kay si Satanas, “ang amahan sa mga bakak” (2 Nephi 9:9), mogamit sa bisan unsa nga pamaagi aron sa paglingla nato. Aniyay pipila ka mga ehemplo kon unsaon niya pagbuhat niini karon, ingon man usab mga ehemplo kon sa unsang paagi kita makatubag gamit ang kamatuoran.

Ang tubag sa kada pangutana *Sayop*, ug kini nga mga pangutana nagrepresentar sa pipila ka nag-unang matang sa bakak nga tingali inyong masugatan.

Pangutana 1 usa ka *yanong bakak*, ug klaro nga sayop. Pangutana 2 usa ka *parsyal nga kamatuoran*, nga lisud, tungod kay giubanan ang usa o daghang mga kamatuoran og usa ka bakak (ang Apollo 11, dili Apollo 12—nabitik ka!). Pangutana 3 dunay *sayop nga pagbahin*, o usa ka sitwasyon diin duha lamang ka opsyon ang gipresentar nga dili lamang mao ray mga opsyon (ang NASA mahimong mopili sa dili pag-adto bisan asa, pananglit). Pangutana 4 usa ka *nga “makatarunganon” nga argumento*, nga gikan sa resonable apan sa kasagaran sayop nga ebidensya aron mopadulong ngadto sa usa ka piho nga sayop nga paghukom.

Yanong Walay Kamatuoran

Sayop nga Ideya:

Ang pornograpiya normal ug dili makapasakit ni bisan kinsa.

Asa kini Paingon (Dakong Bakak):

Busa padayon ug tan-aw sa pornograpiya.

Ang Kamatuoran:

Ang pornograpiya motuis sa atong paglantaw sa seksualidad, makaadik, makadaut nato pag-ayo sa espirituhanong paagi, ug makaguba sa mga relasyon.

Parsyal nga Kamatuoran

Sayop nga Ideya:

Ang matag tawo talagsaon ug mahimong magpakabuhi sumala sa iyang pagpili, mao nga sa unsa nga paagi kamo mobati ug mopadayag sa kaugalingon mao ang labing importanting mga butang sa inyong kinabuhi.

Asa kini Paingon (Dakong Bakak):

Kinahanglang dili kamo motugot sa Dios o sa Simbahan nga molsulti ninyo unsaon sa pagpuyo, busa padayon ug buhata unsay inyong gusto kon kini makapanindot sa inyong pagbati.

Ang Kamatuoran:

Matag usa nato talagsaong anak sa Langitnong Amahan, kinsa gusto nga mahimo kitang labing maayo ug mahimong sama Kaniya. Ang pagkamasulundon sa Iyang mga sugo makatabang nato nga makabaton og hingpit nga kalipay.

MGA LITRATO PINAAGISA I STOCK/THINKSTOCK

Unsaon aron Masayud sa Kamatuoran

Busa asa gikan ang mas kompleto nga pagtan-aw sa kamatuoran? Sa unsa nga paagi nga kita dili mailad sa mga bakak? Ania ang pipila sa gamhanang mga gasa nga gihatag sa Langitnong Amahan nato sa pag-ila sa kamatuoran gikan sa sayop.

- **Ang Kahayag ni Kristo.** “Ang Kahayag ni Kristo . . . nag-aghat sa tanang maayong mga indibidwal sa tibuok yuta sa pag-ila sa kamatuoran gikan sa sayop, sa tinuod gikan sa sayop. Kini makapalihok sa inyong konsensya.”¹
- **Ang Espiritu Santo.** “Ang Espiritu sa kamatuoran . . . magatultol kaninyo ngadto sa tibuok nga kamatuoran” (Juan 16:13).
- **Mga Kasulatan.** “Ang Dios naggamit sa kasulatan sa pagdiskobre sa sayop nga panghunahuna, sayop nga mga tradisyon ug sala uban sa grabeng mga epekto.”² Ang Basahon ni Mormon importante kaayo kabahin niini, kay kini “nagbutyag sa mga kaaway ni Kristo. Molibug kini sa sayop nga mga doktrina ug mopawala sa mga panagbingkil. (Tan-awa sa 2 Ne.3:12.)”³
- **Bag-ong mga propeta.** “Ang responsibilidad sa [usa ka propeta] mao ang pagpaila sa kabubut-on sa Dios ug tinuod nga kinaiya ngadto sa katawhan. . . . Ang usa ka propeta misaway sa sala ug nanagna sa mga sangputanan niini.”⁴
- **Edukasyon.** “Ang usa ka santos . . . nagtinguha sa pagkat-on pinaagi sa pagtuon, ug usab pinaagi sa hugot nga pagtuo. Ang edukasyon . . . makapahimo sa usa ka tawo sa pag-ila sa kamatuoran gikan sa sayop, ilabi na pinaagi sa pagtuon sa

Sayop nga Pagbahin
(Duha Lamang ka Kapilian)

Sayop nga Ideya:

Ang Simbahan nagsangyaw batok sa pamaagi sa pagpakabuhi; busa, kini dili matugtanon ug nasilag sa mga tawo—dili kini madawaton ug mahigugmaon.

Asa kini Paingon (Dakong Bakak):

Tungod kay ang Simbahan dili matugtanon ug masilagon, angayan kining sawayon, biay-biayon, ug panghimarauton, mao nga kinahanglan kamong mohunong sa pagpakig-uban niini.

Ang Kamatuoran:

Ang dili pagdawat sa pamaagi sa pagpakabuhi sa ubang tawo wala magpasabut og kasilag ug pagkadili matugtanon. Kita makapakita og kalooy, pagtahud, ug pagkamabination ngadto sa tanan—lakip sa mga tawo kansang pamaagi sa kinabuhi supak sa balaod sa Dios—samtang nagpabiling matinuoron ngadto sa Dios ug sa Iyang mga sugo.

“Makatarunganon”
nga Argumento

Sayop nga Ideya:

Pipila ka mga butang diha sa Basahon ni Mormon gisupak sa karon nga siyentipikanhong ebidensya, ug ang mga istorya kon giunsa kini sa paghubad wala magkapatreha, mao nga tingali hinimohimo kini ni Joseph Smith o kinopya kini sa uban.

Asa Kini Paingon (Dakong Bakak):

Ang Basahon ni Mormon dili tinuod ug si Joseph Smith dili usa ka propeta, busa hunong sa pagpakig-uban sa Simbahan.

Ang Kamatuoran:

Ang siyensya nagpamatuod sa daghang mga butang diha sa Basahon ni Mormon, ug ang “ebidensya” batok niini sayop. Apan ang labing importante nga ebidensya alang niini mao ang pagsaksi sa Espiritu nga nagsulti ninyo nga kini tinuod ug nga si Joseph Smith usa ka tinuod nga propeta.

mga kasulatan. (Tan-awa sa D&P 88:118.)⁵

Bisan og dili sayon kanunay ang pagtubag *Husto* o *Sayop* kon magatubang sa tanang lain-laing mga ideya, ang mga gasa nga gihatag sa Langitnong Amahan ninyo makatabang ninyo nga makalahutay sa pagsulay. ■

MUBO NGA MGA SULAT

1. Richard G. Scott, “Kalinaw sa Tanlag ug Kalinaw sa Hunahuna,” *Ensign* o *Liahona*, Nob. 2004, 15.
2. D. Todd Christofferson, “Ang Panalangin sa Kasulatan,” *Ensign* ug *Liahona*, Mayo 2010, 33–34.
3. Ezra Taft Benson (1899–1994), “The Book of Mormon Is the Word of God,” *Ensign*, Mayo 1975, 64.
4. Giya ngadto sa mga Kasulatan, “Propeta,” scriptures.lds.org.
5. Russell M. Nelson, “Thus Shall My Church Be Called,” *Ensign*, Mayo 1990, 16.

APIL SA PAG-ISTORYAHANAY

Mga Butang nga Palandungon sa Dominggo

- Sa unsang paagi nga ang Langitnong Amahan mitabang ninyo sa pag-ila sa kamatuoran?
- Sa unsang paagi kamo makabatok sa sayop?
- Sa unsang paagi kamo makadasisig sa uban nga makahibalo sa kamatuoran?

Mga Butang nga Mahimo Ninyong Buhaton

- Sa simbahan, ipakigbahin kon sa unsang paagi kamo mituo nga ang gipahiuli nga ebanghelyo tinuod.
- Sa social media, pagpakigbahin og kamatuoran ug sa unsang paagi kamo nasayud niini.



Ni Elder Enrique R. Falabella
Sa Seventy

“Sayon ra Kaayo Kana, Lolo!”

“Kamo nagasusi sa mga kasulatan, kay nagahunahuna man kamo nga pinaagi niini makakaplag kamo sa kinabuhing dayon: ngani kini mao ang nagapanghimatuod mahitugod kanako” (Juan 5:39).

Gimahal nako ang Basahon ni Mormon ug ang akong Manluluwas, nga si Jesukristo. Usa ka adlaw nangutana ko sa akong apong babaye nga si Raquel kon unsay iyang hunahuna bahin sa paghimo og tumong sa pagbasa sa Basahon ni Mormon. Bag-o lang nakat-on si Raquel sa pagbasa.

“Apan, Lolo,” siya miingon, “lisud kaayo na. Baga kana nga libro.”

Dayon gihangyo nako siya sa pagbasa kanako og usa ka pahina. Nagkuha ko og stopwatch ug giorasan ang iyang pagbasa. Miabut lang og tulo ka minuto ang iyang pagbasa sa pahina.

Among basahon ang Basahon ni Mormon sa Kinatsila, ug ang bersyon sa Basahon ni Mormon sa Kinatsila dunay 642 ka mga pahina. Giingnan nako siya nga kini molungtad og 1,926 ka minuto sa pagbasa sa tibuok nga basahon.

Nakapahadlok hinoon niya kini, mao nga akong gibahin kana sa 60 ka minuto. Giingnan nako siya nga 32 ka oras ra ang pagbasa sa basahon. Wala kaabut og usa ka adlaw ug tunga!

Dayon siya miingon nako, “Sayon ra kaayo kana, Lolo.”

Misobra og gamayng panahon ang pagbasa ni Raquel, iyang igsoon nga lalaki, Esteban, ug among mga apo sa Basahon ni Mormon. Kini tungod kay kon mobasa kami niini, kami kinahanglan nga mogahin og panahon sa pag-ampo ug sa paghunahuna kon unsay among gibasa.

Sama ni Raquel ug Esteban, kitang tanan makakat-on sa paghigugma sa mga kasulatan. Dayon ang matag usa nato makasinggit: “Pagkatam-is gayud sa imong mga pulong sa akong pagtilaw! oo, labing matam-is pa kay sa dugos sa akong ba-ba!” Mga Salmo 119:103. ■

Gikan sa pakigpulong sa Abril 2013 nga kinatibuk-ang komperensya.





Ni Carole M. Stephens

Unang Magtatambag sa Kinatibuk-ang Kapangulohan sa Relief Society

ANG SAAD



Sa dihang namatay ang akong Sugangan nga lalaki, ang among pamilya nagpundok aron pagtimbaya niadtong nangabut aron mopahabuso. Sa tibuok gabii, samtang nakigistorya ko sa pamilya ug mga higala, nakamatikod ko sa among 10 anyos nga apo, si Porter, nagbarug duol sa akong ugangan nga babaye—iyang lola. Usahay magbarug siya sa luyo sa iyang lola, magtan-aw niya. Nakamatikod ko kausa nga gigunitan niya ang bukton sa iyang lola. Nakabantay ko nga iyang hapuhapon ang iyang mga kamot, mogakos niya, ug magtindog tupad niya.

Sulod sa daghang mga adlaw

human niana nga kasinatian, dili mawala sa akong hunahuna kini nga talan-awon. Naaghat ko sa pagpadala ni Porter og sulat. Gisultihan ko siya unsay akong nakita ug gibati. Gipahinumduman usab nako siya sa mga **pakigsaad** nga iyang gihimo sa dihang gibunyagan siya, nagkutlo sa mga pulong ni Alma nga anaa sa Mosiah kapitulo 18:

“Ug karon, ingon nga kamo mga matinguhaon sa pag-ipon ngadto sa panon sa Dios, ug pagatawgon nga iyang mga katawhan, ug andam sa pagtambayayong sa usag usa nga mga alantuson, nga sila mahimo nga magaan;

“Oo, ug mga andam sa pagbangutan uban niadto nga nagbangutan; oo, ug sa paghupay niadto nga nagkinahanglan sa kahupayan, ug mobarug ingon nga mga saksi sa Dios sa tanan nga mga panahon ug diha sa tanan nga mga butang, ug diha sa tanan nga mga dapit nga kamo mahimo nga maanaa, bisan hangtud sa kamatayon, . . . nga kamo makabaton og kinabuhi nga dayon—

“ . . . Kon mao kini ang tinguha sa inyong mga kasingkasing, unsay anaa kaninyo batok sa pagpabunyag diha sa ngalan sa Ginoo, ingon og usa ka saksi sa iyang atubangan nga kamo nakasulod ngadto sa usa ka

NI PORTER

Ang pakigsaad usa ka saad tali kaninyo ug sa Langitnong Amahan.

pakigsaad uban kaniya, nga kamo mag-alagad kaniya ug maghupot sa iyang mga sugo, nga siya unta mo-bu-bu sa kabuhong sa iyang Espiritu diha kaninyo?” (mga bersikulo 8–10).

Akong gipasabut ngadto ni Porter nga gitudlo ni Alma nga kadtong kinsa gustong magpabunyag kina-hanglang andam sa pagserbisyo sa Ginoo pinaagi sa pagserbisyo sa uban—sa imong tibuok kinabuhi! Miingon ko: “Wala ko kahibalo kon nakaamgo ba ikaw niini, apan sa imong pagpakita og gugma ug pag-pakabana alang ni Lola nagtuman ka sa imong **mga pakigsaad**. Atong gituman ang atong **mga pakigsaad** kada adlaw kon kita mabination, magpakita og gugma, ug moatiman

sa usag usa. Gusto lang ko nga mahibalo ka nga mapagarbuhon kaayo ko nimo sa imong pagtuman sa **pakigsaad**! Kon ikaw magtuman sa **pakigsaad** nga imong gihimo sa dihang gibunyagan ka, makaandam ka nga maordinahan ngadto sa priesthood. Kining dugang nga **pakigsaad** makahatag nimo og dugang mga oportunidad sa pagpanalagin ug pagserbisyo sa uban ug makatabang sa pag-andam nimo sa mga **pakigsaad** nga imong himoon sa templo. Salamat sa imong maa-yong ehemplo ngari nako! Salamat sa imong pagpakita nako kon unsa ang pagtuman sa **pakigsaad**!”

Mitubag si Porter: “Lola, salamat sa mensahe. Sa dihang naggakos

ko kanunay ni Lola, wala ko kahibalo nga nagtuman diay ko sa **mga pakigsaad**, apan akong gibati ang kainit sa kasingkasing ug mibati og nindot. Nasayud ko nga ang Espiritu Santo kadto diha sa akong kasingkasing.”

Gibati usab nako ang kainit sa kasingkasing sa dihang nakaamgo ko nga si Porter nasayud nga kon siya nagtuman sa iyang **mga pakigsaad**, siya “kanunayng makabaton sa Espiritu [sa Langitnong Amahan] uban [kaniya]” [D&P 20:77]. Kini usa ka saad nga mahimong posible pinaagi sa pagdawat sa gasa sa Espiritu Santo. ■

Gikan sa “Kita Adunay Dako nga Rason nga Maglipay, Ensign o Liahona, Nob. 2013, 115–16.



MAGMAHIMONG USA KA TIGTUMAN SA PAKIGSAAD!

Kon ako bunyagan,
ako mosaad nga . . .

Mopakita og gugma ug pagkamabination,
Mohupay niadtong magul-anon,
Mosunod sa mga sugo sa Langitnong Amahan,
Ug mosulti sa uban mahitungod sa Langitnong Amahan.

Agi og balos, ang Langitnong
Amahan nagsaad nako . . .

Nga ako sa kanunay makabaton sa Espiritu Santo!
Pinirmahan,



Pagkat-on og dugang mahitungod sa tema sa Primary karong bulana!

Ang Pamilya Mao ang Sentro sa Plano sa Langitnong Amahan



Ni Jan Taylor

Si Misha ganahan maghimo og store ginamit ang mga bloke, apan usahay maglagot siya kon ang mga bloke mangahulog. Dayon nakakat-on siya og sekreto. Kon butangan niya og daghang mga bloke sa ubos sa iyang tore, makahatag kini sa iyang tore og mas lig-on nga pundasyon. Nagkinahanglan kini og pailub ug praktis, apan sa wala madugay nakatukod na siya og mga tore nga dili dayon maguba.

Sama ni Misha nga nakakat-on sa pagtukod og mas lig-on nga mga tore, kita makakat-on sa pagtukod og mas lig-ong pamilya. Ang mga pamilya importante kaayo nga bahin sa plano sa Langitnong Amahan alang nato. Sa wala pa kita matawo, kita nagpuyo isip espiritu nga mga anak nga lalaki ug mga anak nga

babaye sa Langitnong Amahan. Sa dihang oras na alang nato nga moanhi sa yuta, ang Langitnong Amahan nagplano alang nato nga moabut ngadto sa usa ka pamilya. Gusto niya nga ang atong mga pamilya manalipod nato, motudlo nato, ug motabang nato nga makabalik ngadto Kaniya.

Makapaningkamot kita sa paghatag sa atong pamilya og mas lig-on nga pundasyon. Makapraktis kita sa pagserbisyo ug pagtabang sa usag usa. Kita maminaw ug mosulti og mabination sa usag usa. Kita maka-ampo ug makatuon sa mga kasulatan. Mahimo kitang magtinabangay sa pagtrabaho ug maggahin og panahon sa pagbuhat sa mga butang nga atong ikalipay. Uban sa pagpailub ug pagpraktis, kita makatukod og mas lig-ong pamilya. ■

KANTA UG KASULATAN

- "Families Can Be Together Forever," (*Children's Songbook*, 188)
- Lucas 6:47–49

MGA IDEYA ALANG SA PANAG-ISTORYA SA PAMILYA

Isip usa ka pamilya, mahimo ninyong basahon ang Lucas 6:47–49. Dayon inyong mahisgutan unsay gitudlo niini nga mga bersikulo nato mahitungod sa mga pamilya. Sa unsang paagi ang inyong pamilya nagtinabangay sa usag usa sa mahagitong mga panahon? Unsay inyong mabuhar aron makatukod og mas lig-on nga pundasyon?



Pag-ampo sa Pamilya

Pagsulat ngadto sa usa ka misyonaryo

Family home evening

Pagdungan og panihapon

Pagtuon sa kasulatan sa pamilya

Pagdula

Pagbisita sa usa ka tawo nga masakiton

Pagkat-on og mga istorya sa atong mga katigulangan

PAGHIMO SA ATONG PAMILYA NGA LIG-ON

Makahimo kamo og poster sa pagtabang sa inyong pamilya nga mas molig-on!

- Sa tabang sa usa ka hamtong, guntinga ang mga bloke. Ipapilit sa usa ka piraso nga papel nga nagpakita sa mga butang nga gihimo na sa inyong pamilya. Kini nga mga bloke nagrepresentar sa pundasyon sa inyong pamilya.
- Pagpili og laing bloke nga nagpakita og usa ka butang nga gustong buhaton o palamboon sa inyong pamilya. Human nimo makompleto kini nga tumong, idugang kini ngadto sa imong tore. Ibutang ang poster diin ang tanan makakita niini, ug padayon sa pagdugang og mga bloke aron molig-on ang imong pamilya!

Pagsulat og pipila sa imong kaugalingong mga ideya diha sa blangko nga bloke.

Ang **bunyag** mao
ang sinugdanan sa
atong panaw sa
pagkadisipulo.

Presidente Dieter F. Uchtdorf
Ikaduhang Magtatambag sa Unang Kapangulohan
Gikan sa Oktubre 2013 nga kinatibuk-ang komperensya





Ni Elder
Terence M. Vinson
Sa Seventy

Unsa ang pipila ka mga butang nga lisud kaayo para nimo nga buhaton?
.....

Unsaon nimo sa pagpangayo sa tabang
sa Langitnong Amahan sa pagbuhat sa malisud nga mga butang?
.....

Kinsa pa ang inyong kapangayoan og tabang?
.....



Pag-irog sa Bato

Usa ka batan-on naningkamot sa paghawan sa luyo sa ilang balay aron makadula sa iyang trak-trak. May dakong bato nga nakababag sa iyang buhat. Giduso ug gibira sa bata gamit ang tanan niyang kusog. Apan bisan pa sa iyang paningkamot, ang bato wala gayud matarug.

Gipanid-an siya sa iyang papa og kadiyot. Dayon miduol siya sa iyang

anak ug miingon, “Kinahanglan kang mogamit sa tanan nimong kusog aron mairog ang bato nga ingon niini kadako.”

Mitubag ang bata, “Gigamit ko na ang tanan kong kusog!”

Gikorihian siya sa iyang papa: “Wala pa. Wala ka pa makaangkon sa akong tabang!”

Dayon silang duha ang miduso ug dali rang nairog ang bato.

Ang Ginoo gusto nga kita mosalig Kaniya sa pagsulbad sa atong mga problema. Dayon atong mabati ang Iyang gugma nga mas kanunay, mas gamhanan, mas klaro, ug mas personal nga paagi. Kita mahimong nagkahiusa uban Kaniya, ug kita mahimong sama Kaniya. ■

Gikan sa “Magpaduol sa Dios, Ensign o Liahona, Nob. 2013, 105.

PAGHULAGWAY PINAAGI NI GUY FRANCIS



Ako si Dria

gikan sa Pilipinas

*Mabuhay, Kaibigan!**

Gikan sa usa ka interbyu uban ni Amie Jane Leavitt

Naghandom ba kamo nga makapuyo og usa ka isla? Kini si Alejandria, apan ang iyang pamilya ug mga higala motawag niya og Dria sa minubo. Siya nagpuyo sa isla sa Cebu sa Pilipinas uban sa iyang mama, papa, ug duha ka igsoong babaye. Siya dunay usa ka magulang nga lalaki usab, apan namatay sa wala pa matawo si Dria. “Nasayud ko nga kabahin gihapon siya sa among pamilya, ug makakita ko kaniya sa umaabut tungod kay ang pamilya mahangturon, miingon siya. ■

**“Hello, mga higala!” sa Tagalog.*

Usa sa akong paborito nga buhaton mao ang sayaw. Usa ko ka ballet dancer. Sunod tuig naglaum ko nga mosaka sa sunod nga lebel, nga mao ang pointe. Nagpasabut kini nga ako makasul-ob na og espesyal nga ballet nga sapatos nga makatabang nako sa pagsayaw ginamit ang akong kumagko sa tiil.



Ang Pilipinas dunay sobra sa 7,000 ka mga isla, mao nga dunay daghang maanindot nga mga dapit nga bisitahan. Ang among balay duol sa baybayon, ug ganahan kong magdula sa dagat. Usa sa akong paborito nga buhaton mao ang paglangoy. Gani gitudloan nako akong kaugalingon kon unsaon!



Ganahan ko nga mouban sa akong pamilya sa pagbisita sa lain-lain mga kabaybayunan. Kausa miadto mi sa Palawan—usa ka isla nga dunay labing dakong underground river sa kalibutan. Nag-dive ako didto ginamit ang akong snorkel gear ug mitan-aw sa tanang mabulukon nga mga isda.



Usa ka adlaw sa eskwelahan, pipila ka klasmeyt miingon nga ang Mormons dili motuo sa Dios. Giingnan nako sila nga kami nagtuo. Sa pagkasunod nga adlaw nagdala ko og pipila ka mga pass-along kard nga dunay litrato ni Jesus sa atubangan ug ang mga Artikulo sa Hugot nga Pagtuo sa luyo. Sa dihang ang akong mga klasmeyt mitan-aw sa litrato ug mibasa sa pipila sa atong mga gituhan, sila nalipay nga kita nagtuo sa Dios.



GUSTO KO NGA MAKITA ANG TEMPLO



Swerti kami nga nagpuyo duol sa Cebu City Philippines Temple. Naka-tour ko sa templo uban sa akong pamilya sa wala pa kini gipahinungod. Maanindot kaayo kini, malinawon nga dapit. Mapasalamaton ko nga tungod sa mga templo, ang akong pamilya magkauban hangtud sa kahangturan.



ANDAM NA NGA MOADTO!

Ang bag ni Dria naimpaki na uban sa iyang paborito nga mga butang. Asa niining mga butanga ang inyong isulod sa inyong bag?




Sa Paghunahuna mahitungod ni Jesus

Ni Mabel Jones Gabbott




Dili gyud lisud sa paglingkod nga dili maglihok
ug maghunahuna ni Jesus, sa Iyang krus sa bungtod,
Ug sa tanan nga Iyang giantus ug gibuhat nako;
dili gyud lisud ang paglingkod nga hilom.

Makahunahuna ko sa
daghang milya nga Iyang
gilakaw nga abugon,



ug sa mga bata nga
Iyang gitabangan nga
higugmaon ug saligan;



Dili gyud lisud nga maglingkod sa akong lingkuranan,
sa pagpaminaw nga matinahuron, nga dili lihokon ang akong mga tiil.
Dili gyud lisud, bisan ako gamay,
Sa paghunahuna ni Jesus, dili gyud lisud. ■




USA KA ESPESYAL NGA PANAHON SA PAGHUNAHUNA NI JESUKRISTO

Ang miting sa sakrament mao ang espesyal nga panahon nga hilom nga maglingkod ug maghunahuna sa Manluluwas.




Si Jesus nabunyagan sa suba sa Jordan.



Giayo ni Jesus ang mga tawo.



Gihigugma ni Jesus ang mga bata.



Nag-antus ug namatay si Jesus alang nato.



Mibangon pag-usab si Jesus sa buntag sa Pasko sa Pagkabanhaw.



Tungod ni Jesus, kita usab mabuhi pag-usab!

Pag-drawing o pagpapilit og imong litrato dinhi.

PAGPANGITA OG PAGLAUM SA UMAABUT

Ni Stan Pugsley

Niadtong Septyembre 12, 2001, ang akong nasawa ug ako naglakaw-lakaw sa hawanan sa ospital sa Tucson, Arizona, USA, dugayng naghulat nga matawo ang among anak nga lalaki. Gikan sa among telebisyon ug matag telebisyon sa building, among nakita ang video gikan sa miaging adlaw sa New York City—mga hulagway sa duha ka mga tower nga kanhi nagbuntaog sa kapanganuran niana nga dakbayan, nga nahugno ug naabug. Ang mga hulagway, gisibya sulod sa daghang mga oras, nakapasagmuyo namo. Ingon og kadto ang labing bati nga panahon sa pagpakatawo og bata nganhi sa kalibutan—usa ka kalibutan nga mangitngit ug mahulgaon.

Sayo sa pagkasunod buntag natawo ang among gamayng anak. Samtang akong gikugos ang among gamay nga bata, akong gikonsiderar ang grabe nga mga panghitabo sa miaging pipila ka adlaw, mga panghitabo nga nakapahinumdom nako sa sunog sa Yellowstone National Park niadtong 1988. Ang kalayo miugdaw sa dul-an sa 800,000 acres (323,750 ha) sa kalasangan. Ang kadaot sa parke ingon og hingpit. Mga imahe nagpakita lamang sa sunog nga yuta ug baga nga itom nga aso sa panganud. Walay igong tawhanong paningkamot ang makapabalik unsay nawala. Ingon og bisan ang walay pagkakapoy nga pagbag-o ug kalagsik sa kinaiyahan dili makatupong sa makalaglag nga gahum sa kalayo.

Apan ang misunod nga tingpamulak dunay milagro nga nahitabo—gagmay nga tanom ug mga bulak misugod sa pagtubo diha sa naabo nga yuta. Hinay-hinay, nagkadaghan ang mga



*Ang samang
mga hangin
nga mihasmag
ug mihulga
namo nagpugas
usab sa binhi
sa kausaban ug
kalamboan.*

bulak ug mga kahoy-kahoy ug mga kahoy mitubo. Ang pagkahibalik sa parke hinay ug puno sa gagmay, mahimayaon nga mga detalye, ug paglabay sa panahon ang mga resulta makapahinuklog.

Sa panahon sa kahadlok nga ingon og molamoy nato sama sa nagdilaab nga sunog sa Yellowstone, kon ang atong hugot nga pagtuo ug paglaum anaa na sa kinatumyan, kinahanglan natong hinumduman nga dunay hilum, dili matarug nga pundasyon ubos kanato, mas gamhanan kay sa bisan unsa nga pwersa sa dautan nga atong masugatan. Si Helaman mipasabut nga kining pundasyon mao “ang sukaranan sa atong Manunubos, kinsa mao si Kristo, ang Anak sa Dios.” Kon kita nagpalig-on sa atong mga kaugalingon ngadto Kaniya, dayon “nga sa panahon nga ang yawa mopadala sa iyang mapintas nga mga hangin, oo, ang iyang mga pana diha sa alimpulos, oo, sa diha nga ang iyang tanan nga ulan nga yelo ug ang iyang mapintas nga unos mohampak diha kaninyo, kini walay gahum ibabaw kaninyo sa pagbitad kaninyo ngadto sa bung-aw sa pagkauyamot ug walay katapusan nga pagkaalaot, tungod sa lig-on nga sukaranan diin kamo natukod nga mao ang tinuod nga tukuranan, usa ka tukuranan diin kon ang mga tawo magtukod dili sila mapukan (Helaman 5:12).

Kon mag-atubang og grabe nga pwersa sa dautan ug tintasyon sa kalibutan, kita tingali maghunahuna nga ang gagmay ug yano nga mga impluwensya sa ebanghelyo dili makapiog ug malupig ra. Tingali mobati kita og pagduhaduha ug pagkawalay paglaum samtang kita magpaabut sa sayop nga matarung, kasakit nga mahupay, ug mga pangutana nga masulbad. Kadtong maong hangin nga mihasmag nato, hinoon, nagpugas og binhi sa kausaban ug kalamboan, ug ang dakong gahum sa ebanghelyo sa hilom naglihok ubos sa yutan-ong pagpakabuhi, nag-andam og liboang gagmayng mga binhi sa paglaum ug kinabuhi. ■

Ang tagsulat nagpuyo sa Arizona, USA.



PAGHULAGWAY PINAAGI NI ROBERT T. BARRETT

HOWARD W. HUNTER

Si **Howard W. Hunter** nakaangkon sa iyang **Ganti sa Eagle Scout** (ang labing taas nga ganti sa usa ka programa sa kalampusan alang sa batan-ong mga lalaki) sa dihang 15 anyos pa siya. Ganahan kaayo siya sa **genealogy** ug kanunay nga mogahin og panahon sa pagsiksik sa genealogical library sa Simbahan o pagbisita og pamilya. Samtang nagserbisyo isip usa ka Apostol, mitabang siya sa pagpili sa dapit alang sa **Brigham Young University Jerusalem Center**. Isip Presidente sa Simbahan, siya miawhag sa mga miyembro sa pagsimba sa templo kanunay ug mipahinungod sa **Bountiful Utah Temple** wala kaabut og mga duha ka bulan sa wala pa siya mamatay.

Anaa Usab Niini nga Isyu

PARA SA MGA YOUNG ADULT



Kon ang Inyong Katuyoan Usa ngadto sa

p.40

Akong Himaya

Mga young adult gikan sa tibuok kalibutan nagpakita kon unsay ipasabut sa pagsunod sa ehemplo sa Manluluwas ug sa pagpuyo og tarung.

PARA SA MGA KABATAN-ONAN

Berde ba ang buwan? Peke ba ang pag-landing didto sa buwan? Tubagi kini nga eksamin ug makat-on nga makamatikod sa kalainan tali sa kamatuoran sa Dios ug ni satanas.



p.64

HUSTO o SAYOP

PARA SA MGA BATA

“Sayon ra Kaayo Kana, Lolo!”

Matingala ba mo nga inyong mabasa ang tibuok Basahon ni Mormon sa usa ka adlaw ug tunga?



p.67

